

BWA CINYI NDI MBÈNGANGANA NÈ NTÈNDELEELU MUDILONGOLWELA



Twasakidila, Mwaneetu Neville.

Nudi mwa kusòmbaayi. Dyambedi, mvwa ne mudimu wàbùngi be leelu ewu mu mushindu wa ne ndi mupangile too ne mwa kukumbula bamwe babeedi. Kuvwa bamwe bantu bavwa ne amwe maalu a muntu paa nkaayende a kusambidila, bâmvwà ne cya kutwilangana naabo. Kadi mpindyewu bamwe baa . . . umwe wa ku misùmbà ayi, ngeela meeji ne Billy mmwambe ne ùvwa wa ku Canada, myaba yibidi anyi yisatu mishiilangane. Mpindyewu, batu balwa muneemu emu, nudi bamanye's, ne bàkasòmbela mu nzubu ya bilaala-beenyi ne bilaala-beenyi bya balaminamu mashinyi ku musangu ne ku musangu dîbà dyònsò. Nenku ntu nya nkatwilangana naabo, nkatwilangana naabo ne mbasambidila bu mudibo balwa muneemu bafumina mu myaba yònsò pa buloba bujima, ne ku Asie, ku Mputu ne myaba yònsò. Ku dituku ne ku dituku, patudi muneemu emu apa, bantu badi anu balwa's. Kudi bantu bapite ne pa nkama isambombo pa dibeji dya ménà, bindile. . . bwa miyiiki ya babidi, ne pa nanku bidi byenza ne bwalu bwikale bukole ndambu. Kadi bantu badi bàsaamà bikole menemene ne bakengela kudasambidila bya lukasalukasa abu, mona's, ki bândi nteeta bwa kutwilangana naabo.

² Anu, ee, kacya pàncìvwà muntwamu ne kasumbu kaa balombodi, pa kaamuyiiki kakese pamwe ne kasumbu kaanyi kaa balombodi ku ekeleeziya eku, bivwa bikengela bwa twètù kutwilangana kukaadi katanci. Ne mu ciine cikondo aci bivwa bimpingaja paanyima pabwîpi ne dîbà dijima ne citupa, paaku kuvwa bantu kampanda bavwa ne cya kwikala kaaba aka mu cyòci cikondo aci bwa kudasambidila. Piikalabo kaaba aka, ndi muswe kudasambidila mpindyewu. Pa nanku, bôbò baswe, bantu bavwa bakengela kusambidila abu, ee, bôbò anu mwa kubànda kuneeku mpindyewu padi mwimbi wa cisanji cya piano, ni ùdi nganyi, ulwa ne—ne utupaku cyòna cikese cya “Ngangabuka munene udi pabwîpi mpindyewu, mwena luse Yesu.” Mpindyewu aba badi bakengela kusambidila abu, bôbò mwa kuswa, bùngi bwine buvwabo ncyèna mumanye to. Nenku nwènù ki biine bânà beetu abu's, ngeela meeji. Bânà beetu, mèmè ewu nkaadi musaamesaame bikole mu mubidi wanyi. Yesu wakambula disaama, mu Wende mubidi, bwa Wamona mwa kwikala Mutwangaji wa mushindu mujaalame, bu muvwaYe Nzambi muvwijiibwe mubidi bwa Wamona mwa kukenga. Ùvwa mwa kuumvwa mikenyi ya bisaama bya mateketa. Nenku ki

bwa cinyi Wakalwa kwenza difuta dya cibawu. Ne mu cyôci eci Wakatuma Ekeleeziya Wende bwa kutungunukaye ne mudimu Wende.

³ Nenku mêmè ntu—ntu ntwá midimu ya buumunganga mushinga wábúngì, dipandangana ne bikwabo, bàdì—bàdì ne mapà a cileledi adi Nzambi mubapeeshe bwa kwenza bimwe bintu pa mubidi, bwa kupanda ne kuumusha mênù àkaadì manyanguke, ne bikwabo. Ntu ngaanyisha cyôci aci. Kadi kutu kulwa cikondo citùbi bipicila ne dimanya dyabo—dyabo diine, kabaciyi—kabaciyi bamanya cya dyanza to. Nwamonu anyi? Nenku ndi ngeela meeji ne, pa dîbà adi, twètù tudi ne bukenji pupwangane, bu mutudi bafwanyine kwikala naabu mu bufuki emu, bu twètù mwa kuya kudi ngangabuka wetu wa famiye, pàmwǎpà nga—ngangabuka kampanda wa mu ditunga, ngangabuka kampanda mwîmpè wa kale utu wambula mwêndù ne ukosolwela mu budimi mu mêmè a bufuku, bwa kukupeta, ne kukwondopaye awu. Kadi yèyè mupangile bwa kumanya, neaye bwa kupeta muntu kampanda wa mumutambidileku yèyè ndambu. Neakutume kudi mumanyi mupiluke. Nenku mpindyewu mumanyi mupiluke awu yèyè kayi mumanye to, mêmè ndi—ndi ne disanka dya mutudi ne mukwabo mushimi, Ngangabuka munene.

⁴ Ne Yèyè katu upangila to, ewu Yèyè katuku upangila to, bwalu Yèyè ki Mufuki Yèyè mwine. Nenku Yèyè mmutusebeele njila. Mpindyewu, bu ne kuvwaku bukole kampanda bwa dyondopa mu mêmè emu bwa kucyenza, nunku's mvwa—mvwa mufwanyine kulwa kuntwaku ne kucyenza. Mvwa—mvwa mufwanyine anu kwikala ne disanka dya kulwa kucyenza. Kadi, bwa bukole bwa dyondopa, ncyênàku mêmè naabu nansha bukese to, muntu mukwabo nansha umwe kênàku ne bukole bwa dyondopa to. Kadi tudi batumiibwe ne mudimu, nwamonu's, kudi Kilisto, bwa kusambidila babeedi, Yèyè ukàadi mwane kuteeka mu cibucilu bukole bwa dyondopa awu. Nwamonu anyi? Nenku twètù tulwalwa anu cyanaana, mutùdì mwa kwamba, bwa kufunda kabeji kaa shekè pa cyôci aci. “Nenku cyônsò cinùkâlômbu Taatù mu Dîná Dyanyi aci,” aku nkabeji kaa shekè kaa dyuuja. “cyônsò cinùkâlômbu Taatù mu Dîná Dyanyi, Mêmè nêncyênzè.” Mulayi kaayipu's we! Kawena mwa kupangilaku to. Nenku mêmè ewu nkaadiku mwambulwishe bânà beetu baa balume ne baa bakaji, pa buloba bujima, bwa kwenza bibucilu ebi. . . anyi bwa dipatwisha mpetu eyi ku Banki wa Nzambi, ku Mashì a Yesu Kilisto. Ne bikaadi bituutetuute dyakalenga be. Yèyè ukaadi misangu yônsò anu mufutefute, nenku mbwalu cibucilu cikaadiku, nwamonu's. “Yèyè—Yèyè—Yèyè *wakamana* kutapiibwa mputa bwa matomboka etu, ku mibundabunda Yende *twakamana* kwondopiibwa.” Nwamonu's, kwônsò nkumane kujika. Nenku tudi ne disanka diloolo edi bwa diitabuujá dyenu.

5 Ngeela meeji ne Billy uvwa ungambila ne mwaneetu wa balume kampanda mmufumine kule ku Canada kwaka anyi ku mwaba kampanda. Nenku mmwômò anyi? Wèwè mene ki mwaneetu udi mufumine ku Canada awu anyi? Kadi—kadi wèwè udi mufumine penyi, mwaneetu wa balume? [Mwaneetu awu udi wamba ne: “Anu ku nord wa Fort Wayne eku, mu Kendallville.”—Muf.] Mu Kendallville, Indiana, mufumine ku Fort Wayne. Mémè ntu muselele mu Fort Wayne. Ndi mvuluke bimpè. Ntu mwenzenze masangisha àbùngì mwómò amu ku Rediger Tabernacle. Ngeela meeji ne udi mumanye mwaba udiye usanganyibwa. Kabidi ndi mvuluka, pàncìvwà mwànà mutekete, ne mvwa musòmbèle ku makàsà a Paul Rader, mu Rediger Tabernacle amu, anu bu mwambi wa citende mulongi. Yèyè’s uvwa muntu munene, Mwaneetu Paul mwine awu, ki civwa kabidi Mwaneetu Rediger, balume baa diitabuuja. Misuuka yabo yiikale mu diikisha diloolo edi. Nenku mpindyewu, bu m̀ncìvwà mwànà mutekete, ndi nteeta bwa kutungunuka ne mudimu ùvwabo bashiye awu, ùvwà Yesu mushiile Ekeleeziya Wende kacya kwònsò aku awu.

6 Mpindyewu, ne diitabuuja dyònsò d̀ndì naadi, ndi ndwa bwa kunusambidila. Nenku ncyèna—ncyèna ndwa anu bu ku mpuukapuuka to. Katutuku baswe kukùseemenena mushindu awu to. To, abi k̀ mb̀mpè to. Tudi tulwa, biitabuuje ne netupete citudi balombe aci, nwamonu’s, bamanye ne Nzambi ngudi mucilaye. Kabidi tudi tulwa ne ditwishiibwa mu mwoyi wetu ne Kilisto ngudi mwenze mulayi awu, ne nwènù b̀nà beetu nudi bateete bwa kuteeka diitabuuja dyenu pa cyoshelu, benze cyònsò cinuvwa peenu mwa kwenza aci, ndi ndwa bwa kuteeka dyanyi paanyi pamwe neenu diloolo edi. Nwamonu anyi?

7 Nenku, mpindyewu, tudi ne cyoshelu cinene cyalabale eku ne eku kwa maulu, ne pa cyòci cyoshelu aci mpadi Mulambu wetu muteekiibwe, Mwànà wa Nzambi. Nwamonu anyi? Ki wòwò Mulambu wa umata mashi awu. Nzambi k̀na mwa kutangijapu m̀sù kayi uWuneemeka to, nwamonu’s, bwalu Aci’s n’D̀yi Dyende ne: “Ewu ki Mwan’Aanyi munanga, nuMuteelejaayi Yèyè.”

8 Ǹndombèku Mwaneetu Neville, wetu mukulu, ne udiku mwa kulwa naanyi kumpala eku mpindyewu patuyaaya apa. Ndi muswe bwa ekeleeziya mujima . . . Amba t̀ng bu ne yèyè ewu uvwa mmwaneenu wa balume, bayeebe, mwaneebe wa balume, tatwèbe? Ki cidiyè bu muntu kampanda, wàvùluka. Tuyaayaaku, ne meeji matooke ònsò atudi peetu naawu awu, tuseemenaayi kudi Nzambi mpindyewu bwa b̀nà beetu aba.

Twinyikaayi mitu yetu.

9 Taatù wa mu Dyulu wa ngàsà, nyewu tubweja mu Bwikadi Bwebe mpindyewu, ku cyoshelu cya ngàsà, nansha mudibi ne tudi biimanyine ku kaacibasa kakese kaa dibaya, bu

mwakadibi, pa buloba apa, kadi diitabuuja dyetu ndibànde ku cyoshelu cinene cidi cilakuka kapyà dyamwamwa, kudi Yesu (udi Mupuuya awu wa dipembu dîmpè kumpala kwa Nzambi, Mulambu wa Mashi wa ku Kalvariyo) Yèyè wákacimuna bubeedi bwònsò, disaamà dyònsò, lufu, iferno, ne lukita, ne wákabiika ne wákabànda e kubwela mu Dyulu awu, bwa kusòmba ku cyanza cya dyabalume cya Udi mutambe Bunene. Ne twètù, ku diitabuuja, nyewu tulwa, tudibàndisha twètù biine kuulu aku mu ngàsà wa Nzambi, bwa kwambila pa cyoshelu eci, twambila Mufuki munene wa Maulu ne buloba awu ne: “Twàkìdilèku, Mukalenge, patudi tuseemena mu Dîná dya Mukalenge Yesu apa.”

¹⁰ Bânà beetu mbòbò aba, ne umwe wa kudibo mmufumine ku Fort Wayne eku, muneemu mu matunga aa emu, ne mukwabo mmufumine kule ku Canada kwaka mulwe muneemu, balwe bwa cikondo cinene cya cikuma eci. Ndufu apa mwoyi apa, Mukalenge. Bantu balume babidi mbòbò aba, bacikàle anu bansonga, mudimu wàbùngì mucikàle munda mwabo Bwebe Wèwè, Mukalenge, masalaayi abidi, beena Kilisto bàdi baKwitabuuje. Kadi mulwishi nyewu mwase mukete, ne mukete wa lulengu awu mmwase mwaba kampanda mu mubidi wabo, nenku mbòbò aba bapingane, baalukile cyanyima balwe ku lupitaadi lwa ngàsà wa Nzambi, bwa didìpungisha, bwa dyondopiibwa, bwa baamona mwa kuseemena cyakabidi ku mwalu wa mvita, ne ngabu misumba muulu, batangile ku mvita. Mbalwe kudisanga ku makole a disambila pamwe neetu, Mukalenge. Nenku tuyaaya katwilangana ne mwena lukuna.

¹¹ Mu Dîná dya Yesu Kilisto, bàlekèlèlà. Tudi tukutumina dîyì mu Dîná dya Yesu Kilisto, bàlekèlà baye.

¹² Bòbò mbalwanganyi ba mvita. Nenku, mèmè bu musadidi Webe, nyewu nseemena mpindyewu bwa kubatentekela byanza, ne diitabuuja, mwitabuuje ne: “Bimanyinu ebi nebifile badi biitabuuja,” mwakamba Mukalenge wetu, wetu Kapiteena Munene wa mvita awu, “bòbò batentekela babeedi byanza, babeedi nebasangale.”

¹³ Ndi ngenza bwalu ebu mu Dîná dya Yesu Kilisto. Swaku bwa bukole bwa bubeedi bùdì buswike mubidi wa mwaneetu wa balume ewu abu, bumulekelele, mu Dîná dya Yesu Kilisto.

Bukole bwa bubeedi bùdì buswike mubidi wa mwaneetu wa balume ewu, bumulekelele. Mu Dîná dya Yesu Kilisto, swaku bwa bukatuke.

¹⁴ Nzambi wa Bukole bwònsò, Mufuki wa Maulu ne buloba, Mfukyamukele wa Mwoyi wa kashidi, ne Mufidi wa dipà dyònsò dîmpè, twalaaku mabenesha Ebe pambidi paa batwàbèneshi aba. Kabidi mbifundiibwe mu Mifundu, ne: “Wèwè mwambile mukuna ewu ne: ‘Tentemuka,’ kuyi wela mpatà mu mwoyi webe to, kadi mwikale witabuuja ne ciwàmbi aci necyenzeke, udi

mwa kupeta ciwǎmbì aci.” Ndi ngiitabuuja ne mabeedi abo awu amanyi kuumuka mu mibidi yabo. Mpindyewu byamanyi kwambiibwa; mpindyewu byenzeke. Amen.

¹⁵ Mu Dîna dya Mukalenge Yesu ndi ngiitabuuja ne nudi basùlùdùibwe. Mu Dîna dya Yesu Kilisto ndi ngiitabuuja ne nudi basùlùdùibwe. Amen.

Ekeleeziya udi witabuuja mushindu umweumwe awu anyi? [Disangisha didi dyamba ne: “Amen.”—Muf.] Nanku byenzeke.

¹⁶ Mpindyewu, kwòkò kufwanyineku kwikala bakwabo munda emu badi baswe anu bwa kubavuluka mu disambila, nudiku mwa kwela byanza byenu muulu anyi? Eyo, tuseemenaayi kudiYe mpindyewu panudi nutentekelangana byanza kunudi aku muntu ne mukwende apu. “Bimanyinu ebi nebifile badi biitabuuja.”

¹⁷ Nzambi mutambe cijila, ku diitabuuja tudi bamone Yesu, tudi twitabuuja ne Yèyè mmwimane kaaba aka. Yèyè udi utabaleela Dîyi Dyende. Ne Yèyè wakamba ne: “Mwaba wònsò ùdi babidi anyi bapite apu badisangishe mu Dîna Dyanyi, Mèmè ndi munkaci mwabo.” Mpindyewu, Taatù wa mu Dyulu, bukole bwa Nzambi wa Bukole bwònsò bulengeku bantu aba, Mukalenge, padibo bakwatangane ku byanza muntu ne mukwende apa, batentekelangane byanza muntu ne mukwende. Mudimu wa ndekeelu uWakambila Ekeleeziya ngwa ne: “Bimanyinu ebi nebifile badi bitabuuja. Bòbò batentekele babeedi byanza, babeedi nebiikale. . . nebasangale.” Wèwè ngwákacilaya, ne twètù tudi tuciitabuuja. Pa nanku mpindyewu cyamanyi kwenjiibwa, ne tudi tuKutumbisha bwa bwalu abu, mu Dîna dya Yesu Kilisto. Amen.

¹⁸ Ne mu Dîna dya Yesu Kilisto swaku bwa bukole bwa Nzambi bulaabe mishwala eyi yiyaaya kudi babeedi ne badi mu lukengelu. Ne piikalayi mitumiibwe ne mitentekela babeedi, swaku bwa byenzeke ne bòbò bondopiibwe. Tudi tubala mu Bible ne bavwa bangata ku mubidi wa Pòlò Munsantu, mishwala, tulùlù; nyuma ya bukooya yivwa yumuka pambidi paa bantu, ne màsaamà avwa ondopiibwa. Nenku, Taatù, tudi bamanye ne twètù katwena Pòlò Munsantu to, kadi tudi bamanye ne Wèwè ucidi anu Yesu. Nenku tudi tulomba bwa Wèwè kutwenzelaku dilomba edi bwa butumbi Bwebe. Amen.

¹⁹ Ncyèna mumanye ní kudiku . . . mikaba ya mèyì yikaadi mibanga kukwata anyi, ki mmyanji kubanga kukwata. Yikaadi yikwata anyi? Yòyì kaiyi yikwata to, ndi muswe babange kuyendesha pa dîbà edi. Ngeela meeji ne mbote wa dikwata nende mmujuula’s. Mpindyewu, ndi ntekemena ne ncyèna nnucyokesho diloolo edi to. Ndi ntwadija bu ne cyabibidi cimwe cya dîbà nanku anyi ne tusunsa makumi asatu ne tutaanu kumpala kwa dîbà. Nenku ndi . . . Ndileesona dya kalaasa kaa Dyalumingu, ne ndi mudyǎmbidile ne pámwápà míngà misangu mbifwanyine kwikala bimpè bu mèmè mwa

kukwacisha pa mikaba ya mēyì cidi pa mwoyi wanyi eci. Nenku tudi tudilongolola bwa kubwela mu ci—citupa cipyacipya cya mudimu, mu tabernacle mupyamupya, byônsò bipyabipya.

²⁰ Nenku mpindyewu ndi muswe kubalaku yimwe ya ku Mifundu. Panwikala nwênù baswe kubala pamwe naanyi, ndi muswe kubala mu Samwele wa Kumpala, nshapita wa 8, ne tudi baswe kubangila ku mvensa mwi⁴ too ne ku wa 10; ne pashiishe, bwa kulaminyina dîbà, wa 19 too ne ku wa 20. Kadi ndi ne mabeji àbûngî a Mifundu ne myaba ya dileedila bidi bifunda mwab'ewu, bwa ne nwênù panwikala ne bikà ne crayon, anyi cintu kampanda, dibeji, nwênù baswe bwa kuleedila ku yôyi eyi anyi kuyilama mifunda, nudi mwa kuyangata, anyi, Mukalenge Maguire neikale ne mu—mu—mukaba wa mēyì awu.

²¹ Nenku ndi muswe bwa mukaba wa mēyì ewu wikale mulongolwela bambi, bânà beetu, bambi badi bangumvwe bibi abu, nangananga bânà beetu baa mu ekeleeziya ya cyena mangumba abu. Ne ciibwîpî ne bônsò batu beena mangumba.

²² Nenku cyena-bwalu cyanyi diloolo edi cidi ne: *Bwà Cinyi Ndi Mbêngangana Nè Ntêndeleele Mudilongolwela*. Nenku nêmbalè mpindyewu bwa kupeta mwaba wa kushindamijila, anyi dibala dya Mifundu, bwa kucivwija bushuwa anu cya mu Mifundu, ndi muswe kubala mu Samwele wa Kumpala 8.4-10, pashiishe 19-20. Kùdî bateeleji baanyi badi bamweneka ne mèsù aba, ndi mutwishiiibwe ne panwikala baalukile kumbelu nenufunde Mifundu eyi ne nenuyibale ne mbabi. Nenku kùdî bânà beetu bàatèèlejà mukaba wa mēyì, ndi mutwishiiibwe ne nwênù peenu kanwakwimanyika anu mukaba wa mēyì ewu piikala cintu kampanda cyambiibwe pàmwǎpà cya kanuyi bafwanyine kwitaba to, kadi nenukebeku Nzambi mu cyôci aci, bwa kumona ne ncyà mu Mifundu anyi. Ndi ngeela meeji ne tudi beena dibanza bwa cyôci aci kutudi twètù biine ne kudi Mukenji wa dituku edi.

²³ Mémè ntu ngiitabuujà ne ekeleeziya yônsò yidi ne beena Kilisto munda mwayi, ne ncyà bushuwa ne ncyêna ngamba maalu ndwisha beena Kilisto to. Kadi kabingila kadi kenze ne ngénzè bîndî mwenze ebi, ne ngâmbè bîndî mwambe ebi, mbwa bwalu bwa disonsodiibwa dya kudi Nyuma Mwîmpè pa Dìyì.

²⁴ Mpindyewu tubalaayi mu Samwele wa Kumpala, nshapita wa 8, kubangila ku mvensa mwi⁴, ne tubala wa 10, mu yôyi amu, dyambedi.

Pashiishe bakulu bônsò baa Izaleela baakadisangisha pamwe, ne baakalwa kudi Samwele ku Lààmà,

Ne baakamwambila ne: Mona, wêwè ukaadi muntu mununu, ne bânà beebe baa balume kabeena benda . . . kabeena bendela mu njila to; mpindyewu tuteekeleku mfumu bwa kwikalaye utulumbulwisha bu mudi matunga ônsò.

Kadi bwalu abu bwakabiipila Samwele, paakambabo ne: Tupèèshè mfumu bwa kwikalaye utulumbulwisha. Nenku Samwele wakasambila MUKALENGE.

Nenku MUKALENGE wakambila Samwele ne: Teeleja dîyi dya cisamba mu byônsò bidibo bakwambila abi, bwalu udibo babenge awu kî ngwêwè to, kadi udibo babenge awu mmémè, bwa mémè nciikadi ne bukookeshi kumutu kwabo to.

Bilondeshile byenzedi byônsò bidibo benze kacya anu ku dituku dingàakabâpâtulâ mu Ejipitu too ne ku dituku edi mene, mudibo bandekele, ne babange kukwacila tunzambi tukwabo mudimu, ki mudibo kabidi bakwenzela wêwè amu.

Mpindyewu ki bwa cinyi wêwè teeleja dîyi dyabo, kadi nansha nanku ubadimwije ne dîsù dikole, ne ubaleeje mushindu wa mwine mfumu wikala mwa kubakookesha awu.

Ki Samwele kwambilaye cisamba cyakalomba mfumu aci mèyi ônsò a kudi MUKALENGE aa.

25 Mpindyewu mvensa wa 19 ne wa 20 bwa dyoya dya bwalu.

Nansha nanku bantu baakabenga kutumikila dîyi dya Samwele; ne baakamba ne: To, kadi twètù tudi baswe anu kwikala ne mfumu kumutu kwetu,

Bwa twamona peetu mwa kwikala bu mudi matunga ônsò, ne bwa wetu mfumu kwikalaye utulumbulwisha, ne uya . . . kumpala kwetu, ne utulwila mvita.

26 Mukalenge asakidileku dibenesha Dyende ku kubala kwa Mêyi Ende. Mpindyewu, bu mudici kalaasa kaa cilongelu cya Dyalumingu, ndi muswe kwamba ne tudi baswe kuteeta kwikala ne—ne ntema ne mwetu mwônsò ku Dîyi.

27 Nenku tudi bamanye ne—ne misangu mikwabo bintu bitu byambiibwa, (ne maekeleziya kampanda), biikale bilendwisha muntu kampanda udi mulongeshiibwe mu mushindu mubengangane ne udiye . . . udiye wumvwa. Cileejilu, muntu kampanda mmungambile dituku dikwabo, yêyè awu mmulunda wanyi udi musômbe kaaba aka mpindyewu, kwambaye ne: “Pauvwa mwambe, wêwè Mwaneetu Branham, nansha ne bûngî bwine bwa diitabuuja dîntù naadi mu wêwè edi, ne mwikale ngiitabuuja, pawămbî ne kakutu ‘iferno wa Cyendelele’ apu,” yêyè ne, “mémè kwamba kudishinda mu nkwasu wûmvwà musômbe awu. Ki mémè kwamba ne: ‘Cya bushuwa ne mulumyana ewu mmutupakane.’” Ki pashiishe kwambaye ne: “Wêwè kwanji kutulekela bindile katanci. Ki pashiishe wêwè kwamba ne: ‘Kudi mushindu wa Mwoyi wa Cyendelele anu umwepele, ne ngudi ufumina kudi Nzambi.’” Ne wôwò awu’s ki utudi twètù bônsò tukeba, nwamonu’s.

²⁸ Ne kakwenaku Mufundu nansha umwe udi wamba ne kutu iferno wa Cyendeleele to. Bwalu, cya Cyendeleele kacituku cibange to, ne kacyenaku cijika to. Pa nanku Bible mmwambe ne “iferno wakafukiibwa bwa dyabulu ne banjelo bende,” pa nanku kî ngwa Cyendeleele nansha. Kuvwa cikondo civwaye kayiku to, ne kabidi, nekwikale cikondo ciikalaye kayiku to. Kadi badi mwa kunyookiibwamu, ku kapya ne soufre, ne biinà bya kapya, munda mwa mukùngùlù muleemule wa cikondo, kadi ndekeelu wa byònsò neaye anu kashiikila bwalu iferno kî ngwa Cyendeleele to. Nanku bu ne kuvwaku iferno wa Cyendeleele, nanku’s bivwa bikengela wêwè kwikala ne Mwoyi wa Cyendeleele bwa wêwè kwikala ne mwoyi mu iferno wa Cyendeleele. Ne bu ne yêyè awu uvwa wa Cyendeleele, yêyè’s uvwa anuku kwine kwònsò aku, ne wêwè uvwa misangu yònsò anu mu iferno amu ne newikale misangu yònsò anu mu iferno amu. Nwamonu’s, pa nanku cintu bu nanku kacituku to.

²⁹ Pa nanku, nudi numona’s, wa *Cyendeleele* ngutu “kacya kayiku ne ntwadijilu anyi ne ndekeelu to.” Nanku kutu mushindu anu umwepele wa Mwoyi wa Cyendeleele, ne wòwò awu ngudi mu Nzambi, ufumina ku mwaku wa cyena Ngelika *Zoe*, ùdì wumvwija ne “Mwoyi wa Nzambi Yêyè mwine.” Nanku patudi tulediibwa cyakabidi ku Nyuma wa Nzambi, tudi tulwa baa Cyendeleele pamwe ne Nzambi, bwalu tudi ne citupa cya Mwoyi Wende, ùdì ùtùvwijà bânà baa balume ne baa bakaji kudi Nzambi, pa dîbà adi tudi ne Mwoyi wa Cyendeleele. Ne Mwoyi ùdì munda mwetu awu, Nzambi neabiishe mubidi ku lufu mwikale ne Mwoyi awu ku dituku dya ndekeelu, kadi Nyuma wa Nzambi udi munda mwetu awu ngudi ubiishangana, bwalu n’Nyuma wa Kilisto uvwa munda mwa Kilisto awu, ngudi ufuululula mibidi yetu ne utubiisha kabidi, pamwe Nende, bwa twètù kusòmba mu—mu—mu Butumbi ne kukookesha pamwe Nende.

³⁰ Mpindyewu ku cyena-bwalu, mpindyewu, mvwa munda mwa bidimu byònsò ebi, ne tabernacle ewu mmwimanakane. Nansha mudibi ne, bakanjidila mu église Baptiste Missionnaire, kudi Docteur Roy E. Davis, kukaadi bidimu bitwe ku makumi asatu ne bisatu, muneemu mu Jeffersonville. Mpindyewu mêmè, kacya anu piine apu, mvwa mu bulongolodi abu anu bwa ntanta mukese cyanaana, ndambu mukese wa ngondo, too ne paakajuuka cintu kampanda cya kacyi cya mu Mifundu cijuula kudi ekeleeziya awu, nanku mêmè kumwambila ne ncivwa mwa kutwala aci to. Ne pa nanku mvwa, mu bushuwa bwa bwalu, mwenzajiibwe bwa “kucyenza anyi kubenga,” ki mêmè kubenga. Pa nanku civwa ncintu cimwepele cîndì mwitabuuje ne, eci ki Dìyì dya Nzambi. Ki mêmè kwambila muntu uvwa mu—mulongeshi wa cikunda awu ne: “Bu wêwè mwa kundeejaku aci mu Dìyì dya Nzambi’s!”

“Kadi civwa,” mwakambaye, “s’ki dilongesha dyetu.”

Mêmè kwamba ne: “Kadi’s ndi muswe cipatukile mu Dîyì, wamonu’s, mu Dîyì dya Nzambi.”

³¹ Kadi kî mbwalu ncyêna wa mu bulongolodi kampanda nenku ki pândi mbengangana ne bulongolodi to, bwalu ndi ne kusakidila kudi bânà betu, bândi ngaakula naabo leelu ewu aba, beena mabiikila ântù mpeta, ngeela meeji, pamwe ne dingumba ne dingumba dyônso, nangananga mu beena Evanjeeliyo mu Kaabujima, nansha mene mu ekeleeziya mikwabo yâbûngi. Bakaadi bambiikilebiikile bwa kubwela mu bwobumwe bwabo ne kushaala wa kudibo, kadi mêmè ntu mushaale mudikâdile. Bwalu, bwenzeji mene bûndi naabu, nciitu njinga kubuteeka pa cisumbu cimwepele cya bantu nansha. Ntu njinga kuteeka cidi Nzambi mumpeeshe aci, disambidila dya babeedi, bwa bâàdîpetakù kudi bânà baa Nzambi bônso mu bulongolodi ne bulongolodi bwônso. Kacya Yêyè katuku mwanji kunkandika bwa kusambila, anyi bwa *kampanda* ne bwalu ngwa mu *Cikampanda-ne-cikansanga* to, Nzambi ngutu ulumbulwisha mwoyi wa muntu.

³² Nenku mpindyewu, bangabanga, cidi cyènzè ne ncishaadi wa ku wôwô awu ne ngiikale mubengangane naawu, cidi ne, dyambedi, mbwalu nciitu ngiitabuuja ne bulongolodi bwa bwena Kilisto bûtu mbwa mu Mifundu to. Ntu ngiitabuuja ne kî mbwa mu Mifundu to. Nenku ki cîngââteetâ, diloolo edi, bwa kudyenzejaku ku ngâsà wa Nzambi, bwa kunujaadikila ne kî mbwa mu Mifundu to, bidi bibengangana ne ngiitabuuji lu ya kale bwa kwikala ne bulongolodi nansha bwa munyi.

³³ Mpindyewu, dyambedi, tudi tucibiikila ne “ntendeleelu.” Mwaku ewu *ntendeleelu* udi “cibwikilu,” mbwena kwamba ne kubwikila cintu kampanda. Mpindyewu, Adama wakapeta ntendeleelu kampanda, kadi mbulelela ne wakadikwatakajilaye yêyè nkââyendè, mumwenze ne mabeji a mfigi, kadi kaakakumbanaku to. Wakadikwatakajila dilongesha dyende yêyè mwine ne kuteetaye bwa kusebela njila wa dipandukila, bwa kupetela lupandu mu cintu kampanda cyakadyenzelaye yêyè mwine, kadi Nzambi wakacibenga, kuwukila anu ku Adama too ne ku dilondangana dya bulongolodi bwa ndekeelu ebu. Kacituku cyanji kwikalaku to, ne ku ngâsà wa Nzambi netucijaadike leelu ewu ku Bible. Ntendeleelu uvwa ncibwikilu. Adama wakadikwatakajila yêyè mwine cibwikilu cya mabeji a mfigi, mucikwatakaje, yêyè nkââyendè, bwa kuteeta kudyenzelaku yêyè mwine cintu kampanda.

³⁴ Kadi Nzambi uvwa mulombe lufu, difuta dya cibawu. Mpindyewu, kudi dishiilangana dinenaanenaale bu dya ntanta wa dîsù ne dici pankaci paa ntendeleelu ne lupandu, nwamonu’s, lupandu. Ntendeleelu ncibwikilu. Nwamonu anyi? Lupandu n’Dilediibwa, dipà dya kudi Nzambi. Lupandu n’Dilediibwa, dipà dya kudi Nzambi, ne kalwenaku mwa kukumbajiibwa

kudi muntu kana yônsò ewu anyi kudi cisumbu kampanda cya bantu nansha. Nkudi muntu nkaaya kudi Nzambi utwala diine dipà edi. Ne mapà miine a Mwoyi wa Cyendeleele aa avwa madyanjila kulongolola kudi Nzambi bwa muntu ne muntu yônsò kumpala mene kwa twêtù kwikala ne dyulu ne buloba, bilondeshile Mifundu. Bible mmwambe mu Bwakabuulwibwa, ne, mufwilakanyi ne Kilisto uvwa ne cya kulwa pa buloba awu, uvwa mwa kuseeswisha bônsò bavwa basômbèle pa buloba, beena mênà avwa kaàyi mafunda mu Mukanda wa Mwoyi wa Mwânà wa mukooko kumpala kwa difuka dya dyulu ne buloba. Nwamonu anyi? Nzambi, ku didyanjila-kumanya Dyende, wakamona ne nganyi uvwa mwa kulwa ne nganyi uvwa kayi mwa kulwa, Kilisto wàkâlwa panshi bwa kusebela njila bwa bavwa mwa kuswa kulwa. Nwamonu's, mumanye bakwabo abu.

³⁵ Byôbì ne Yêyè udi Nzambi, cya bushuwa, bikengela Yêyè kwikala kayi ne mikalu. Ne Yêyè kayi ne mikalu, Yêyè kêna mwa kwikala kayi ne mikalu cibi kayi wa ngulu yônsò to. Kêna mwa kwikala wa ngulu yônsò cibi kayi myaba yônsò to. Kêna mwa kwikala myaba yônsò cibi kayi mumanye byônsò to. Pa nanku, nudi numona's, byônsò abi mbidi biMwenza Nzambi.

³⁶ Pa nanku, Yêyè uvwa mumanye ndekeelu kacya ku cibangidilu. Yêyè uvwa mumanye ne nganyi wâlwa ne nganyi wabenga kulwa, ne Yêyè uvwa mumanye ne kuvwa bààbúngì bàvwà mwa kulwa, ki kutumaYe Kilisto bwa kufuta cibawu bwa biine bavwa mwa kuswa kulwa abu. Mpindyewu, kakwena cintu nansha cimwe citudi twenza cìdì mwa kwikala ne bwenzeji mu cyôcì aci to. Yesu wakamba ne: "Bônsò bàdì Taatù muMpeeshe," bàdì, cikondo cipite, "nebalwe Kùndì. Ne muntu nansha umwe kêna mwa kulwa padi Taatù Wanyi kayi mumukoke to." Nwamonu anyi? Mpindyewu, nwamonu's, byônsò bidi mu dimanya dya Nzambi.

³⁷ Wêwè udi wamba ne: "Mwaneetu Branham, mêmè ndimu anyi?" Ncyêna mumanye to. Ndi ntekemena ne mêmè ndimu. Tudi tukwata mudimu bwa lupandu lwêtù sungasunga ne diciina ne dizakala. Mpindyewu, Ekeleeziya mmudyanjila kulongolola bwa kutuutakeena ne Nzambi kayi katoba anyi mufudi to. Mpindyewu, piikalabi ne twêtù tudi mu Ekeleeziya awu, s'tudi badyanjila kulongolola pamwe ne Ekeleeziya awu. Mpindyewu udikenkete wêwè mwine ku Dìyì, pa dîbà adi newikale mwa kumona ne tukaadi baye ntanta bule kaayi.

³⁸ Mpindyewu, mpindyewu, bwena Kilisto bwa cyena bulongolodi kabwenaku mwa kufila ditwishibwa adi to. To. Bamwe baa kudibo bakaadi bambambe ne: "Wêwè lwâku ujikule anu ne Yesu udi Kilisto ne ubatijiibwe mu ekeleeziya." Dyabulu's utu wenza cintu cimwecimwe aci. Útu witabuuja, yêyè mwine ne, Yesu udi Kilisto, ne uzakala. Nwamonu's, ncyà bushuwa.

³⁹ Kacya Nzambi katuku mwanji kutuma dîyî, mwaba nansha umwe mu Mifundu, bwa ne kwikaleku bulongolodi kampanda to. Kakwena kaaba nansha kamwe mu Bible bwa aci to. Adama wakabubanga kadi bwakapangila.

⁴⁰ Ne pashiishe Nimeloode wakateeta kwenza bulongolodi kampanda. Pawikala mulongi wa maalu malonda, ne mumanye bwalu bulonda bwa Baabulona, ubale mukanda wa *Baabûlònà Ìbidi* wa Hislop, neupete bukênkè bwâbûngî menemene. Bwa ne, Nimeloode, muntu wa mpekaatu ewu, wakangata Baabulona ne tuekeleeziya twende tukese twônso atu, anyi myaba yivwa mimunyungulukile ayi, civwâ ciikale cimfwanyi cya—cya bwena Kilisto bwa dipambuka bwa dituku dya ndekeelu edi ebu, e kenzaye mwaba umwepele wa munene menemene ne mikwabo yônso ayi miikale yinaya . . . yiwuufuta wôwô awu bitadi. Ne mwômò amu wakiibaka kaleyi ne kuteeta kwenza bulongolodi bwa bantu biikadile kaaba kamwe, kadi cyakapangila. Cyakapangila. Cyôci aci cyakapangila.

⁴¹ Koola, mu Nomba 16.1, panwikala baswe kubala, Koola wakateeta cintu anu cyôci cimwecimwe aci. Wakasangisha beena Lewi bônso pamwe, ne kusangisha ba . . . bamwe baa ku bantu baa bamanyike bikole abu, bantu baa milongo ya kuulu, bantu banene, bantu baa cijila, ne yêyê ne Daatana kudisangishabo pamwe kadi kwamba ne: “Kî mbîmpè to, muntu umwepele ukeba bwa kwikala kumutu kwetu bônso.” Nunku ki kuteetabo bwa kwenza ne bulongolodi bubange bwa bônso pamwe, e kulwabo kumpala kwa Môsà ne Aalona, bavwa Nzambi musungule bwa mwine mudimu awu abu, e kubambila mukaavwabo badimone paabo be, ne muvwa disangisha dijima diikale dya cijila, ne muvwabo anu paabo ne bukenji bwa . . . “Mu ciibûngî cya mibelu mmudi dikubiibwa,” mu bushuwa bwa bwalu, mmutubo bamba. Aci kacyena cyambiibwa bwa bwena Kilisto to. Aci mmu mvita. Monaayi, dishilangana dinene be.

⁴² Udi mwa kwangata Mufundu, kwamba ne: “Yudaase wakaya e kudyowaye,” ne “wêwè nda wènzè bya mwomumwe,” pawikala muswe kucyenza’s, kadi aci kacyena cicivwija cilelela to.

⁴³ Nzambi nguvwa musungule Môsà ne Nzambi nguvwa musungule Aalona, nenku ki civwa mukenji wa dituku adi. Nunku nansha muvwa lukwabo luseke alu lumweka lwîmpè lwa bishi, bivwa bibengangane ne ngeelelu wa meeji wa Nzambi. Nunku bikengela twènzè bwa ngeelelu wa meeji wa Nzambi ikale wetu ngeelelu wa meeji. “Meeji avwa munda mwa Kilisto ikale munda mwenu.” Ne Bible ewu ngudi ubuulula meeji a Kilisto. Ne Mukanda mujima wa Dibuulula, udibo babiikila ne m’Bwakabuulwiba awu, n’Dibuulula dya Yesu Kilisto. Nunku tudi mwa kumona mudiYe upiisha cintakanyi aci, mudiYe ucyangata uciteeka ku luseke lumwe, kadi netukufike paanyima paa katanci kakese. Eyo.

44 Koola, ngeela meeji ne ùvwa ne meeji matooke mu cyenzedi cyende aci. Ngeela meeji ne muntu awu kavwa—kavwa ne meeji a kwenza bibi to. Ngeela meeji ne civwa ndipanga dya muntu awu uvwa kayi mumone cyanza cya Nzambi ckwata mudimu ne kayi mumanye Mifundu to, nenku ki bwa cinyi wakaya yèyè naaci anu mu dilukakaja dya lungenyi.

45 Nenku aci cidi ciibwîpì ne bya pa lukama makumi citeema bya lutatu ludiku leelu ewu elu, ndwa ne twêtù tudi tuteeta kufunyika mu ndongamu wa Nzambi, ngeelelu wetu twêtù wa meeji. Paabi kabyena bikengela twêtù kwela meeji to, nansha kakese. Yèyè ngudi wela meeji pa kaaba keetu. Twêtù tudi ne cya kulekelela ngeelelu wetu twêtù wa meeji ku diswa Dyende Yèyè. Nudi nuumvwa mpindyewu anyi?

46 Koola, mwikale ne meeji mîmpè, wakaya ne dilongesha dya mafi, wambila bânà beetu aba, ne ubaleeja ku dilukakaja dya lungenyi ne, Nzambi kavwa mubeneshe anu Mòsà nkaayende to, muprofeta, musanjeela awu, ne kavwa mumubeneshe anu yèyè nkaayende to, kadi ne: “Disangisha dijima divwa dya cijila,” mwakambaye, “ne mpindyewu disangisha dijima didi ne bukenji bwa kwenza *cikampanda*, ne disangisha dijima didi ne bukenji bwa kwenza *cikansanga*.” Ne pa nanku kwangatabo bantu bîmpè, beena Lewi. Mpindyewu, aci’s ndisungula dya Nzambi, badi bafwanyine kubiikidiibwa leelu ewu ne, “bambi,” Lewi uvwa mwambi wa mu ntempelo. Mòsà kaakabatandishaku bwa bwalu abu anyi? Nenku, mwab’ewu, kaakabyenzaku kayi ne kan- . . .kayi ne kaneemu to. Wakabambila bwa kwangatabo mbabula, ne kwelamu mudilu wa cijila, ne kumyaminapu musenga wa kamonya, ne kukùpa musenga wa kamonya wa cijila awu, civwà ciikale dîyì dituma dya Nzambi. Nenku kujuukabo bwa kwenza kasumbu kaa bantu bwa kukontonona ekeleeziya, paabi Nzambi uvwa mutume dîyì bwa muntu umwe kucyenzaye.

47 Nenku, paakenzabo aci, Mòsà wakapona mutwe mpala panshi bwalu ùvwa mumanye ne Nzambi uvwa mumutume yèyè bwa mudimu awu. Ki Nzambi kwamba ne: “Bămbilè balwe ne mbabula ayi kumpala kwa ntenta wa kusambakeena eku.” Ne paakabangabo kukùpa mbabula yabo ayi myûle tente ne mudilu, ne musenga wa kamonya munkaci mwa kwoshika, Nzambi kwambila Mòsà ne lona ne: “Tapulukaayi naabo! Patukaayi munkaci mwabo amu!” Bwalu, pashiishe Yèyè wakababiikila muvwabo “bangènzâmpèkââtù, beena bupidya.”

48 Nenku mpekaatu mbupidya ku Dîyì dya Nzambi. Wèwè udi wiba mbwalu kwèna mwitabuuje to. Udi ushima mbwalu kwèna mwitabuuje to. Udi wenda masandi mbwalu kwèna mwitabuuje to. Bu wèwè mwikale mwena kwitabuuja, kuvwa mwa kwenza bintu abi to. Kudi mizabi anu ibidi, anyi ndiitabuuja anyi mbupidya, udi ukontononyiibwa kudi cimwe anyi ckwabo.

49 Mpindyewu, Nzambi, ku cibangidilu, ùwva Dìyì, ne Wakavwijiibwa mubidi ne wàkasòmbela munkaci mwetu. Yêyè uvwa Dìyì, Yêyè udi Dìyì! Ne padi Nzambi ùsòmbela munda mwebe, n'Dìyì dya Nzambi disòmbèle munda mwebe, ki paudi mwa kutwa “Amen” ku cyònsò cidiYe wamba. Awu n’Nzambi musòmbèle munda mwebe.

50 Mpindyewu bu nwènù mwa kumona, bantu aba, bavwa kabayi ne civwabu benze, ne mbabula mu byanza byabo, mudilu wa cijila mu byanza byabo, Nzambi wakakangula buloba ne bwakabamina ndwìng, ne wakabatapulula ne Mòsà bwalu Mòsà wakatapuluka yêyè mwine naabo. Nenu Mòsà ukaavwa mudimwije disangisha ne: “Kanukutakanyi ne musùmbà wa mushindu wawa to. Ikalaayi naabo ntanta!” Mpindyewu, nudi bamanye Mifundu ayi, nubalaayi nshapita wa 16, wa 17, wa 18 mene, nenku nenuciasangane. “Tapulukaayi ne bangènzàmpèkààtù aba, bangènzàmpèkààtù badi kabayi biitabuuja aba. Patukaayi munkaci mwabo, bwalu mbatangile ku kabutu, ne bintu byònsò bidibo naabi.” Nenu mbenze anu . . . ki buloba kuumabu anu ncyong kadi kutukina ne bantu abu biikale bakwate mudilu wa cijila awu. Bantu kabayi benze bwalu to baseeswishibwe kudi muntu.

51 Bya mwomumwe leelu ewu! Kudi bantu bààbùngì kabayi benze bwalu to biikale bapona mu buteyi bwa bilele, mukwate Dìyì dya Cijila mu cyanza, kadi pèndè bu ne ku Dyôdì ki kudiye uyiishila. Ngãmònu dibinduluka dijuuka pa mpala paa mwambi kampanda anu pa dībà adi, mwambi wa ba-Méthodistes, ùwva mwambi wa ba-Méthodistes too ne diloolo dya mu dyalumingu dishaale edi. Kadi pātàngidiyè, ngeela meeji ne cidi ne mushinga wàbùngì kùdì, wèwè mwaneetu wa balume, kwikala mupatuke.

52 Mpindyewu, nwamonu’s, bakwate mbabula, mudilu munkaci mwa kwòshà dipembu dîmpè kumpala kwa Nzambi, ne byanza abi bikwate cyòcì aci, kadi kubutukabo ne mbabula ayi mu byanza, bwalu bavwa bateeta kwenza cintu kampanda ne meeji matooke, kadi, bibengangane ne Dìyì dya Nzambi, bateeta kwenza bulongolodi kampanda. Bamba ne: “Wèwè wadimonu peebe be. Wèwè udi nganyi bwa kwamba peebe mùdì ne Dìyì dyònsò dya Nzambi?”

53 Baakapanga kumona ne Mòsà nguvwa mu—musanjeela wa diine dībà adi. Nwamonu’s, yêyè nguvwa ne EMU MMUDI MUKALENGE WAMBA. Kakuvwaku muntu nansha umwe pa buloba bu yêyè to. Yêyè nguvwa ne Mukenji, kadi bantu baakapanga kuWumona. Ne Mòsà uvwa menemene ne EMU MMUDI MUKALENGE WAMBA. Cya bushuwa. Eyo.

54 Mpindyewu tudi tusangana cintu cimwecimwe aci leelu ewu, bantu bîmpè, bantu banene, bantu baa mushinga mukole bateeta kuyiishila Dìyì dya Nzambi (mu byanza byabo) ku bilele kampanda bya bikwatakaja kudi bantu. Baakosela *apa*,

baakosela lwà kwinsi *eku*, ne bacyenza *eci*, ne “ulwe kushaala wa mu ekeleeziya ewu ne ushintulule buumambala bwebe,” kadi mwikale ufwa mu nyuma ne Dîyì adi mu cyanza’s! Nwamonu anyi?

55 Kabavwa mwa kwitabuuja musanjeela wa Nzambi anyi Mukenji Wende wa dituku adi to. Kabavwa mwa kuumvwa bwa cinyi Nzambi munene kavwaku mufwanyine kukwata mudimu ne musumbà mujima wa bantu, kadi uciteeka anu pa muntu umwepele to.

56 Mbûngì kaayi bwa baa kudibo bândi mwambile leelu ewu: “Netwënzè cinyi, Mwaneetu Branham? Tudi bamanye ne udi mubinge, kadi netwënzè cinyi? Bulongolodi’s nebùtwipâtè, twètù bafwanyine kupanga mwaba mukwabo wa kuya.” Ndi mbumvwila luse be; kadi’s kudi Mwaba. Nudi nwamba ne: “Ee, s’tudi bafwanyine kufwa ne nzala.”

57 Davidi wakamba ne: “Kacya anu pâncivwà mwânà, ne mpindyewu ûnkaadi mukulakaje ewu, nцитuku mwanji kumona muntu mwakane mulekelela, anyi ndelanganyi yende yenda yilombangana dyampà dya kaa pa luse to.”

58 Mpa bishimikidi anu byôbì bimwebimwe abi menemene paakabengelabo Yesu. Bavwa batambe kwikala badifile ku dingumba dyabo, ne baakwidi baa cijila ne bitanda bya cijila, ne ekeleeziya ya cijila ne ntempelu ya cijila, mu mushindu wa ne baakapanga kumona Nzambi mu ntempelu Wende wa buntu. “Wêwè ewu, mwikale muntu, udivwija Nzambi.” Nwamonu’s, bavwa batambe kwikala badifileku be! Bantu aba bavwa batambe kwikala badifile ku bya ne Daatana ne bakwabo abu bavwa mu bulelela. Nimeloode uvwa mutambe kwikala mudifile ku bya ne ùvwa mwa kukumbaja cintu kampanda civwa cifwanyine kuya ne bantu kuulu kwa cijji cikole cya Nzambi. Adama uvwa mutwishibwe ne bu yêyè mwa kubwikila butaka bwende abu Nzambi kavwa mwa kubumona to. Kwèna mwa kububwikila to, bikengela Nzambi abubwikile. Nwamonu anyi? Nwamonu anyi? Ndongamu wa Nzambi ngudi ububwikila, kî ngwebe wêwè awu to. Bitu misangu yônsò anu mushindu awu, badi bapangila kumona Yesu mu ntempelu Wende, Nzambi mumweneshibwe mu mubidi.

59 Leelu ewu bidi bimfikisha ku didyumvwa bibi pândi mmona ne Mèyì a mu Bible mmatambe kusunsuludiibwa tutupa tutupa kudi bilele. Ne bantu baa mwoyi wa meeji matooke bàdi bìimanà kwaka ne bumvwa Dîyì adi, ne bamanya ne m’Bulelela, kadi kabayiku mwa kudidinga kunyunga to, bwalu bilele byabo bidi bibalongesha bishiilangane. Dìbà adi, sukulaayi tunyingu ne ngeesu, bânà beetu, nuye kumpala. Kadi bwetu twètù, ne bwanyi mèmè ne baa mu nzubu mwanyi, tudi twangata Kilisto, Dîyì. Nwamonu anyi?

⁶⁰ Twǎnjì twangataayi Yone 3 bwa katanci kakese cyanaana, Nikodeme, mulongeshi ne mulombodi wa dingumba dinene divwabo babiikila ne Tubadi twa beena Yuda awu. Bakaavwa badisangishe pamwe, ne bakwatakaje bilele byabo. Di—dimwe dya Bafaalesa ne dimwe dya Basadoka, ne bavwa ne dyabo dingumba mwine musangu awu, tuumaalu twabo tùvwà tùbàtâpùlulunganà atu, ne pa nanku bôbò . . . Muntu ewu uvwa mulongeshi munene, mulombodi wa Tubadi tunene twa beena Yuda etu, muntu mulenga wa dikema mu dilongesha. Ûvwa mumanye Mifundu, muvwaye udyambidila. Ûvwa mubimanyine ku bilele byabo abi. Yesu kaakambaku ne: “Nwênù, ku bilele byenu, nudi bavwije Méyì matuma a Nzambi kaàciyi ne bwenzeji” anyi?

⁶¹ Nwamonu’s, bwa bilele byabo abi! Ncinyi ciine aci? Beela didyumvwijila dyabo bôbò ku Diyì, pamutu paa kuDilekelabo cyanaana, cidi Dyôdi adi dyamba aci. Badi bamba ne kadyena dyumvwija *cikampanda* to. Nukaavwaku bamone’s, ndyôdi diyì dimwedimwe adi divwa dyabulu mukwate naadi mudimu kudi Eva, bwa kutwadija bulongolodi bwa kumpala, nwamonu’s. “Ncya bushuwa ne ncifwanyine kwikala mushindu *kampanda*. Nzambi kî mmufwanyineku kwenza aci to, udi mumanye’s.” Nwamonu’s, ncintu anu cimwecimwe aci. Ncintu cyôci anu cimwecimwe aci lelu ewu.

⁶² Mpindyewu tudi tumona ne, mulombodi ewu wakalwa kudi Yesu. Cintu cya kumpala, mpindyewu, yêyè wakalwa bwa kukeba Mwoyi wa Cyendelele, wakalwa bwa kukeba lupandu. Paabi, muntu wa milongo yende ayi, mulongeshi munene mu Izaleela, kadi mulongeshi munene mu Izaleela ulwa kudi Muntu kampanda ututu katuyiku bumvwe bujaadiki ne ùvwakù mu kalaasa dituku nansha dimwe. Muntu mukulumpe mushindame, mwakwidi wa kale, mwena meeji, ùlwa kudi Nsongaalume wa citende. Bantu balela baa cipidi citumbuke muvwabo amu, muntu mubanzi ulwa kudi Mulombyanganyi wa kaa pa luse uvwa kayi ne mwaba wa kuteekaYe mutu, bwa kuMukonka njila udi ufila ku lupandu ne Mwoyi. Cyakumpala, bôbò beena Tubadi twa beena Yuda abu, mwakajikula Nikodeme, bavwa bamone cintu kampanda mu Yesu civwa bantu bakwabo baa mu bulongolodi bwabo abu kabayi naaci to. Baakamona ne kuvwa cintu kampanda mu Yêyè, bwalu yêyè wakamba ne: “Laabi, twètù tudi bamanye ne Wêwè . . .” “Twètù,” eyowa’s, bôbò kabavwaku bafwanyine kucijikula to, bwalu bavwa bafwanyine kwipaciibwa. Nwamonu anyi? “Twètù tudi bamanye ne Wêwè udi Mulongeshi mufumine kudi Nzambi, bwalu muntu nansha umwe kî mmufwanyine kwenza bintu byûdi Wêwè wenza ebi Nzambi kayi nende to. Tudi bamanye aci!” Kaa, ekelekele! Bulongolodi’s!

⁶³ Mpindyewu, tudi tumona ne Yesu uvwa dimweneshiibwa dya Nzambi. Mpindyewu: “Muntu nansha umwe kèna mwa kwenza

bintu ebi Nzambi kayi nende to.” Bavwa bamanye ne kuvwa cintu kampanda cishiilangane mu Muntu awu. Yèyè ki uvwa Bukênkè bwa dituku adi. Yèyè uvwa Ntemu wa Nzambi.

⁶⁴ Ki mwakamona pende Koola cintu cimwecimwe aci mu Mòsà. Kabavwa ne muntu mu dyôdi dituku adi bu Mòsà to. Yèyè ki uvwa ntemu wa Bunzambi wa Nzambi, wa dituku adi, bwa bukole bwa Nzambi. Koola ne musumbà wende baakacimona mu Mòsà. Baakumvwa ne kacivwa mwa kwikala Mòsà to; Mòsà kavwa mwa kukangula Mbû Mukunze to, Mòsà kavwa mwa kutuma bipupu pa buloba to. Civwa n’Nzambi mu Mòsà, ne, bwalu Nzambi uvwa muDileeje Yèyè mwine nu ntemu kampanda anyi bukênkè kampanda bwa dituku adi, bôbô baakapanga kuCimona. Koola wakaswa bwa kwenza musumbà mujima wa bantu, ùbwejamù cintu cyônsò naka.

⁶⁵ Ki bulenga paabu bwa bulongolodi mbwôbù abu, kubwejamu lukutukutu lwônsò lùdiku alu, kadi kulubiikila ne “mbwena Kilisto.” Kutuma mwânà wa balume mu tulaasa udi kayi mumanye kantu nansha kamwe pa maalu a Nzambi kutamba mudi Hottentot mufwanyine kumanya mwanu wa beena Ejipitu wa mafuku cinunu ne bumwe, kumutumamu kadi kumupa dilonga ne kumulongesha bintu bya mu meeji, ne kumupa dipolome dya Ph.D., ne dipolome dya bu docteur anyi dya licencié, anyi cintu kampanda cya bu nanku. Kadi kumutuma bwa kayiishaye Evanjeeliyo, mwine awu kacya kayiku nansha musungidiibwe to, wíkala mwa kuvila dilediibwa dya kudi virgo ne dibiika dya ku lufu, ùvila dyondopa dya kudi Nzambi, ùvila Bukole bwa Nzambi, ùvila ne mêyì makulu miine akafwila Yesu, ùvila wamba ne Maako 16 kî mmusonsodiibwe, ùvila cya ne “bimanyinu ebi nebifile badi biitabuuja” piine apu Yesu mudyâmbidile Yèyè mwine Mêyì awu, ùvila Byenzedi 2.38, ùvila Mifundu mikwabo yônsò yidi misonsodiibwe eyi. Kadi kuteeta kwangata cilele kampanda cya bantu cidibo kabayi bamanye kantu nansha kamwe to, kadi kwenza ukaadi anu ucyamba ucyambulula. Kadi paudi ubambila Bulelela ne ubaleeja Bulelela, badi bumvwa bundu bwa kwenza cyenzedi, bwa bulongolodi bwabo abu.

⁶⁶ Koola wakenza cintu cimwecimwe aci. Wakamona Nzambi mu Mòsà. Wakamona ne civwa n’Cyamu cya mudimu cya Nzambi cikwàcila mudimu mu yèyè. Ne Nikodeme wakamona Nzambi mu Kilisto ne: “Muntu nansha umwe kèna mwa kwenza bintu ebi Nzambi kayi nende to.” Nikodeme ukaavwa mu bulongolodi, uteeta bwa kumùpatuka. Koola yèyè uvwa pambelu, uteeta kwenza bulongolodi bwa kubwelamu. Ki dishiilangana òvwàku ndyôdi adi. Nikodeme uvwa uteeta bwa kupeta lupandu, kupatuka mu cintakanyi aci; yèyè ukaavwamu kacya ku bwânà bwende, cikaavwa cimutonde. Ùkaavwa yèyè ukeba bwa kusungidiibwa. Kadi Koola uvwa uteeta kudyenzela kaa—kaaba kavwaye mwa kwikala muntu wa mushinga munene.

⁶⁷ Ki mushindu udi bantu leelu ewu ngwôwò awu. Ki lutatu ludiku ne bwena Kilisto ndwôlò alu, tudi bapete mishindu ya ditentula dya mafi bûngì cyanaana. Ne beena Mpenta beetu aba, nwamfwilaayiku luse bwa cyakwidi aci, baatatakanyi naabi, difwanyikija dya mu musunya's! Nzambi ajuule anu muntu ne amupeeshe cintu kampanda, muntu yônsò mu ditunga neateete bwa kutentula muntu awu. Kanwenaayiku nujingulula ne nudi munkaci mwa kushipa kasumbu keenu nwênù biine anyi? Panudi nunaya ndundu... "Nenku ngâsà," muvwa Pôlò mufwanyine kwikala muciteeke, "tunyeemaayi lubilu elu ne lutuulu." Muntu udi ne ndundu awu, kanumunyengiye mu byanza byende amu to, kebaayi bwa kumucyûnga yêyê. Kadi pamutu paa cyôci aci, anu bwalu kî ngwa mu bulongolodi bwenu nwênù to, nudi nukeba bwa kumunyengaye. Muntu kampanda wa luteetükù lutùüle lupùwe awu, kàyiku mwa, mufwanyine kulendukila pa bilôngò bya mu tapis, kadi pashiishe ùkeba bwa kukunyengaYe. S'ncya bushuwa. Mpindyewu, mu ngaakwilu wa nyuma, mmündi muswe kwamba amu. Mfwilaayiku luse, mêmè... Ee, yêyê nealendukile pa kantu kakese bu mudi kaa Byenzedi 2.38, s'neadishinde cya bushuwa. Piikalaye ulendukila pa Maako 16, mmunyi mwangulaye mpasu? Nwamonu anyi? Huh. Maleesona manene menemene a Kilisto. Ne cintu mene cyâkakòkangeenâbo ku Nsangilu wa ku Nicée aci, ki cicidadibo anu balendukilapu paanyima paa bidimu byônsò ebi.

⁶⁸ Bateeta's, Koola uvwa uteeta bwa kwenza bulongolodi, bwa kumùbwelaye. Kadi Nikodeme ukaavwamu yêyê, ukeba bwa kumùpatuka. Nikodeme wakiitabiibwa, ne wakapatuka. Koola yêyê wakabutukilamu, mu didyenzeja dyende adi, wakabutukila mu didyenzeja dyende yêyê mwine. Kaa, ekelekele!

⁶⁹ Mu bulongolodi buvwa Nikodeme usanganyiibwa abu, bavwa bamanye ne Kilisto uvwa mutumiibwe kudi Nzambi, mwakambaye. Nikodeme, mu nshapita mwi3 emu, udi ucjikula ne: "Laabi, twêtù tudi bamanye ne Wêwè udi Mulongeshi mutuma kudi Nzambi, bwalu muntu nansha umwe kêna mwa kwenza bishima byûdì Wêwè wenza ebi Nzambi kayi nende to." Kadi musumbâ umweumwe awu, bwa bulongolodi bwabo, baakaMubiikila ne "Beelezebula," bwa bukole Bwende bwa diipata naabo badémoms abu, ne baakamba ne: "Yêyê udi useeswisha bantu beetu ku Dilongesha Dyende." Ncintu anu cyôci cimwecimwe aci leelu wa Ndaaya ewu. Úseeswisha cinyi?

⁷⁰ Yesu wakamba ne: "Mêmè Ndi ngenza anu cidi cisankisha Taatù, Ndi ndama anu Mèyi a Nzambi," bwalu Yêyê uvwa Dîyi. Kavwa mwa kwenza cîngà cintu nansha cimwe to anu Dîyi.

⁷¹ Kadi, anu bwa bulongolodi bwabo abu, anu bwa njila wabo awu, bavwa baswike bantu. Munda mwa myoyi yabo bavwa bacimanye, kadi bulongolodi bwabo abu kabuvwa bufwanyine kubalekela bacilama to. Pashiishe, bwa kusebela njila wa

difinukila, bwa kulama bantu bwa kabiikadi baalwa kuumuka mu bulongolodi (“bantu bônso nyawu baMulonda”), bwa kulama bantu bwa kabiikadi baalwa kuumuka mu bulongolodi ne kulonda Bulelela bwa Nzambi (bwalu Yêyè uvwa Bulelela “Mêmè Ndi Bulelela, Bukênke”), bwa kubalama bwa kabiikadi baalwa kulonda Aci, baakamba ne Yêyè uvwa useeswisha bantu. Anji elaayi peenu meeji ku aci! Muntu wetu ewu, uvwa munda mwa mwoyi wende mumanye ne Yêyè awu uvwa Nzambi, ne Nzambi uvwa munda Mwende (“muntu nansha umwe kèna mwa kwamba maalu aa, anyi kwenza bintu ebi, Nzambi kayi nende to”), mumanye aci ne ùcjàmba ne ùcìjìkula, kadi pashiishe ùkùdimuka kadi kuMubiikila ne “Beelezebula, ne museeswishi wa bantu,” bantu baabo bôbò’s, “ku Dilongesha Dyende.” Kaa, ekelekele!

⁷² Bwa Nikodeme yêyè kaayi uvwa mumanye ne Úvwa Muprofeta. Mpindyewu, awu nguvwa umwepele mu bulongolodi abu uvwa munange Nzambi mu mushindu mukumbane ne uciina Nzambi mu mushindu mukumbane, ne wâkajingulula ku Dipungila Dikulukulu ne Muntu ewu uvwa ne ngiikadilu yônso yivwa yikengediibwa ne uvwa mujaadikiibwe ne mushindikiibwe, Muprofeta mutuma kudi Nzambi. Muntu awu, mêmè nêmmutwè musinga nansha piikalabi mene ne wakalwa ciibufuku, wakafiika kuntwaku. Yêyè udi bîmpè bikole kutamba ciibûngì cya balongeshi beetu leelu ewu, bôbò kabaakulwaku to nansha bya kumona lufu. Nikodeme ndekeelu wa byônso wakafika anu ku kufika. Pa nanku, kumupiishiku to, pawikala wêwè kuyi mwanji kufika. Nikodeme wakamanyaku ne Yêyè uvwa Muprofeta, pa nanku yêyè wakaciinaku Nzambi. Kavwaku mufwanyine kulekela Muntu awu uya kule nende to, Bukênkè bwa dituku adi abu. Nansha muvwaCi cibengangane bikole amu, nansha muvwa bulongolodi bwende bwamba ne Civwa cibengangane amu, yêyè wakamona Nzambi ushindika Muntu awu ne wakamanya ne Yêyè uvwa Muprofeta. Nenku piikalabi ne Yêyè uvwa Muprofeta, Dîyì dya Mukalenge ditu dilwa kudi muprofeta, ne Yêyè uvwa mumanye civwaYe wamba. Nwamonu anyi? Pa nanku wakaya kudi Yesu, muswe kumanya mushindu kaayi wa kupeta lupandu. Piikalabi ne Muntu ewu uvwa Muprofeta, Dîyì dya Nzambi’s divwa kudiYe, ne Yêyè nguvwa mufwanyine kumanya njila wa lupandu awu.

⁷³ Kadi civwa cikengela Nikodeme kuyiilaye aci’s ncidi cikengela bantu bààbûngì leelu wa Ndaaya ewu, baa mu mangumba a dituku edi aa, bwa kuyiilabo. Civwa cikengela bwa Nikodeme kwikalaye mumanye aci, s’ki civwa cikengela bwa bantu leelu ewu kwikalabo bamanye, baa mu mangumba aa abu. Yêyè uvwa mutambe ne Muprofeta. Yêyè wakalwa kudiYe bwa kujandula, kuMwambila bwa amwambile ne njila kaayi uvwa ufila ku Mwoyi, kadi Yesu Yêyè mwine nguvwa Mwoyi. Ewu udi ne Mwànà udi ne Mwoyi. Nanku yêyè kavwa mulwe, kavwaku

ne cya kulwa bwa kuteeta bwa kuyiila dilongesha kampanda to, uvwa ne cya kwikala mulwe bwa kwitaba Mupersona awu. Ki cyôci aci diloolo edi! Dibwe Dinene dya mu ditumba ndiimanshiibwe cyakabidi. Dibwe Dinene dya mu ditumba ncinyi? N’Dîyi, mu bushuwa bwa bwalu. Kilisto, Yêyè udi Dîyi.

⁷⁴ Byakakengela bwa kuyiilaye cintu kampanda. Yêyè kudyambidila ne: “Ee, mpindyewu, Muntu ewu’s m’Muprofeta, Yêyè udi anu Muprofeta patupu.”

⁷⁵ Pa nanku, nudi bamone ne, Yesu kaakandamunaku ku lukonko lwende alu to, Wakamudyula anu bwa bufofo bwende. Mutambe ne Muprofeta, Yêyè uvwa Dîyi ne Bukênkè bwa Dîyi bùdi bùteemà! Úvwa Nzambi mwikale uteemena mu cyamu cya mudimu, ujaadika ne civwa n’Nzambi mu Muntu awu. Yêyè uvwa Dîyi. Yone wa Kumpala, nshapita 1 . . . to, Yone Munsantu, nshapita 1, udi wamba ne: “Ku cibangidilu kwakadi Dîyi, ne Dîyi dyakadi ne Nzambi, ne Dîyi dyakadi Nzambi. Ne Dîyi dyakavwijiibwa mubidi, ne dyàkasombela munkaci mwetu.” Nenku ki Dîyi dya Nzambi ndyôdi edi diikale diteemà mu mubidi ewu mukese wa kalendalenda wa Muntu, ki kufomijaDi bulongolodi abu. Kadi Yêyè uvwa mulwe mbwa kupeta bantu nkaaya. Mutambe ne Muprofeta, Yêyè uvwa Dîyi! Yêyè udi Mwoyi. Kabiyi . . . Kabivwa bikengela bwa Yêyè kukulongesha pa bidi bitangila Mwoyi kampanda ùcivwavwà to, Úvwa Yêyè mwine Mwoyi awu! Yêyè uvwa Mwoyi. Yêyè uvwa Bukênkè. Yêyè uvwa Mwoyi. Yêyè uvwa Mwoyi wa Cyendelele, uvwa munda Mwende, ne anu Yêyè nkaayende ki Mufidi wa Mwoyi wa Cyendelele. “Ewu udi ne Mwânà udi ne Mwoyi.” Pa nanku udi ne . . . kwêna mwa kwikala anu ne dilongesha Dyende mu Dîyi to, bikengela wikale Nende Yêyè.

⁷⁶ Wêwè udi wamba ne: “Kaa, bantu’s batu bàsòmba bàlonga Bible awu ne myaku yònsò ya cyena Ngelika ayi, ne bidi dyumvwija dyayi, bimanyinu bya mu difunda, ne bikwabo.” Kadi’s kabayi bamanya pa bidi bitangila Nzambi kutamba dipanga kumanya diine to! Nwamonu anyi? To! Ewu udi ne—ewu udi ne mmwe—mmwe—mmwenekelu awu, ewu udi ne ndongolwelu awu anyi? Ng’ewu udi ne Mwânà, udi Nende Yêyè awu, Mupersona awu. Yêyè awu Ngudi ne Mwoyi.

⁷⁷ Nikodeme uvwa mumanye ne Yêyè uvwa mumanye pa bidi bitangila Mwoyi, kadi kavwaku mumanye ne Yêyè ki uvwa Mwoyi wa Cyendelele to. Ki cyôci aci, civwà Muntu uvwaye wakula nende awu ncyôci aci, Musanjeela, Bukênkè bwa dituku adi, Bukênkè bwa baa pa buloba. “Bukênkè buidi buteema mu mîdimà, kadi mîdimà kayaakaBuumvwa to. Wakatumiibwa kudi Bende Yêyè mwine kadi Bende Yêyè mwine kabaakaMwakidila to.” Bwa cinyi? Bwa cinyi? Bwalu bakaavwa batambe kudyenza bulongolodi, beele ne miji mu disukula dya tunyingu ne ngeesu,

ne bilele, mu mushindu wa ne baakapanga mwa kumona Diyì divwijiibwe mubidi.

⁷⁸ Ncyenzeke cyakabidi. Ncyenzeke kadi kwenzeka kabidi. Maalu malonda atu enzekezeke cyakabidi misangu yàbûngì. Eyowa's, wakamanya ne Yêyè uvwa ne—Yêyè uvwa mumanye pa bidi bitangila Mwoyi, kadi Nikodeme kavwa mumanye ne Yêyè ki uvwa Mwoyi to. Ki cyôci aci lelu ewu. Bantu bààbûngì menemene batu bateeta kuvwija Yesu, kaa, Mulongeshi munene kampana, badi mene bateeta kwamba ne Yêyè uvwa Muprofeta. Kadi paukaadi uteeta kwamba ne Yêyè uvwa Nzambi, aci kaayi wanekeshi. Nwamonu anyi? Kadi's Yêyè uvwa Nzambi, ne Yêyè's udi Nzambi, ne misangu yônsò Yêyè neikale anu Nzambi. Ki cyônsò cìdiku. Ncyà bushuwa. Ncyôci aci

⁷⁹ Monaayi, Yêyè kaakambilaku Nikodeme, mpindyewu, pakalwaye kudiYe apu, Yêyè kaakambaku ne: "Mpindyewu, Nikodeme, Mêmè ndi ne kaneemu kààbûngì bwebe wêwè, bu mùdi mu—mu—mulongeshi munene mu Izaleela. Nénkwambilè cidi bwalu, wêwè udi wenda ukeba Mwoyi wa Cyendelele, pàmwăpa bivwa bikengela bwa wêwè kupelulaku dimanya dyebe ditwe adi. Kwêna ushindumuna myaku yebe mu yôyi to." Lukutukutu naanyi we. Anyi ne: "Pàmwăpa ne bivwa bikengela wêwè kukebaku mwânzu mubândile mu dingumba dyenu amu, bwa kupeta Mwoyi wa Cyendelele."

⁸⁰ Ki cikaadi bantu bapitepite bûngì bateete kwenza lelu wa Ndaaya ewu, uh-huh, mwânzu mubândile, mbaswe kuumuka ku bu—bumpaasata kuya kashaala mukulu mutangidi wa ditunga dijima, anyi—anyi ku bwepiskopo anyi cintu kampana cya bu nanku awu. Aci kaciyena ne dipetangana ne Nzambi nansha dya kânà to.

⁸¹ Tangilaayaaku cyakenzaYe kumpala kwa muntu bu yêyè awu. Wakamudyula bwa dipanga kumanya dyende dya dîbà divwaye ne mwoyi ne: "Wêwè udi uswa kuNgambila mùdi mulongeshi munene mu Izaleela kadi kuyi mwa kuumvwa maalu aa, padibi ne," mwakambaYe, "bikengela bwa muntu alediibwe cyakabidi anyi?"

⁸² "Mona's," mwakambaye, "mêmè muntu mukulumpe mùndi emu, nkabwele munda mwa maamù wanyi anyi?"

⁸³ Yêyè ne: "Wêwè mwine wa bwalu mwikale mwepiskopo, kardinale, mukulu mutangidi wa ditunga dijima mu ekeleeziya wa beena Mpenta," anyi muntu kampana mukwabo's, "muntu munene kampana mu bulongolodi, kadi kuyi mumanye Mifundu?"

"Kaa, twètù's tudi ne Mòsà."

⁸⁴ "Bu nwênù bamanye Mòsà, s'nuvwa' kwikala bammanyè Mêmè, bwalu yêyè awu ki wâkaakula bwa bwalu Bwanyi." Nwamonu anyi? Kadi kabiyi bilondeshile bilele byabo,

bulongolodi bwabo—bwabo to, aci’s civwa cishiilangane. Kadi Mòsà wakaakula bwa bwalu Bwende cya bushuwa, ne Yèyè ki uvwa Mwena bwalu bwakaakula Mòsà abu, kadi nansha nanku kabavwa anu bacimanye to. Bwa cinyi? Bakaavwa batambe kuswikakana ne bilele, mu mushindu wa kabayi bacimanya to.

⁸⁵ Nenu nwênù bânà beetu bàdi bàbalà, bàdi bàngatà mukaba wa mēyì ewu, mpindyewu kuwukangiku to. Indila kakese, twānji tutangilebi bwalu ebu anu cimònààmēèsù. Ndi mukunange, wēwè udi mulami wa mikooko. Ne mēmè ncyēna nkeba bwa kwikala cimanya-byōnsò to. Piikalabi ne ndi mfila mmwenekelu awu, apu kaayi wimanyike mukaba wa mēyì awu unsambidileku. Ndi nteeta anu bwa kukutwadila cintu kampanda cidi Cilelela. Kulekediku cikupicila ku luseke to.

⁸⁶ Mpindyewu, mēmè ntu nneemeka bulongame bwa bantu, ne bikwabo, kadi panudi nwenza malongolodi aa . . . Tangilaayi Bafaalesa, kabavwa bafwanyine kwikala ne cintu kampanda cya cipetangana ne Baasadoka to, bwalu Baasadoka kabavwa biitabuuja ku nî—nî mmwanjelo anyi—anyi nyuma, anyi dibiika dya ku lufu, anyi nî ncinyi cyōnsò to, kadi Bafaalesa bōbō bavwa ne byōnsò bibidi abi, nenu bavwa ne mvita pankaci paabo aba ne aba. Mpindyewu ba-Unitaires badi biitabuuja cintu kampanda, ba-Trinitaires biitabuuja cikwabo, ne ba-Méthodistes cikwabo, ne ba-Presbytériens cikwabo, ki nwênù kwelelanga tuumikalu. Kadi cinwapeci ncinyi? Ditapuluka dya bwânà bwetu. Byôbì biine, netusangane mwaba awu mu Bible emu mu katanci kakese emu, cidìci ciikalangana, ne cidi Nzambi wamba ne ncinyi.

⁸⁷ Mpindyewu, to, Yèyè kaakamwambilaku bwa kupelula dimanya dyende to. Yèyè uvwa anu umudyula bwa dipanga kumanya cintu cilelela. “Wēwè udi mulongeshi munene mu Izaleela, kadi kuyi mumanye maaluu aa? Piikalabi ne Ndi mukwambile bintu bya pa buloba, kadi kuyi mwa kubyumvwa to. . .” Elabi meeji! “Mulongeshi munene, mulongo wa kuulu mu ekeleeziya wa ba-Orthodoxes, mwepiskopo, kardinale, kadi kuyiku nansha mwa kuumvwa mmwenekelu wa bwânà wa bintu bya mu bufuki bîndî Mēmè nkwambila ebi, mmunyi muwikala mwa kuumvwa bintu bya nyuma bya ku Dyulu?”

⁸⁸ Kadi mulobi mukulakaji kampanda wa cinyonga uvwa kayi nansha mwa kufunda dînà dyende to, kuCyumvwaye yèyè, nwamonu’s, ne wakavwijibwa mutu wa ekeleeziya mu Yelusalema, Peetelo. Nwamonu anyi? Kaa: “Yōnsò udi Taatù muMpe awu, nealwe.” Nwamonu anyi? Yèyè awu udi uCimona. Udi uCiitabuuja. Udi wenza maaluu bilondeshile Cyôci aci, mumanye ne kakwena cyamukwata to.

⁸⁹ Anu bu mudi cidime. Kabyena byenza disanka bwa kwenza bilele to, kadi mbwa kufilaku cifwanyikijilu. Bavwa bamba ne cidime kampanda wakalaadisha nzoolo wa cikuka pa mayi, kadi

kabavwa ne mayi bûngì bukumbane to, wakamwelela diyi dya dibata. Paakatooyika kânà kaa dibata aku, kavwa kantu kaa mmwenekelu wa lukutukutu kavwaku tuzoolo atu katuyi twanji kumona kacya to. Kavwa ne kwîsu kuleepa kwenze lukutukutu, ne kôkò kavwa kenda kenza kwakà-kwakà pamutu paa kwenza cyokò-cyokò, ne—ne tuzoolo twônsò tuvwa tudya ne tuzokola mu lupangu lwa nzoolo amu. Kadi aci kacivwa cyakudya cyaku kôkò menemene to. Nenku dituku dikwabo cikuka cikole aci kuyaci naaku kumfundu kwa lupangu lwa nzoolo aku, bwa kuzokolaku ndambu wa tupasu, kadi dyamwamwa dya kakuna aku kuvwa di—dijiba. Nenku kwenzakabi ne cipeepele cituute cifumina ku dijiba adi, ki kôkò kuumvwa mupuuya wa mâyi. Awu's ki waku ngiikadilu. Cikuka cikole aci kwamba ne: “Cyokò, cyokò, cyokò, cyokò, alukila wê!”

⁹⁰ Kôkò kwambaku ne: “Kwakà, kwakà, kwakà,” buludi too ne ku mâyi aku. Bwa cinyi? Kavwa nkaadibata, kwine kwônsò aku. Nansha mwônsò muvwa cikuka cya nzoolo aci cyenza cyokò-cyokò amu, kôkò kavwa anu kaadibata.

⁹¹ Nenku ki mushindu awu udibi ne muntu udi mudyanjila kulongolwela Mwoyi wa Cyendelele. Padiye umona Bukênkè bwa Nzambi, kakwenaku mangumba bûngì bukumbane pa buloba apa adi mwa kumwalujamu ku cyokò-cyokò yawu ayi to. To. Bwa cinyi? Awu ki wende ngiikadilu. Yèyè mmufwanyine kwikala mudyadyadye naabo ntanta mule, ne udyangana ne bukooya bwabo ne maafètes abu awu, kadi padiye anu ukafika mu mwaba wa usangana cintu kampanda cya cishiilangane, udi umba ucimanya. “Mikooko Yanyi mmimanye Dìyi Dyanyi,” mwakamba Yesu, “bwa mwenyi kayaakumulondaku to.” Mmifwanyine kwikala yenda ilonda cintu kampanda cyenyi, kadi munda mwayi amu mudi cintu kampanda cya cishiilangane. Ididinge anu iteeleje Bulelela musangu umwepele cyanaana, kadi nuyitangile numone. “Bônsò badi Taatù muMpe nebalwe.”

⁹² Eyo, Wakamudyula bwa dipanga kumanya. “Wêwè udi mulongeshi munene mu Izaleela, kadi kuyi mumanye maaluu aa? Udi ne cya kulediibwa cyakabidi!” Mpindyewu, muntu wetu wa mu bufuki ewu, ndi muswe bwa . . . monaayi cintu kampanda kaaba aka: “Udi ne cya kulediibwa cyakabidi.”

⁹³ Mpindyewu, mwoyi wa mu bufuki ewu, patwikala ne mwoyi wa mu bufuki, bwa kwikala ne mwoyi mu mwoyi wa mu bufuki ewu, mu bintu bya mu bufuki, bikengela twikale ne dilediibwa dya mu bufuki. Kabeena anu bakupatula mu mucu kampanda mwaba kampanda, nwamonu's, bakuteeka pambelu mushindu kampanda to. Bakaadiku baciteeteete, kadi kacyakakumbana to. Bidi bikengela ciikale dilediibwa dya cya bushuwa, dilediibwa dya mu bufuki, bwa kukuvwija ne mwoyi mu mushindu wa ne udi mwa kwikala ne byumvwilu bitaanu, wenda, wakula, umona, ulabula, ulenga, ununkila,

umvwa, wendakana, ne bikwabo, bwalu pa dîbà adi udi muntu wetu wa maci ne meesu ewu, ne udi—udi mwa kwenza bintu byônsò ebi bwalu mbya mu mwoyi wa mu bufuki ewu.

⁹⁴ Nanku, mu dilediibwa bu nanku, misangu mikwabo tudi tushaala beena lungenyi baa dikema mu lungenyi lwa pa buloba anyi maalu a pa buloba, tushaala Bamfumu baa matunga ne—ne bamanyi banene baa mabàla, balongeshi baa byamu ne beena maalu a mamanya, ne bikwabo. Kadi nutu bamanye misangu yônsò ne, kacya anu ku cibangidilu mene, bânà baa Kaayina mbavwa ne meeji a mushindu awu; kî mbaa Sete to, aba bôbò bavwa bamunyi baa mikooko badipwekeshe. Kadi bânà baa Sete bavwa bantu baa difwana dya Nzambi. Kadi bânà baa Kaayina bavwa misangu yônsò anu baa meeji matwe, batumbuke bikole, beena maalu a mamanya, ne balongeshi bapiluluke ne bantu banene. Ncya bushuwa. Bible mmwambe nanku, nudi bamanye's, Yèyè ngudi ulongesha aci. Ne batendeleedi baa dipoko, kadi baakabutuka ku ndekeelu. Tudi tushaala beena lungenyi patuyaaya mu tulaasa, tukapeta mamanya matwe ngwengwengwe, ne bikwabo, tukashaala beena lungenyi baa dikema, beena meeji matwe, ne biikale mwa kwenza bintu ne kwamba maalu, ne misangu mikwabo kwikala ne ngaakwilu wa kapelu kutamba ne wa muntu kampana muujiibwe tente ne Nyuma. Yesu kaakambaku ne: “Bânà baa pa buloba ebu badi ne lungenyi kutamba bânà baa mu Bukalenge” anyi? Ncya bushuwa, bwalu bôbò, ku mamanya abo a mu mitu awu badi mwa—mwa kwakula ne kutamba kwikala ne meeji matwe ne kutamba kwikala ne ngaakwilu wa kapelu, ne kwangata Mifundu ne kuYikonyangaja bwa kuYambishisha maalu adiYi kayiyi yamba to.

⁹⁵ “Kaa, Dyôdi kî dyumvwija aci menemene to.” Padi muntu wamba aci, umuka mwaba udiye awu. Nzambi utu utabaleela Dîyî Dyende, nudi bamanye's, mudi Bible mwambe. N'Difundiibwe anu mushindu uvwaDi ne cya kwikala awu. Nwamonu anyi? Mpindyewu, n'Diteekiibwe mu mushindu wa kuseeswisha, anyi kufikisha mwena lungenyi ku dilendukilaPu. N'Dipeepele bikole, ki bwa cinyi bôbò abu badi balendukilaPu. Nwamonu anyi? Eyo.

⁹⁶ Lungenyi lwine lwônsò ne bintu bidibo mwa kukungwija ebi, nansha nanku, kadi's mbifumine ku... dilediibwa adi ndya panshi, pa buloba ebu. Ndifumine ku buloba, ne didi dibengangana ne Nyuma wa Nzambi. Dilediibwa dya kumpala, bwa kutuvwija ne mwoyi panwapa, didi dituvwija bantu baa cifwaka, bwa cyenzi cya mpekaatu cya mu budimi aci, cyàkenzà bwa muntu alwile pa buloba upicila kudi mukaji. Kadi muntu udi mulela kudi mukaji ngwa matuku makeke menemene, kadi muntu udi mulela kudi Kilisto ngwa Cyendelele. Yobo wakamba ne: “Muntu udi mulela kudi mukaji ngwa matuku makeke menemene ne mûle tente ne lutatu.” Monaayi, kadi

muntu udi mulela kudi Kilisto, bikengela ikale mulediibwe ku Dyulu. Mpindyewu, kadi muntu udi mulela ku buloba, udi ulwa mwena lungenyi ne udi mwa kufika ciibwîpî ne kwikala ne meeji matambe kutwa.

⁹⁷ Monaayi ne mmushindu kaayi uvwa dyabulu mudimuke, mmudingakajedingakaje mwakwidi ne mwakwidi yônsò ukààdi mulwe pa buloba. Ncikaadiye mwenze bulelela. Yèyè ukaadi mudingakajangane, mmutungunuke anu ne kudingakajangana. Eyo, ncikaadiye mwenzenze bushuwa. Yèyè uvwa wa meeji matwe, kadi kulwaye bwa kulwishangana ne mukole nende, dimwe dituku, Yèyè wàkamucimuna. Ne cintu cimwepele cidi cikengela twètù kwenza cidi anu kushaala baMweyemene, Yèyè ukaadi mumane kumucimuna. Nwamonu anyi?

⁹⁸ Kadi ndufumine panshi, ne lwôlò, lungenyi ludi muntu ukungwijangana naalu bwa kujaadika ne kuleeja bintu byônsò ebi ne mbwa cinyi bivwa bikengela bwa muntu kwenzaye *cikampanda* ne bikengela bwa muntu kwenzaye *cikansanga* elu, ludi lubengangana ne lwikale lukuna ne Nzambi (meeji a musunya awu's). Mifundu nyidi myambe nanku. Cya bushuwa. Nansha biikale ne meeji matwe bûngî bishi, s'badi anu mwa kubikonyangaja. Ndi njinga ne muntu andeejuku mwaba ukaadiku Nzambi kacya mwikale ne bulongolodi anyi mutumeku díyì bwa kubwenzabo, kayi ubupiishaku mu Bible emu. Nansha bôbò bateete bwa kwikala baa meeji matwe a mushindu kaayi, bidi anu bibengangane! Mushindu mwine udi lungenyi mwa kujuuka ne kukulakila mukana, ne kukufikisha ku didyumvwa mukese mushindu *ewu* pa kukwambila ciine aci, kadi ludi anu lubengangane ne Mifundu.

⁹⁹ Muntu kampanda kungambilaye ne: "Mwaneetu Branham, kudi cintu cimwepele cîndî mbengangana neebe." Yèyè ne: "Wèwè udi mwena Yesu Nkaayende."

Mêmè ne: "Kî ncîndî to. Mêmè ncitu wa mu bulongolodi nansha bumwe to."

¹⁰⁰ Mukulu mutangidi wa ditunga kampanda kutumaye bantu, dituku adi, wamba ne: "Muntu kampanda mmungambile ne wèwè utu mwena Yesu Nkaayende, Mwaneetu Branham."

Mêmè ne: "Aci ncibengangane. Aci ncya mafi."

¹⁰¹ Yèyè kwamba ne: "Mbangambile ne wèwè utu witabuuja dibanjijangana, ne bivwa bikengela bwa balume kushiyabo bakaji baabo ne kuyabo benda bakebangana ne..." Mpindyewu, nwamonu's, awu's adi anu mashimi a dyabulu. S'nudi bamanye aci.

¹⁰² Mêmè kwamba ne: "Mêmè ntu mbenga ngoosha ne munu mwîku bintu bya kabiyi bya mu Mifundu bu abi nanku! Ntu ngiitabuuja cijila ne bukezuke. Ntu ngiitabuuja ne mulume mmuswikiibwe kudi mukajende matuku ônsò adibo ne mwoyi."

Kabivwa bikengela bwa wêwè kumwangata kuyi mwanji kusambila dyambedi to.

¹⁰³ Nenku beena Yesu Nkaayende, cisumbu cya beena Yesu Nkaayende aci, ncyèna ne naabo cilumbu nansha cikese to, bôbò mbantu bîmpè anu mudi cisumbu kana cyônsò eci, bwanyi mêmè. Kadi badi babatiizangana bibi, badi babatiizangana bwa difukuludiibwa. Ndi mêmè ngiitabuuja ne tudi bafukuludiibwe ku Nyuma Mwîmpè, kî nku mâyi to. Mêmè ntu bushuwa nsòka Dîna dya Yesu Kilisto mu dibatiizangana, ne kakwena mûngà Mufundu mu Bible bwa kutwa nyama ku mikolo . . . bwa kucivwija cibengangane to. Kacya kakuvwaku muntu nansha umwe mu Bible uvwa mubatiijiibwe mu dîna dya “Taatù, Mwânà, Nyuma Mwîmpè” to. Ndi muswe bwa muntu kampanda alweku kundeeja mwaba anu umwepele cyanaana ukaadiku muntu mubatiijiibwe mu mushindu awu. Dîbà adi, piikalaci kaciyi cya mu Mifundu to, lekelaayi kucyenza’s!

Wêwè udi wamba ne: “Kabyena ne cidibi bishintulula to.”

¹⁰⁴ Bwa Pôlò Civwa cishintulula. Yêyè wakabatumina dîyi bwa kubatiijiibwabo cyakabidi, mu Dîna dya Yesu Kilisto, ne pashiishe kupeta Nyuma Mwîmpè. Ki Pôlò kwambaye ne: “Mwanjelo wa mu Dyulu,” Ngalatiya 1.8, “yêyè mulwe, mulongeshe evanjeeliyo mukwabo nansha bamwamba ne ngwa bishi,” mushiilangane ne ukaavwaye yêyè mulongeshe awu, “ediibwe mulawu.”

¹⁰⁵ Nwamonu’s, ncilele. Mvwa muyiikilangane ne muntu munene kampanda abidi adi panshi aa. Wamba ne: “Mwaneetu Branham, ncyèna mwa kucyenza to. Ndi mumanye ne Aci ncyà bushuwa,” yêyè ne, “kadi cîndi mwa kwenza pa Cyôci aci ncinyi?”

Mêmè ne: “KuCitumikila’s!”

Yêyè ne: “Mona’s, ntu—ntu mpeta kaneemu munkaci mwa beetu twêtù’s.”

¹⁰⁶ Mêmè kwamba ne: “Kadi mêmè ndi njinga kupeta kaneemu kumpala kwa Nzambi, pa nanku tumikila Dîyi Dyende. Bikengela wènzè dyebe disungula’s, ûdi muswe kukwacila mudimu n’Nzambi anyi mmuntu?”

¹⁰⁷ Kadi bôbò badi bangata bulongolodi bwabo, bajaadikamu mêyi aa, baalonda too ne mu kakanu. Musangu wa kumpala ukaadibo bacyènzèku uvwa mmu ekeleeziya wa Katolike wa cyena Loomo. Ncyà bushuwa. Ndi nkebaku muntu wa undeeja cintu kampanda cya cishiilangane. Ntukù mubale maalu malonda, mêmè paanyi, nudi bamanye’s. Pa nanku vulukaayi ne, aci ndibatiiza dya cyena Katolike, ne muntu yônsò ukaadiku mubatiijiibwe mushindu awu mmubatiijiibwe mu bwobumwe bwa cyena Katolike. Nèncijaadikè pamba diloolo edi kujika, bu

Mukalenge mwa kwanyisha. Aci's ncyá bushuwa. Ki bwa cinyi nudi ne cya kwalukila cyanyima.

¹⁰⁸ Kî mbeena Yesu Nkaayende to. Mpindyewu, kudi bantu baa maalu mîmpè bûngì cyanaana mu ekeleeziya wa beena Yesu Nkaayende amu. Kudi bantu baa maalu mîmpè bûngì cyanaana mu Assemblées de Dieu, mu Église de Dieu, mu ba-Méthodistes, mu ba-Baptistes, mu ba-Presbytériens, ne mu beena Katolike. Kadi kakwenaku nansha umwe wa ku yôyì ayi udi Ekeleeziya to, nansha umwe wa ku yôyì ayi. Kudi bantu nkaaya mwômò amu badi baa mu Ekeleeziya. Kadi kî ndingumba didibo naadi adi didi dibavwija Ekeleeziya to, mudi bantu bateeta kucyenza mushindu awu. Ncyá mafi. Indilaayi anu kakese netunupeshe ndambu wa Mifundu mu tusunsa tukese emu.

¹⁰⁹ Eyowa's, bwa kwikala ne mwoyi pa buloba, bikengela wikale mulediibwe mu bufuki emu bwa kwikala ne mwoyi, nenku dilediibwa dya mushindu awu didi dituvwija beena lungenyi anu bu mûngâmbì amu. Nwamonu anyi? Nenku tudi tulwa beena meeji matwe, baa luumvu, dimanya dyetu dya mu mitu ndidi ditupa cyôci aci. Kadi vulukaayi ne dilediibwa adi, anu ku mbangilu mene wadi aku, ndibengangane. Ndya pa buloba ne ndibengangane ne Dîyì dya Nzambi, dikutakane pa bidi bitangila Nzambi ne ndongamu Wende, dipangi pa bidi bitangila ndongamu wa Nzambi. Bu kadiyi nanku to, Nikodeme uvw'a kwikala mumanye kutamba muvwa Yesu muCimanye. Nwamonu anyi? "Wèwè udi mulongeshi munene mu Izaleela anyi?" Nwamonu anyi? Nudi bamone kuyaaya mangumba enu miine awu's, kuyaaya bantu beenu biine baa meeji matwe badi basangila ne benza ndongamu yabo, ne bayijaadika abu anyi?

¹¹⁰ Lekelaayi nnwâmbilè eci. Musangu wônso udi Nzambi utuma Bukênkè pa buloba, pa cintu kampanda pa Mifundu, bôbò batu anu banyeema lubilu baya naaci kule. Kadi padi anu muntu awu ne wăyi, badi bacyenza bulongolodi. Ne padibo anu ne bacyênjì bulongolodi, ndi muswe kukonkaku mulongi kana yônso wa maalu malonda (udi mwaba ewu mpindyewu, anyi udi uteeleja mikaba ya mēyi) bwa alwe kundeeja. Dîbâ kana dyônso ditu anu muntu uvwija ekeleeziya bulongolodi, ekeleeziya awu uvwa ufwila anu kaaba aku ne kavwaku ujuukuluka kabidi to. Mbibengangane ne Nzambi. Mbibengangane ne Mifundu. Ki bwa cinyi mēmè ndi mbengangana naaci. Cyônso cidì Nzambi ubengangana naaci aci, piikalabi ne Nzambi udi munda mwanyi, dîbâ adi mēmè's ndi mbengangana ne cidì Nzambi ubengangana naaci aci. Mwena lukuna Wende mmwena lukuna wanyi. Ekeleeziya Wende ng'Ekeleeziya wanyi. Mwoyi Wende m'Mwoyi wanyi. Yēyè wakafila Mwoyi Wende, kulwaYe mēmè bwa ku ngàsà Wende ngaamona mwa kulwa mufwanangane Nende. Nwamonu anyi? Tudi bashintakaje myaba. Yēyè wakalwa ngènzâmpèkâàtù bu mēmè ne wakafwa bwanyi mēmè, pa kaaba

kanyi, bwa ngaamona mwa kwikala mwânà wa Nzambi bu muvwaYe Yèyè.

¹¹¹ Mpindyewu nudi bamone kukaadi mangumba enu miine awu mamane kafika anyi? (Katwena banji kubanga to.) Beena lungenyi mu lungenyi lwa pa buloba kadi bafwe pa bidi bitangila ndongamu wa Nzambi! Mpindyewu twänjäàyibi kutapa dísu paanyima, twimanaayi mwab'ewu katanci kakese cyanaana.

¹¹² Adama uvwa mubengangane ne ndongamu wa Nzambi, bwalu wakashikukila Dîyi. Wakateeta bwa kudyzenzela cibwikilu, ntendeleelu kampanda. Cyakapangila, ne citu misangu yônsò anu cipangile, citu muntu uteeta kwenza aci's. Nimeloode uvwa mu ntupakanyi. Koola wakabutuka. Civwabo bateeta kwenza ncinyi? Kwenza bulongolodi kampanda.

¹¹³ Nenu paanyima paa cyôci aci, ndekeelu wa byônsò paakadilongololabo, Yesu wakabasangana, bafwe! KwambaYe ne: "Nudi ne mèsù kadi kanuyi mwa kumona to. Nudi ne maci kadi kanuyi mwa kuumvwa to." Nwamonu anyi? Yèyè ne: "Nudi bampofu, nulombola bampofu. Piikala mpofu ulombola mpofu, bubidi bwabo kabaakupona mu mukidi anyi?" Yèyè ne: "Wèwè udi mulongeshi munene mu Izaleela, kadi kuyi nansha mwa kuumvwa ne dilediibwa dipyadiya ncinyi? Paabi, bu ne nuvwaku bashaale kule ne bilele abi, ne beele nzadi mu Dîyi, s'nuvw'a kwikala bamanye ne Mémè nguvwa ulwa bwa kupa bantu dilediibwa dipyadiya. S'nuvw'a kwikala bamanye dituku Dyanyi. Bu nwènù bamanye Mòsà, s'nuvw'a kwikala baMmanyè Mémè. Mòsà wakaakula bwanyi Mémè ne wakamba ne nêNdwe, s'ki Mémè ewu! Nenu pângiikalà Nciyi ngenza bintu byakamba Mòsà ne baprofeta ne nêNgènzè, dîbà adi kanuNgiitabuuji to. Pângiikalà Nciyi ngenza byenzedi bya Nzambi to, dîbà adi kanuNgiitabuuji to. Kadi panwikala kanuyi mwa kuNgiitabuuja to, mémè mwikale Muntu, ne panwikala kanuyi mwa kuNgiitabuuja ne bwalu Ndi Muntu kadi ngenza byenzedi bya Nzambi, itabuujaaayi byenzedi bwalu byôbi mbidi bijaadikà cintu cîNdi ngenza." Nwamonu anyi?

¹¹⁴ Kadi musangu awu, anu mudi leelu ewu, bu ne Yèyè uvwa ne mwoyi pa buloba leelu wa Ndaaya ewu, beena Assemblées de Dieu nunku's badi ne wabò bôbò, ba-Unitaires nunku badi ne wabò paabo, ne muntu yônsò nunku udi ne wendè Yesu. Cya bushuwa, bikengela bwa dingumba dyabo bôbò diikale dilame ndundu. Nwamonu anyi? Piikalabi kabiyi bikumbana nanku to, dîbà adi kî mbôbò to. Batapulula bwânà bwetu.

¹¹⁵ Ndi mvuluka mwânà wa balume mukese dîna dyende "David Mwânà." Ūkaadi muntu mushindame, muselangane patudi twakulangana apa, ngeela meeji ne ūkaadi ne famiye. Ndi mvuluka pacivwaye ubangilaku. Mvwa muye ku St. Louis. Mémè nkaadiku muumvwe bamba bwa bayiishi bânà baa balume baa bitende, ne uvwa mwa kujuuka muntwamu

kwamba ne: “Yesu, mwânà wa balume mutekete, mulelela mu cidiilu cya nyama. Maman, bivwà bilondà bikwabo abi bivwa mbinganyi?” Kadi kabivwa nanku bwa awu mwânà wa balume mutekete to. Yèyè uvwa wimansha nkooi wende, ubakula mufundu kampanda uyiisha. Kadi yèyè uvwa nganyi? Byakenzeka ne yèyè ikale mwena Yesu Nkaayende. Tatwëndè, Mukalenge Walker, ùvwa wa mu beena Yesu Nkaayende. Mona’s, beena Assemblées kabavwaku mwa kutwala aci to. Bivwa bikengela bwa kudipetelabo wabo paabo David mwânà. Mona’s, bakwabo bàvwà bashaale abo byakakengela bwa kudipetelabo paabo wabo David mwânà. Kadi cikondo kampanda civwa mwânà wa balume mutekete ewu wenza disangisha kampanda mu Floride mwamwa, kumbiikidishaye mêmè bwa nye kamwambulwisha. Ki Mwanetu Moore ne mêmè twètù kubala mabeji abidi bulubulu a pamutu paa cibejibeji aci, pûle tente anu ne ba-David bânà, ekeleeziya ne ekeleeziya yònsò mwikale anu ne David mwânà. Kaa, Nzambi wanyi! Mona’s, bu ne musumbà wa bakulu baa Nzambi awu mmujingululeku dipà divwa mu kakwacikwetu aku adi, nunku’s mmukombe mwele binunu bya misuuka mu Bukalenge, nwamonu’s; kumwambilaku bwa kupwaye mwoyi bilele byende bya pa bidi bitangila muntu ne bikampanda bya mushindu awu abi. Nzambi uvwa ne dipà mu mwoyi wa mwânà awu, ukwata naadi mudimu’s!

¹¹⁶ Paakaleejibwa Dyondopa dya kudi Nzambi bwa musangu wa kumpala, muntu ne muntu ukaavwa anu umvwa cintu kampanda mu byanza ne mufwanyine kuumvwa mupuuya wa màsaamà. Kadi, kaa, ekelekele! Bwa cinyi? Bivwa bikengela bàcyènzè, bulongolodi wabo buvwa bwa cinu mu lubilu alu. Nwamonu’s, nukaadi bateeke malongolodi enu kumpala kwa ndongamu wa Nzambi, nwela meeji ne ki mudibi. Kadi Nzambi mmwenze ne Ekeleeziya Wende ikale wenda uya anu mwende ne kale, Mubidi musokome. Kwèna ulwa kudyenza wa mu Wòwò awu to, udi ulediibwaMu.

¹¹⁷ Beena lungenyi mu lungenyi lwa pa buloba, kadi bafwe mu ndongamu ya Nzambi. Ngambilaayaaku tũng, pa dîbà adi. Ngambilaayaaku tũng, pa dîbà adi. Udi mwa kubambila ne kubajaadikila ne badi mu ntupakanyi, ku Dìyì ne mulayi wa Nzambi, kadi nebatungunuke anu ne kubenga kucimona. Mêmè ndi mwa kusomba ne kwangata Dìyì kadi kukuleeja ne dingumba ndya mafi. Ndi mwa kukuleeja ne twitabaayi miine yinudi naayi leelu ewu ayi nya mafi, wamonu’s, twitabaayi ya ekeleeziya eyi. Ubaleeja ne nya mafi, kadi bôbò nebămbè ne: “Ee, twètù tudi balongeshiibwe bwa kwitabuujă *cikampanda*.” Nudi numona’s, bwa ku wanyi mmwenenu mêmè, mbya—mbyakudya bya nyama, panwikala bamanye cîndi ngamba aci, tuzoolo twa kumana naatu mikiiya. Eyowa’s, ncyă bushuwa. Kabeenaku mwa kumona to. Yesu wakamba ne: “Nwènu, kanwena—

kanwena mwa kumona to, bwa kanwikadi nwâlwa kûNdi ne kupeta Mwoyi to.”

118 Ki Nikodeme nyêyè awu, muntu wa kuneemekiibwa, muntu munene, mwepiskopo mu ekeleeziya wende, muntu wa luumu, munanga kudi bantu bônso, ki kulwaye kudi Yesu kadi kayi ne cidiye mumanye pa bidi bitangila Mwoyi to nansha—nansha cimwe. Yêyè uvwa cinyonga cyetu cya nkata ku mutu eci pa Bwalu abu paakamudyula Yesu bwa cyôci aci apu, kadi yêyè mwime nyawu uvwaku ne meeji matooke bwa kulwa. Bakwabo baa kudibo kabavwaku baswe nansha kulwa to. Baakashaala biimanyine ba bule ne baakwidi banene ne Mwepiskopo *Kampanda* ne *Kansanga*. Nwamonu anyi? Baakashaala biimanyine naabo pa bule, bangata bilele byabo bya bakulu baabo pamutu paa kuteeleja Dîyi dya Nzambi.

119 Mpindyewu, udi mwa kubambila, kabaakuciteelejaku to. Udi anu menemene mwa... Nudiku nwênù bafwanyine kudifwanyikijila... Ndi njinga kunukonkaku cintu kampanda. Ncyêna muswe kwamba eci bwa kunyangakaja cijila to. Mpindyewu, nwênù bâna beetu badi bateeleja mukaba wa mêyi ewu, ncyêna ne meeji a kwamba eci bwa kunyangakaja cijila to. Nudiku bafwanyineku kudifwanyikijila mêmè ewu mpatuka pambelu apa, ne—ne nyuunyi wa dipù ku mucu mufwanyine kungeebeja ne: “Mmunyi mùdi wenda wendakana eku ne eku mushindu awu? Mêmè ewu’s ndi ne mwoyi, s’ndi nyuunyi wa dipù ku mucu ewu?” Yêyè udi mwa kujaadika mudiye ne mwoyi, kadi mmwoyi wa mushindu mubi. Yêyè muswe kwendakana, mushindu umwepele udiye mufwanyine kwikala wendakana, ùmòna, ùlabula, ùlenga, ùnunkila ne wùmva, bu yêyè mwa kwakula ne kungambila ne kungeebeja aci, mushindu umwepele, bivwa bikengela kwikalaye mulediibwe mushindu umweumwe wa bwena wûndi mêmè mulediibwe awu. Amen. Yêyè kaadyakucyumvwaku mûnga mushindu to. Kadi yêyè mulediibwe mushindu umweumwe wa bwena wûndi mêmè mulediibwe ewu, dibà adi neamanye maalu a bwena ândi mêmè mumanye. Amen. Kaa, ekelekele! Eyowa’s, mukalenge. Kwêna mwa kwambila nyuunyi wa dipù ku mucu mushindu utudi twêtù twendakana ne biikale ne mwoyi to, bivwa bikengela kwikalaye mupete mushindu wa mwoyi wa bwena wetu twêtù ewu bwa kucyumvwaye. Mbya mwomumwe ne Nyuma! Ncintu cimwecimwe aci ne Nyuma, bwa cyanaana kwêna mwa kuCyumvwa to. Kabyena bikengela bwa wêwè kudifwanyikijilaCi to, anji lwâku wêwè kudiYe dyambedi. Bwalu: “Muntu yêyè kayi mulediibwe cyakabidi to, kêna nanshà mwa kumona Bukalenge to,” mwakambaYe, mbwena kwamba ne, “kuBuumvwa.” Bidi bikengela ulediibwe cyakabidi bwa wêwè kuBumanya.

120 “Ee,” mùdi wamba, “mêmè’s ndi mulediibwe cyakabidi.” Kadi uvila Dîyi amba’s? Mmunyi mùdi mufwanyine kwikala

mulediibwe cyakabidi? Nsòmbèlu webe wèwè mwine's udi ukupeesha dishindika dyaci, cisumbu cyebe wèwè mwine cyûdi mukalamakanangane naaci aci, nyuunyi ya masala mafwanangane. Nwamonu anyi? Indilaayi too ne patwaya kafika ku maalu miine awu mu tusunsa tukese emu, nwamonu's.

¹²¹ Cilwalwa ku Nyuma. Mmunyi mùdi mwa kwambila bantu badi kabayi balediibwe kudi Nyuma maalu a Nyuma? Bidi bikengela wikale mulediibwe kudi Nyuma bwa wèwè kuumvwa maalu a Nyuma. Kùdi... Yesu wakamba ne: “Lupeepa ludi lutuuta kudilu luswe, wèwè kwèna mumanye ne ludi lufuma penyi anyi luyaaaya penyi to.” Nwamonu anyi? Ki mudi kabidi muntu yònsò udi mulediibwe kudi Nyuma, kabeena bakuumvwa to. Muntu udi mulediibwe kudi Nyuma kèna udyelela meeji to, udi ulekeela Nzambi dyela dya meeji adi.

¹²² Nudi nwela meeji ne ndi mufwanyine kwimana pa cibumba cya ku cyambilu apa, kudyelela meeji kadi kwambila muntu paanyima pààpa ne: “Dîna dyende n’*Kampanda* ne yêyè udi ufumina ku mwaba *kansanga*, mmwenze *cikankenga*. Ne yêyè wakasela mukaji mukwabo kale wawa, kukaadi bidimu makumi abidi, ne ukaadi mulele bânà ne mukaji ewu. Bikengela akapingaje cintu *kampanda*, ne ënzè *cikansanga*,” nudi nwela meeji ne, ku didyelela dya meeji, nkùndi mufwanyine kwenza aci anyi? Kakwena lungenyi lwa mushindu awu mu dilediibwa edi dya panu pa buloba bwa aci to. Ncitambidile aci. Cidi ne cya kufumina ku Dyulu. Pashiishe paudi mulediibwe kudi Nyuma, ku Dyulu, Mwoyi uvwa munda mwa Yêyè Wâkenza bintu abi awu, wakamba ne: “Byenzedi bîNdi ngenza, nenùbyènzè peenu.”

¹²³ Bikengela bwa dilediibwa dyebe dishintuludiibwe. Udi museeswishiiibwe. Udi mufwanyine kwikala mwakule mu myakulu, udi mufwanyine kwikala mutupike muya muulu muya panshi, udi mufwanyine kwikala mwele mbila, udi mufwanyine kwikala mwenze *bikampanda*, *bikansanga*, ne *bikankenga* byònsò abi, udi mufwanyine kwikala mushaale cidimba cya—cya lulamatu. Ki muvwa pende Nikodeme, nwamonu's, kadi ùvwa mupangile dilediibwa adi. Nenku paudi uvila Dìyi, uteeta bwa kuDiteeka pa kaaba kampanda kakwabo ne kuDyenzela cintu kampanda, ne uDitangalaja mushindu awu, dîbà adi... Yesu mmwambe ne: “Bimanyinu ebi nebifile badi biitabuuja. Ndaayi pa buloba bujima nukayiishe cifukiibwa cyònsò Evanjeeliyo.” Pacidi anu Evanjeeliyo uyiishiibwa, bimanyinu ebi nebilonde anu kulonda. Ngambilaayi mwaba ukaadiYe kacya mubyũmùshe mu ekeleeziya. Ndeejaayi mu Mufundu mukaadiYe mwambe, mwambeku kacya ne: “Anu too ne cikondo kampanda.” Yêyè wakamba ne: “Pa buloba bujima ne kudi cifukiibwa cyònsò!”

¹²⁴ Eyowa's, bivwa bikukengela wèwè kupeta mushindu wa Mwoyi uvwaYe Yêyè naawu awu, bwa kwikala ne nsòmbèlu wa Mwoyi Wende awu. Nenku paudi umona Mwoyi Wende,

dîbà adi neumanye Dîyì Dyende. Ncya bushuwa. “Padiye Yêyè,” mupinganyi muleeji muntu, kî mmeeji to, kî ndidifwanyikijila to, kî ndisaluka to, kadi “Yêyè, Nyuma Mwîmpè, paalwaye, Yêyè neangate maalu ândi Mémè munwâmbile aa, ne neanubuulwilewu, ne neanuleeje maalu acivwavwa.” Ki dilediibwa ndyòdi adi. Ki dishindika ndyòdi adi dya ne Cyôci aci n’Dîyì. Ne padi muntu wamba ne udi ne Nyuma Mwîmpè, kadi uvila Dîyì dya Nzambi ne uDiteeka mwaba mukwabo wa cyanaana, mmunyi mudi Nyuma Mwîmpè mwa kuvila Dîyì Dyende Yêyè mwine? Mpindyewu ndeejaayaaku bulongolodi mu Dîyì amu. S’ki bwalu mbwôbù abu. Nwamonu anyi? Eyo.

¹²⁵ Nudiku bafwanyine kudicinkila ngèndààmùshìngà wetu ewu. . . Mpindyewu, ki ntanta nyêyè ewu udi ekeleeziya wetu mushaadile paanyima bikole. Nudiku bafwanyine kudicinkila ngèndààmùshìngà wetu ewu mubange mushinga kampanda kaaba aka, ciikale. . . ciikale mushinga wa ùtanta bikole, ne bikengela bwa apete dikwacisha dya lukasa menemene, kadi mufwanyine kuya kudi musùmbà wa bantu bafwe, bitalu, ne kwamba ne: “Nudiku mwa kulwa kunkwacila mudimu anyi?” Kî mbafwanyine kwikala ne dikwacisha kudiye to.

¹²⁶ Ki bwa cinyi bulongolodi kabwenaku bujuuka cyakabidi to. Nwamonu anyi? Musùmbà wa bupidya bufwe budisangisha pamwe bu Nimeloode, bu Koola, bu munda mwa bikondo mwamwa. Mmunyi mudi mwa. . . Kacyapu Yêyè katu mwanji kukwataku naaci mudimu to, katu mwanji kukwataku mudimu ne bulongolodi to. Kêna mwa kucyenzaku to. Cikaadi pambelu paa diswa dya Nzambi, cikaadi dyamwamwa dya cyôci aci. Cikaadi kaciciyi cya wolola cyanza upeta to, cikaadi kaciciyi cya dikenketa to.

¹²⁷ Mmunyi mùdi mwa kuya kudi muntu kampanda udi kayi mufwanyine kunyunga, wa mutu mutekete luseke, cyanza ne dikàsà bitekete, umwambila mùdi ujinga ne akanyeeme lubilu lwa makàsà bwebe wêwè, anyeeme lubilu elu ne lutuulu, ushiya ku luseke. . . Nwamonu anyi? Mmufwanyine kucyenza munyi padi yêyè muntu awu kayi mwa kunyunga, yêyè mwikale mutekete luseke? S’bikengela bwa wêwè kwanji kuumusha butekete abu mu yêyè, dyambedi, pashiishe amone mwa kunyeema.

¹²⁸ Ki cidi cikengela bulongolodi ncyôci aci, ndyondopa dya kudi Nzambi. Kaa, ekelekele! Ndi ntekemena ne ncyêna mpeta. . . ngumvwika bu ne ndi ndyulangana to. Nwamonu’s, ncyêna ndyulangana to, kadi padi musonso kawuyi mupoopela bikole to udi ujoomoka anu bipeepele peepelee. Nwamonu anyi? Ki bwa cinyi Nyuma Mwîmpè kêna mwa kukwata mudimu ne dingumba to. Pakaadidi anu. . .

¹²⁹ Vulukaayi ne, ndi ngiitabuuja ne Martin Luther uvwa ne Nyuma Mwîmpè. Kakuyi mpatà to. Pàmwâpa kabiyi mu

cipiminu cidiYe leelu ewu eci to, bwalu Kavwa mufidiibwe to. Tukaadi bayiile cyôci eci, nwênù beena mu tabernacle, ku cibasa mwaba ewu. Kadi ncyà bushuwa ne yêyè wakiitabuuja Nzambi, “ne ewu udi witabuuja udi ne Mwoyi wa kashidi.” Ncivwaku ngeela meeji ne kuvwa muntu wa witabuuja cyôci aci bu mêmè to, too ne mu dinda emu, pângatèèleji Charles Fuller pâmvwà ngenda mpweka apa. Yêyè pende, ùdi witabuuja ne, dilediibwa dipyadiya kî ndibatiiza dya Nyuma Mwîmpè to. Dilediibwa dipyadiya nkwikala mulediibwe. Nyuma Mwîmpè ndibatiiza. Nwamonu anyi? Eyo.

¹³⁰ Mpindyewu tudi tusangana ne bidi bikengela bwa muntu ewu ikale mulediibwe cyakabidi bwa yêyè kwikala ne mwoyi. Eyo, kwikala mulediibwe kudi mubidi, dîbà adi udi ne lungenyi lwa pa buloba. Ne lungenyi lwa pa buloba ludi lutumikila mulongeshi walu wa mubidi awu. Cya bushuwa. Ki bwa cinyi menemene muntu udi kayi ne dilediibwa dipyadiya, kadi umwambila Dîyì dya Nzambi, yêyè neatumikile mwepiskopo wende, mukulu mutangidi wende anyi bulongolodi bwende, pamutu paa Dîyì dya Mwoyi. Bwa cinyi? Dilediibwa adi kî ndimanye cîngà cintu to anu aci. “Mona’s, udi mumanye’s, dîngà dituku’s ndi mufwanyine kushaala mukulu mutangidi.” Mona’s, Nikodeme’s uvwa mulongeshi munene. Aci’s civwa citambe mukulu mutangidi ne kule, aci’s civwa citambe mpaa—mpaa—mpaasata ne kule, aci civwa citambe ne kule, awu yêyè’s uvwa mulongeshi munene mu Izaleela. Nwamonu anyi? Eyowa’s, kabidi yêyè uvwa muntu munene, ùvwa wa mu musumbà ewu kadi kayi mumanye Nzambi nansha kakese to. Nwamonu anyi? Cyônsò civwaye mumanye civwa anu ndambu wa maalu malonda.

¹³¹ Nzambi wa maalu malonda udi ne dikwacisha kaayi padiYe kayi ùmweùmwe awu leelu ewu? Nzambi wa Môsà awu udi ne dikwacisha kaayi piikalaYe kayi Nzambi ùmweùmwe awu leelu ewu? Nzambi uvwa mwa kusungila muntu pa nkuruse kadi kayi mwa kusungila munga muntu mwikalè mu ngiikadilu ùmweùmwe awu leelu udi ne dikwacisha kaayi? Anu mûnkaadi mwambambe misangu yônsò ne: “Bidi ne dikwacisha kaayi bwa kudiisha kanyuanyi keebe kaa lùlambà ntete mîmpè ne vitamines, bwa kukapetsha mapwapwa makole ne masala malenga, kadi kukeela mu nsanji?” Mêmè ncyêna ncyumvwaku to. Ûteeta bwa kumwambila bwa Nzambi wa bukole ne bikwabo, kadi ùmuswikila mu bulongolodi budi kabuyi nansha bwitabuuja cintu cya bu nanku to. Nwamonu anyi? Byônsò abi’s bidi cyanaana. Ki bwa cinyi cidi cipangila, yêyè mmufwe. Kwêna mwa kukwata naaci mudimu to. Kacya Nzambi katuku mukwate naaci mudimu to.

¹³² Anji elaayibi meeji, Nyuma Mwîmpè kacya katuku mwanji kukwata mudimu, dîbà nansha dimwe, ne bulongolodi to, mwaba nansha umwe mu Mifundu anyi mwaba nansha umwe

mu maalu malonda. Piikalaku muntu ku badi bateeleja mukaba wa mèyi ewu, anyi mwikale kaaba aka, udi mwa kundeejaku mwaba ukaadi Nyuma Mwîmpè mwangate bulongolodi mwenze nkwaaka kampanda pa buloba apa, alwe angambile. Ndi muswe ungambile ne mmu mukanda wa maalu malonda kaayi mudici cifumine. Udi mumanye ne kacyena mu Mifundu to, pa nanku ndi muswe undeeje ne mmu bwalu bulonda kaayi mudici cifumine. Kacyakacya Nzambi katuku mwanji kukwata mudimu ne cintu bu aci to. Yèyè utu ukwata mudimu ne muntu nkaaya, misangu yônsò.

¹³³ Eyo, kwikala mulediibwe kudi Nyuma. Mpindyewu, kwikala mulediibwe kudi mubidi, ne kwikala ne lungenyi lwa pa buloba, lungenyi alu nelutumikile mulongeshi walu wa mubidi awu. Kwikala mulediibwe kudi Nyuma nkwitabuuja ne kutumikila dilongesha dya Bible, ku Nyuma Mwîmpè. Ne muntu udi mulediibwe kudi Nyuma neatumikile Diyì dya Nzambi kayi ucyuka cidi nî mbilele kaayi byônsò bimwambila to. Cidi anu aci. Udi mulediibwe cyakabidi, ki bwa cinyi udi umona. Kwikala wa mu bulongolodi kampanda, kudi kuteeka ditekemena dyebe dyônsò mu cyôci aci . . .

¹³⁴ Mpindyewu, ncyêna ngamba ne bantu badi mu bulongolodi kî mbalediibwe cyakabidi to. Mpindyewu, nênkafikè ku cyôci aci mu tusuna tukese emu, bu Mukalenge mwa kwanyisha. Ncya bushuwa ne, mbalediibwe cyakabidi, kadi mbantu nkaaya. Kî ne bulongolodi mbulediibwe cyakabidi to; bantu nkaaya bàdì mwômò amu abu mbadi balediibwe cyakabidi. Kadi bulongolodi bôbò bwine budi anu bumukosolola ne Nzambi, ki cyônsò cidibu bwenza ncyôci aci, bunutapulula. Eyo. Kadiyi dicyuka mubidi to, dingumba ditu dilongesha mubidi, ditu misangu yônsò anu dibengangana ne diswa dya Nzambi.

¹³⁵ Kwikala *mulediibwe cyakabidi* mbwena kwamba ne kwikala “mulediibwe ku Dyulu.” *Cyakabidi* mbwena kwamba ne “ku Dyulu.” Ngeela meeji ne nudi bamanye aci, nwamonu’s. Kwikala *mulediibwe cyakabidi* mbwena kwamba ne kwikala “mulediibwe ku Dyulu.” Mpindyewu, nenumone, nudi mwa kucilonga panwikala baswe kucilonga, mbumbilu wa myaku. Nwamonu’s, mbwena kwamba ne “dilediibwa didi difumine ku Dyulu.” Bwalu, udi mulediibwe *panwapa*, mpindyewu bwa kulediibwa cyakabidi bikengela ulediibwe kuulu *Èku*, bwa kulediibwa cyakabidi. Nenuku Bukalenge abu budi kuulu bikole kutamba ebu bukalenge, bunene bikole kutamba ebu bukalenge, mu mushindu wa ne ebu bukalenge mbukutakane ku Bwàbwa, ne Bwàbwa paabu mbukutakane ku ebu.

¹³⁶ Anu mûnkaadi misangu yàbûngì mwambambe, mêmè ne mukajaanyi mwab’ewu kî nkwanji kupita matuku to tuvwa baye kuntweku bwa kasumbaku byakudya, kukaadi ndambu wa ngondo, ki twètù kumona muntu mukaji kampanda muvwale

jipè. Nenku civwa ncintu cyènyi cya kacya citukaavwaku bamone kukaavwa ntanta mule.

¹³⁷ Ee, mu dinda emu, ncyèna ngamba eci bwa kunyangakaja cijila to, mvwa muteeleje dimwe dya ku malongolodi manene adi mamanyike bîmpè. Ne mwanaanyi wa bakaji ne mêmè tuvwa tuteeleja cisanji patuvwa tuya ku dijidila dya ekeleeziya kampanda. Ne musambu kampanda uvwabo bimba, cintu cya mushindu kampanda cikwabo kudi *Kampanda*, ngimbilu kampanda wa mu tulaasa uvwa bwanyi mêmè umvwika bu mùtù bakaji bakoka myoyi ya munda too ne mudi kwîsù kulwa bleu, kadi paabo beela meeji ne ki kwimba nkwòkò aku. Aci's nkwela kwa mbila ne mèyi a tuumyenza's. Mêmè ntu munange ngimbilu wa kale wa cyena Mpenta awu, wa ufumina buludi mu mwoyi webe. Udi mufwanyine kupanga mwa kulondeshila cyona nansha cya cipepele, kadi nansha nanku udi wimba, mwikale wenzela Mukalenge mutooyi wa disanka. Ndi mêmè ngeela meeji ne aci ki cîdi cya nyuma. Ntu mucinange. Kadi bya dikoka myoyi ya munda too ne mudi kwîsù kukushaala anu bleu abi, ne wimana bu muntu ùkùùla mwoyi kadi pashiishe walukila, mwikale. . . Kuyi nansha umanya wèwè mwine cyùdi wimba aci to. Mmunyi mùdi utekemena ne muntu mukwabo amanye? Ki bwalu abu's. Yesu wakamba ne: "Tudi twamba maalu atudi bamanye." Ncya bushuwa. Ncya bushuwa. Cidi citukengela kwenza nkwimba citudi bamanye mu mwoyi wetu, citudi tudyumvwa mwa kwimba aci.

¹³⁸ Nenku paakajikijabo, mwanaanyi wa bakaji utu ulonga mijiki, ki kwambaye ne: "Mwaneetu," mwakambaye, "awu's uvwa ngimbilu menemene anu wa mulonga mu tulaasa's."

¹³⁹ Mêmè ne: "Eyowa, kadi mbûngì kaayi bwa baa mu korale wa bantu batwe ku makumi ataana awu baudi wela meeji ne bavwa banunka cipuuyapuuya cya mfwanka mukana mwabo amu? Mbûngì kaayi bwa baa mu korale mwine awu baidiku wèwè wela meeji, bu muvwabi ne makeelela diloolo awu divwa ndiloolo dya mu diisambombo, bavwa kabayiku balabule ndambu wa tuluvu tukole twa mu nsòmbelu? Mbakaji bûngì kaayi mwòmò amu bavwa ne nsuki mibebula? Mbûngì kaayi bavwa ne bilaabu kwîsù, paakamba mpaasata wa ekeleeziya awu kukaadi ndambu wa matuku ne: 'Nzambi mmwenze buloba bulenga menemene padiYe mufuke bilaabu bya kwîsù?'" Paabi, tudi bamanye ne kudi mukaji anu umwepele mu Bible wâkadîlaaba bilaabu kwîsù, kadi Nzambi wakamudiisha ne mbwa. Nenku twètù, muntu kana yònsò ewu udi mumanyeku cintu kampanda pa bidi bitangila ekeleeziya ne bampangaanu, mmumanye ne bilaabu bya kwîsù ncimanyinu cya bumpangaanu, ki mutubi misangu yònsò. Kadi, nansha nanku, bakaji badi anu bacyenza's. Ne balume banwa mfwanka, banwa maala, benza bintu bya lukutukutu. Kadi biimana mwab'awu bimba misambu, mèyi mushindu awu. Netufikeku

mu tusunsa tukese emu mwab'ewu mene. Eyo. Biikale bya ngeelelu wa meeji wa cyena bulongolodi, padibi ne, nekwikale dyediibwa dya mâyi ku makàsà ku Cilumbulwidi, bwa ku wanyi mmwenenu.

¹⁴⁰ Kwikala mulediibwe kudi Nyuma, nkwitabuuja ne kuditwala wêwè mwine mu Nyuma, nkuumvwa ne kwitabuuja munda mwa mwoyi webe ne Yesu udi Kilisto ne Eci n'Dîyi Dyende, ne mêyi makwabo kaenaku mwa kusakidiibwaKu anyi kuumushiibwaKu dîna dyebe kadiyi dyumushiibwe ku Mukanda wa Mwoyi to. Aci's civwa cikole. Wêwè musakidileKu kantu kamwepele, mu bilele byenu amu, anyi muumushileKu kantu kamwepele, ee, Kilisto wakamba, Yêyè mwine ne: "Dîna dyebe nedikupudiibwe ku Mukanda wa Mwoyi." Mpindyewu, petaaku bulongolodi, dingumba mu Bible tûng. Wêwè's neupatukemu lubilu! Eyo. Katuyi tucyuka mubidi to, dilongesha dya dingumba didi dibengangana ne Bible. Eyowa's. *Mulediibwe cyakabidi* mbwena kwamba ne "Dilediibwa dipyadiya dya ku Dyulu; mulediibwe ku Dyulu." Dîbà adi tudi ne mwoyi mu maalu a ku Dyulu. Kaa, ekelekele! Bwalu Cidi n'Yêyè mwine ukwata mudimu mu Dîyi Dyende mu wêwè, ditamba Dyende, dya ku Mwonji wa Mvinyo.

¹⁴¹ Ki bwa cinyi Yesu wakamba ne: "Pângiikalà Nciyi ngenza byenzedi bya Taatù Wanyi to, kanuNgiitabuuji to." Kaa, bulelela's! Yêyè ne: "Muntu nansha umwe katu mwanji kubànda mu Dyulu to anu Yêyè udi mutuuluke mu Dyulu awu." Tangilaayi numone mudiYe ulongolola Nikodeme kaaba aka, padi Nikodeme. . . Nudi bamanye's, bôbô baakadyambidila ne, Yêyè mwikale Muntu, Kavwa mufwanyine kwikala Nzambi to. Ki Yêyè kwamba, ki kwambaYe mwab'awu ne: "Muntu nansha umwe katu mwanji kubànda mu Dyulu to anu Yêyè udi mufume mu Dyulu, Mwànà wa muntu mene udi mu Dyulu mpindyewu awu." Aci kumupicilaci's. Mmunyi muvwaYe, Mwànà wa muntu awu, mwa kwikala mutuuluke mu Dyulu, kwikala *mutuuluke* mu Dyulu, mwikale umwèumwè *wâkabànda* mu Dyulu awu, ne Yêyè umwèumwè awu udi mwimane kaaba aka kumutu kwa nzubu ewu eku, wakula ne Nikodeme, mwikale mpindyewu *mu Dyulu*? Ee, s'biwva bikengela bwa kwikalaye mumone ne civwa n'Nzambi. Yêyè's udiku kwônsò, myaba yônsò! Nwamonu anyi? Kadi yêyè, mu bilele byende, kavwa mumanye aci to. Kavwa yêyè ne meeji a nyuma to. Meeji a musunya, ne kaàvwa mwa kucyumvwaku to.

KwambaYe ne: "Bantu badi bamba ne Mêmè Mwànà wa muntu ewu ndi nganyi?"

"Bamwe badi bamba, ee, ne 'Yêyè m'Mwànà wa Davidi.'"

¹⁴² Yêyè kwamba ne: "Kadi bwa cinyi Davidi mu Nyuma wakaMubiikila ne 'Mukalenge,' wamba ne: 'Mukalenge wakambila Mukalenge wanyi ne: "Somba Wêwè ku cyanza

Cyanyi cya dyabalume eku, too ne pânNgààvwijà balwishi Beebe citeekedi cya makàsà”?” Mushindu mwine udiYe byònsò bibidi Muji ne Mutoloku wa Davidi; Yèyè uvwaku kumpala kwa Davidi, Yèyè uvwa Davidi, ne paanyima paa Davidi. Nwamonu anyi? “Yèyè udi Muji ne Mutoloku wa Davidi,” Bible ngudi mwambe nanku, byònsò bibidi Muji ne Mutoloku wa Davidi. Mmunyi muvwaYe mwa kwikala Mwanende dībà adi? Mmunyi muvwaYe mwa kwikala Mukalenge Wende? Bible mmwambe ne: “Kubangila anu pa dībà adi kabaakaMukonka bwalu nansha bumwe to.” Ngeela meeji ne civwa kabidi cintu cimpè’s, cyôci aci. Eyowa’s, mukalenge. Eyo.

¹⁴³ Mulediibwe cyakabidi ku Dyulu. Dībà adi tudi ne mwoyi, tudi ne mwoyi mu maalu a ku Dyulu, ne, bwalu Mwoyi Wende udi munda mwetu, cidi ciikale Dìyì Dyende munkaci mwa kushindika Dìyì Dyôdi diine. Nyuma udi munda mwebe awu n’Dìyì adi divwijibwe mubidi munda mwebe. Nyuma udi ucyuka Dìyì, ne udi ne mwoyi mu dishindika dya Dìyì.

¹⁴⁴ Mpindyewu, Nyuma kèna ne mwoyi mu dingumba nansha dimwe to. Kì mmusankishiibwe mu dyanza dya bulongolodi to, bwalu Nyuma Yèyè mwine udi ubengangana ne bulongolodi. Malongolodi adi akeba bintu bya pa buloba, meeji a pa buloba, ne adi enza ntempelu minene ne bintu bya kapelu, ne malongolodi manene a kapelu, bayiishi ba kapelu, ne bikwabo bya nanku awu, ne musumbà mutambe bulenga wa bantu mu cimenga. Paadibi ne, Nyuma udi uteeta bwa kupeta myoyi ya meeji matooke mudi Nyuma uzukila bwa kumwenesha ne kujaadika ne Dìyì dyònsò dya Nzambi ndilelela. Mmunyi mùdi wèwè, mmunyi mudi Nyuma mwa kukwata mudimu mu bulongolodi padibu buvila, bwangata twitabaayi pamutu paa Dìyì? Kènàku mwa kucyenza to. Pa nanku, nudi numona’s, ncifwe. Nzambi katu uya ku myaba ya mushindu awu bwa kupeta Bende, mu—musumbà wa bantu bwa kuMukwacilabo mudimu to, bwalu bakaadi bamane kufwa. Mbeena bupidya ku Dìyì, bwa cyanaana kabavw’a kwikalamu to. Nwamonu anyi? Mpindyewu, twètù tudi ne mwoyi mu maalu a ku Dyulu. Mpindyewu, Nyuma udi ucyuka Dìyì. Mpindyewu, aci’s neya bushuwa, bwalu Nyuma ngudi ufila Mwoyi ku Dìyì. Nwamonu anyi? “Dileeta didi dishipa; Nyuma ngudi ufila Mwoyi.”

¹⁴⁵ Mpindyewu, mvwa ngenda ndwa leelu ewu, ngenda ntangila mici minene milenga ya mu dītù mwamwa, mu tukuna tunene, ya mifiikuluke, ya kàlaabi, ne yītù ne mabeji anu mabishi ayi myenzemu tuntobengela. Mèmè kwamba ne: “Nudi bamanye ne ncinyi cyacya?” Mèmè ne: “Twafumu ku dipeta lufu, kadi Nzambi mmupatule cisumbu Cyende cya bilòngò, kubyasa pamutu paa tukuna twatwa. Mbilòngò bya madilu’s. Mwoyi mmwalukile mu lupwishi. Nzambi wafumu ku dijiika mamiinu Ende ònsò a bilòngò ne bikwabo awu, mubipingaje mubijiike, kadi Mutolweshe anu cisumbu Cyende cya bilòngò. Yèyè udi

utangila pa buloba bujima bwalu mbilòngò bya madilu. Kadi padi dībà dijuuka cyakabidi, dimiinu adi nedipetulule mwoyi cyakabidi.” Amen. Eyo.

146 Nyuma udi usankishiibwa mu dishindika dya Dîyi. Kadi pawikala mwitabe bilele pamutu paa Dîyi. . . Mpindyewu, wêwê udi wamba ne: “Ee, tudi tuDiitabuuja dyònsò, kadi, Mwaneetu Branham, ndi mumanye ne katwena twitabuuja *Cikampanda* to.” Dībà adi’s anu mwab’awu ki ûdi mwimanyine.

147 Muiishi wa mu basalaayi wakangambila musangu kampanda ne yêyè. . .ne ka—kapiteena kampanda wakamba, anyi ngeela meeji ne uvwa m’major, wakamba ne: “Muyiishi, nda kuntu kwaka, kudi kapiteena kampanda upunga ne lufu. Mmusunsula kudi mazaji a cingoma cya mwambuuyi.”

148 Kukùyayè, ne kapiteena uvwa udisuba. Kumukokelabo mu ntenta wa beena Nkuruse Mukunze, ki yêyè ne: “Kapiteena.”

149 Kubandulukaye mu dizololoka dya mashi pa muminu adi, ki kwambaye ne: “Yě, mukalenge.” Ki kwambaye ne: “Wêwê’s ki muyiishi wa mu basalaayi’s.”

“Eyo.” Yêyè ne: “S’nyewu upunga ne lufu, kapiteena.”

Yêyè ne: “Ndi mumanye aci.”

Yêyè ne: “Udi mwena Kilisto anyi?”

Yêyè ne: “Ki cîmvwà.”

150 Yêyè ne: “Uvwa muMushiile penyi, kapiteena?” Yêyè ne: “NeuMupetele anu menemene mwaba wûvwà muMushiile awu.” Mmwômò.

Ki kapiteena ne: “Ncyêna mwa kuvuluka to.”

151 Muiishi awu kwambaye ne: “Bikengela uvuluke, nkukushaadile tusunsa tukese cyanaana, bwa mushindu wûdi udisuba ewu.” Mukana mudilekelele, mashi bipatukila mukana ne mu maci, ne mazaji a cingoma cya mwambuuyi mamutubule mubidi mujima. Yêyè ne: “Bikengela wambulujje, bisulusulu byebe nyewu byenda byûla tente ne mashi.”

152 Ki kapiteena kubanga kunana lungenyi, mulaale mwaba awu pavwaye ukengakana apu. Mumwemwe kulwawu pa mpala pende apu, kwambaye ne: “Ngaamanyi mpindyewu.”

Awu ne: “Uvwa muMushiile penyi? Bangila pôpò apu.”

153 Yêyè ne: “Mpindyewu ngâdyôlòlù panshi bwa kulaala.” Ki mwaba uvwaye muMushiile ngwôwò awu, ki mwaba udiye uMusanganyina.

154 Padi bulongolodi bwenu bulongesha cintu kampanda cibengangane ne Dîyi, nudi nuMushiila anu mwaba awu. Alukila wêwê anu paanyima, bwalu Yêyè udi ne mwoyi mu dishindika ne divwija dya Dîyi adi dilelela. Ki civwa Yesu ncyôci aci, wenza misangu yònsò diswa dya Taatù. Nwamonu anyi? Eyo.

¹⁵⁵ Pa nanku, nwamonu's, lumvu lwa bulongolodi bwa Nikodeme kaluvwa ne civwalu lumvwija nansha cimwe bwa Nzambi to. Mpindyewu, nansha bu yêyê mwa kwikala muntu wa mushinga munene, mutûtù tucibiikila amu, mu bulongolodi, mulongeshi munene mu Izaleela, dilonga dyende dyônsò ne lumvu lwende kabivwa byumvwija aci [Mwaneetu Branham udi utuuta cishonto—Muf.] paakimanaye kumpala kwa Kilisto apu to, civwa bwende yêyê anu didyudiibwa. Mpindyewu, ndi ndifwanyikijila bantu bônsò bamba ne: “Taatù wa bunsantu, Nikodeme. Taatù wa bunsantu, Nikodeme. Nyewu tukwinamina, mukalenge.” Kadi bwa Yesu, yêyê wakiimana kumpala kwa Nzambi, Yêyê wakamudyula bwa dipanga dyende. Dîbà adi, nudi numona cyônsò aci kuyaayaci's, cipwaayi mwoyi! Lwâyi, katuyaayi kudi Nzambi. Ncya bushuwa. Eyo.

¹⁵⁶ Nansha lumvu lunene lwa Koola alu kaluvwa ne civwalu lumvwija to, anyi lwa Adama, yônsò udi uvila Mukenji mushindika wa Nzambi awu. Mpindyewu tuteelejaayi ne ntema mpindyewu, netwikale ne cya kubwela mu mâyi a ndondo mu katanci kakese emu. Nwamonu's, yônsò wa kudibo, cyâkenzà ne bapete lutatu, Nikodeme, Koola, Nimeloode, ne bakwabo, mbwalu kabaakajingulula musanjeela wa Nzambi uvwa ne Dîyi dishindika dya dituku adi to. Mpindyewu, muntu kana yônsò ewu mmumanye aci. Mpindyewu, tudi bafwanyine kushaalapu ntanta mule. Kadi Nzambi utu udyanjila kwamba ne wamba ne cintu kampanda necyenzeke, muntu yêyê wenza malongolodi, usômbesha muntu bilenga. Bavwa biitabuuje ne kuvwa Maasiya uvwa ne cya kulwa. Kaa, beena Yuda abu's, kaa, ekelekele, bushuwa's! Kadi paakalwa Yesu mushindu wakalwaYe awu, kwambabo ne: “Awu kêna mwa kwikala Yêyê awu to.” Badi babanga kuumvwa Dîyi. Mpindyewu, Yesu kaakalwa bibengangane ne Dîyi to (mmwômò anyi?), kadi Wakalwa bibengangane ne dyumvwija dya bulongolodi dya Dîyi. Môsà kaakalwa bibengangane ne Dîyi to, wakalwa menemene anu bilondeshile Dîyi; kadi Koola wakapanga kucimona. Nenu too ne kundekeelu bivwa anu mushindu awu.

¹⁵⁷ Mpindyewu tangilaayi. Mukenji wa dituku ewu kawena mwa kwikala cintu kampanda cya cyamba ne “twêtù tudi ne Bulelela ne tudi ne *cikampanda*, *cikansanga*” to, bikengela ciikale cidyanjila kwamba mu Dîyi Dyende! Nenu paanyima paa Dîyi dimane kutwadiibwa, bikengela ciikale cishindikiibwe anu menemene kudi Dîyi.

¹⁵⁸ Yesu uvwa mushindikiibwe anu menemene kudi Nzambi, ku Dîyi. Yêyê wakamba ne: “Bu nwênù bamanye Môsà, nunku nudi bamanye dituku Dyanyi.” Baaprofeta baakaakula anu bîmpè Bwende, baaprofeta bônsò baakamba anu bîmpè civwaYe. Kadi nansha nanku cyakabafomija, kabayiku mwa kucyumvwa to. Nwamonu anyi? Kadi Yesu uvwa . . . Nenu ncyêna . . .

159 Ndi muswe kwamba eci bwa badi pa mukaba wa mÿyì, ne bwenu nwênù, kabidi. Nwamonu's, musanjeela mwikale ne Mukenji wa dituku!

160 Mpindyewu, nwênù baye nanku ba-Adventistes baa dituku dya Mwandamutekete badi bamba ne: "Tudi naaci twètù, anu kulama kwa Nsabatu cyanaana!" Nundeejaayi aci mu Mifundu. Mandamu Eddy Baker eku n'ă ne yêyè uvwa naaci. Cindeejaayi's. Bantemu baa Yehowah n'ă ne badi naaci. Nucindeejaayi's. Nwamonu anyi? Ba-Méthodistes eku n'ă ne badi naaci. Nucindeejaayi's. Ba-Baptistes eku n'ă ne badi naaci. Nucindeejaayi's. Ndeeejaayi malongolodi kana ônsò. Ndi nnujaadikila ne ôwò awu, bumwe ne bumwe bwa kudiwu, adi pambelu paa diswa dya Nzambi. Bumwe ne bumwe bwa kudiwu budi anu bubengangane, alongesha bilele bya bantu pamutu paa Dÿyì dya Nzambi. Ncyêna mumanye nansha bumwe bwa ku ôwò awu budi bufwanyine kwitaba bintu bidi bifundiibwe bulelela mu Bible mu mushindu udiBi ewu to. Ncya bushuwa. Kadi padi anu muntu kampanda ulwa wamba ne: "Ndi ne Mukenji wa dituku," badi ne cya kwanji kumumona dyambedi mu byôbi menemene ne kwikalaye mudyanjila kwamba ne nealwe.

161 Paakapatuka Yone Mubatiiji kwaka, baakamba ne: "Wêwè ki Kilisto awu anyi?"

Yêyè ne: "Kî mmêmè to."

Bôbò ne: "Wêwè udi—udi—udi Eliya awu anyi?"

Yêyè ne: "Kî mmêmè to."

Yêyè ne: "Wêwè udi nganyi?"

162 Yêyè uvwa mwa kudimanyisha yêyè mwine, yêyè uvwa ne Mukenji wa dîbà adi. Wakamba ne: "Mêmè ndi dÿyì dya ewu udi wela lubila mu cipeela, bu mwakamba muprofeta Yeshaayi. Mpindyewu, dilediibwa dyanyi ne nsòmbelu wanyi byôbi kabiyi bikumbanangane ne cyôci aci to, kanu—kanungaakididi to."

163 Paakalwa Yesu, civwa cintu anu cimwecimwe aci, cintu anu cimwecimwe aci. Munsanjeela ne Mukenji, civwa ne cya kwikala Mukenji mudyanjila kwamba kudi Nzambi. Ne pashiishe Nzambi, wakwila kudi musanjeela ewu, udi ushindika ne m'Bulelela. Nudi baciteeleje anyi? Nudi nucyumvwa anyi? Cyûmvwàyi! Cidi ne cya kwikala dyambedi EMU MMUDI MUKALENGÈ WAMBA, cidyanjila kwamba. Ne pashiishe musanjeela mwikale ne Mukenji awu, udi ne cya kwikala menemene cyakamba Nzambi ne necyenzeke pa diine dîbà adi.

164 Ki mushindu awu uvwa Mòsà. Ki bwalu kaayi wakapona mutwe mpalà panshi kumpala kwa Nzambi, e kwambaye ne: "Nzambi, Wêwè's ngwákantùma."

KwambaYe ne: "Tapuluka wêwè ne musùmbà awu."

¹⁶⁵ Nudi numona cîndi muswe kwamba aci anyi? Citu misangu yônsò anu cintu citu cikonyangaja meeji a bantu, cibapambula cibatuma kule ne diswa dya Nzambi. Mpindyewu nwavulukaayi ne, cidyanjila kwamba kudi Dîyì Dyende ne cishindikiiibwe anu mu cyôci kudi Dîyì Dyende. Mpindyewu, Yesu wakamba ne: “Mêmè nciyi ngenza byenzedi bidi. . . bya Nzambi to, dibà adi kanuNgiitabuuji to. Nwamonu’s, Mêmè mupangile. . . Ambaayi tŭng, nganyi wa kunudi aku udi mwa kuMpiisha bwa mpekaatu? Nganyi wa kunudi aku udi mwa kuNdeeja ne Mêmè ndi mwena bupidya?”

¹⁶⁶ Nikodeme wakamba ne: “Tudi bamanye ne Wêwè udi. . . Laabi, Wêwè udi mufumine kudi Nzambi, bwalu muntu nansha umwe kî mmufwanyine kwenza bintu abi Nzambi kayi nende to.” Nwamonu anyi? Pa nanku civwa cileeja ne Yéyè uvwa mwena kwitabuuja.

¹⁶⁷ Mpindyewu, twêtù badi bamanye bwalu bulonda bwa ekeleeziya. Mpindyewu vwalaayaaku tufulu twênù twa kwela naatu meeji atu. Dîbà kî ndyanji kupita to, nwamonu’s, pa nanku teelejaayi ne ntema menemene mpindyewu nenku nênteetè bwa kuya lukasalukasa ne mwanyi mwônsò. Mêmè—mêmè ndi muswe. . . Nwateelejaayi ne ntema yônsò mukaba wa mêyi ewu. Mpindyewu, muntu kana yônsò ukaadiku mubale bwalu bulonda bwa ekeleeziya, mmumanye ne musangu wa nzànzànzà ùtùku bwena Kilisto buvwijiibwe bulongolodi, civwa ng’ekeleeziya wa Katolike wa cyena Loomo. Mpindyewu, piikalaku bîngà bikondo kumpala kwa aci, ndi muswe bwa muntu antwadileku bwalu bulonda bwa andeeje. Mêmè ewu ndi mulunda wa katapula-kateeka wa Paul Boyd, balongi banene bààbûngi baa maalu malonda. Mu birò byanyi mwamwa, ndi ne *Nsangilu Wa Paanyimà Pàà Nicée, Nsangilu Wa Nicée, Baataatù Bàà Ku Nicée*, mifundu minsantu yônsò ya ekeleeziya, yîndiku mêmè mumanye ayi. Ndi muyilonge munda mwa bidimu makumi asatu ne bisatu, muyitangile muyitangilule. Kakuvwaku bulongolodi to. Ekeleeziya wa Katolike kî mamwëndè wa bulongolodi. Tudi bamanye ne aci mbulelela. Kacya kakuvwaku ekeleeziya muvwija bulongolodi to, kakuvwaku dingumba to, too ne ku ekeleeziya wa Katolike. Ne mwaku mene *katolike* udi wumvwija ne “wa buloba bujima.” Nenku mbenze ntendeleelu wa ekeleeziya wa mbulamataadi, ne bamuteeke kumutu kwa bukookeshi bwônsò bwa Loomo, ne ùvwa mukwate ci—citupa citambe bunene cya buloba mu cikondo aci. Civwa ng’ekeleeziya wa mbulamataadi, ne aba bavwa kabayi baswe kumutumikila abu bavwa bashipiibwa. Nsangilu wa Nicée, matuku dikumi ne ataanu a mvita ya mashi, pavwa baprofeta balelela baa Nzambi, paakajuukabo mwaba awu mu byôbi abi. . .

¹⁶⁸ Ekeleeziya wa Katolike, bwa cinyi wakabanga dyambedi, mona’s, tudi bacimanye twêtù bônsò, ntu nkaadi mucilongeshe kaaba aka. Mushindu mene, mu bulelela, uvwa Akùlà ne

Piisikilà mpaasata, Akùlà nguvwa mpaasata wa—wa ekeleeziya wa mu Loomo. Paakamata Nyuma Mwîmpè dya Mpenta, Wakamacila beena Yuda baa mu ditunga ne ditunga dyònsò dya mwinshi mwa dyulu. Kadi matuku makese paanyima pa cyôci aci, Peetelo wakapeta cikeena-kumona ku musaka wa nzubu, bwa kuyaye kwa Koneeliyo, mwena Loomo, muntu mwakane, ki kusambilaye ne Nyuma Mwîmpè kulwa pambidi pende. Paanyima paa cikondo kampanda bantu baa myânzù mitumbuke kubangabo kuMupeta. Akùlà ne Piisikilà baakabwela mu—mu Loomo ne baakenza bulongolodi, anyi, kacya kabaakenzaku bulongolodi to, kadi baakateeka ekeleeziya wa kumpala wa Loomo awu mu bulongame. Nenku, paakenzabo aci, baakapeta baabo—bânà baabo baa balume ne baa bakaji.

¹⁶⁹ Nenku Kùlaùdiyò, mu bukookeshi bwende, wakiipata beena Yuda bònsò mu Loomo. Nenku ki musangu awu mene ùtù ekeleeziya wa Katolike wa cyena Loomo mwambe ne Peetelo uvwa mu Loomo. Ndeejayiku Mufundu anu umwe patupu mudibi ne Peetelo uvwaku mu Loomo, anyi bwalu bulonda kampanda budi bwambeku ne yêyè uvwamu. Kawwaku mwòmò to, bilondeshile Dîyi dya Nzambi, ne Dyòdi adi ki dîndi mêmè ngiitabuujja. Ne mmushindu kaayi mene uvwaku Peetelo, mwena Yuda, mwa kutwala dikuukwila dya mpingu ne bintakanyi bivwabo naabi, bya dikuukwila dya mpingu ne bikwabo abi? Mpenyi . . . Nwamonu anyi? Mmunyi muvwaye mufwanyine kulwishangana ne dilongesha dyende yêyè mwine mwab'ewu? Lukutukutu's. Nansha beena Mishòònyì paabo kî mbapite paa aci to. Indilaayi, netukafiikeku paanyima paa katanci kakese, mu citupa cikese emu, bu Mukalenge mwa kwanyisha. Monaayi. Monaayi mpindyewu, tudi tusangana ne mwanangu mwine udi ekeleeziya wamba ne Peetelo uvwa mu Loomo awu, ngudi maalu malonda amba ne Kùlaùdiyò (ne Bible mmucyâmbè pende) wakatuma dîyi bwa beena Yuda bònsò kupatukabo mu Loomo.

¹⁷⁰ Ki Pòlò kupicilaye mu Efeso e kuyaye too ne ku nseke mitumbuke kwaka, kusanganaye bayiidi aba, ne kwòkò aku mukuye mukakumbule Akùlà ne Piisikilà. Paanyima pa dyumuka dyabo, ki bânà beetu baa beena Loomo bàvwà mu ekeleeziya awu kubangabo kudifwimbila ngenyi yabo bôbò, ne kusakidilabo dikuukwila dya mpingu. Ki pashiishe mu bukookeshi bwa Constantin, mwena mamwëndè uvwa mwena Kilisto mulelela ne uvwa utekemeni ne mwanende wa balume neikale mwena Kilisto awu, kadi yêyè wakashaala mwena cidiidi. Nenku wakamona ne bantu bààbûngì baa mu Loomo, anyi citupa cinene cyende, baa mu milongo ya bapele, bakaavwa bamane kwitaba lupandu mu Kilisto. Ki pashiishe kubangabo kwenda bashaala batambe kumanyika bikole, bwalu bakaavwa bapwekesha Venus ne bazanjika Mariya, bapwekesha Jupiter ne bazanjika Peetelo, ne bikwabo bu nanku ne—ne bayiidi, nenku ki kwikalaci ntendeleelu uvwa mutambe kumanyika bikole.

Nenku bavwa bantu baa bukutu. Bôbò, beena Kilisto bôbò kaayi bavwa bafwanyine kufwa!

¹⁷¹ Ki ekeleeziya wa Katolike kwambaye ne: “Twètù ki bavwa mbangilu.” Aci’s ncyá bushuwa menemene, ekeleeziya wa Katolike wakabanga Dituku dya Mpenta. Kadi cyakamupatula ncyôci eci: wakadivwija bulongolodi ne kubwejamu (muumuke ku Dìyì) mēyì maswika. Nenku dīyì diswika dya ndekeelu, nwētù bàkaadi ne bidimu bipite pa dikumi nudi mwa kuvuluka dīyì diswika dya ndekeelu adi: dyambwibwa dya Mariya, kukaadi bidimu bitwe ku dikumi. Dīyì diswika dikwabo disakidila ku ekeleeziya’s. Pamutu paa Mufundu, ndīyì diswikaka! Nenku nebakufikishe ku dyumvwa anu patudi twakulangana apa ne, bôbò kabeena “bacyuka cidi Mifundu yamba to, anu cidi ekeleeziya wamba.”

Bôbò, nsaserdose awu undondela, wamba ne: “Nzambi udi mu ekeleeziya Wende.”

Mémè kwamba ne: “Nzambi udi mu Dīyì Dyende.”

¹⁷² Yèyè ne: “Ee, Bible awu’s udi anu bwalu bulonda bwa ekeleeziya Katolike wa ku cibangidilu.”

¹⁷³ Mémè ne: “Nanku’s mémè ndi mwena Katolike wa ku cibangidilu.” Mémè ne: “Aci’s cidi cimvwija mémè mwena Katolike mukutambe ne wèwè, peebe nsaserdose mujima.” Nwamonu anyi? Mémè ne: “Piikalabi ne ng’aci, nanku’s ki cîndì mémè.” Mémè ne: “Udi umona’s, mémè ndi ngiitabuuja menemene anu cyakalongesha bapostolo aci. Wèwè udi witabuuja cidi bantu babwejemu.” Nenku ki mushindu awu wakabangaci menemene. Ncyá bushuwa, ki mwakabangaci. Cyakabanga nanku, anu mushindu awu menemene.

¹⁷⁴ Mpindyewu monaayi, maalu malonda, ki kubangabo benda basakidila mēyì maswika, dīyì diswika, kadi paakalwa Pôlò, tudi bamanye ne, bilondeshile maalu malonda, kaakayaku nansha kakumbula ekeleeziya wa kumpala awu to, bwalu kavwaku mwa kutwala dikuukwila dya mpingu to. Kadi wakakumbula ekeleeziya mwibîdì uwwabo benze awu, ekeleeziya mwibîdì wa Loomo awu.

¹⁷⁵ Nenku paakalwa Nsangilu wa Nicée awu, mwakapetela Constantin meeji a kusanga bukalenge bwende. Cintu cyôci cimwecimwe cyakenza Aakaba ne Izabela, paakaselanganabo kuntwaku. Nwamonu anyi? Nenku paakapetaye mpunga wa kusanga cisamba cyende bwa kucivwija ditunga dya bukole, kudiyambidilaye ne bavwa mwa kwangata ntendeleelu wabo awu, ki kubenzelaye ntendeleelu wa ekeleeziya wa mbulamatadi. Nenku paakenzabo Nsangilu wa Nicée awu, ki nkonko eyi kajuukayi bwa kumanya ne kuvwa Nzambi umwe, anyi yisatu; bwa ne bivwa bikengela kubatiizabo mu Dîna dya Yesu Kilisto, anyi dya Taatù, Mwânà ne Nyuma Mwîmpè; nkonko mikwabo yônso yàkafiikishà ku—ku diteetangana dya

makanda muntwamu eyi. Nenu, paakenzeka aci, bamwe baa ku bapofeta baa kale abu kujuukabo kuntwaku kabayi ne cintu to anu ciseba cya mukooko cidijingila mu cifuka, ne biikale badya bisoosa. Cya bushuwa's! Kadi bantu banene baa myânzù mitumbuke abu bakaavwa bamane kuditapila njila mu ekeleeziya amu, kubabwikidijabo mukana ne lungenyi lwa pa buloba. Kadi bôbò bavwa ne EMU MMUDI MUKALENGE WAMBA. Yèyè kubwela mu mîdimà ya cimpangaanu munda mwa bidimu bitwe ku cinunu.

¹⁷⁶ Kadi kupatukaye cyakabidi, ku ditoloka. Ncya bushuwa. Kwèna mwa kuMushipaku to. “Mémè nêngààlujululè, mudi Mukalenge wamba, bidimu byònsò byakadyabo kudi bintu ebi abi.”

¹⁷⁷ Mangumba awu kusakidilawu dîyì diswika. Nenu bwa kwenza cyôci eci, bwa kusakidila dîyì diswika, mushindu umwepele udi ekeleeziya kana yònsò ewu, mushindu umwepele udi dingumba kana dyònsò edi mwa kuseesuka ku Dîyì dya Nzambi, nkusakidila kwa dîyì diswika pamutu paa Mifundu minsantu, nkuteeta kudyzenza bilele byenu anyi dilongesha dyenu dya ekeleeziya wenu, nansha mudibi bibengangana ne Mifundu amu. Dîbà adi mmunyi munudi mwa kupiisha ekeleeziya wa Katolike, panudi nwenza cintu cimwecimwe cyakenzabo aci? Nudi bumvwe anyi? Eyo. Padibi ne, elaayi anu meeji mpindyewu, Mifundu kayeena mwa kupangilaku to! Mèyì maswika's mmashimi, twamb'eku twamb'eku. Nenu paudi anu witaba dingumba, ukaadi ne dîyì diswika, bwalu ncintu cisakidila. Kacyena mu Mifundu to. Kacyena mu Mifundu to.

¹⁷⁸ Kakutuku cintu paaci ne mbulongolodi to. Kacya Yesu kaakambaku ne: “Ndi nnutuma ne mudimu bwa kuya pa buloba bujima, nukenze bulongolodi” to. To, mukalenge, cintu bu nanku to! Kwenza cyôci eci, nkubenga Mifundu minsantu. Paakenzeka cyôci eci, cyakashintuludiibwa kuumuka ku “Ekeleeziya ku dilediibwa” kuya ku “ekeleeziya ku dîyì diswika ne twitabaayi.” Kî ng'ekleeziya to, swayi nnulombeku luse; diswa! Wèwè udi ulediibwa mu Ekeleeziya, kadi udi ukashaala wa mu diswa. Kî ng'ekleeziya wa ba-Baptistes, ekeleeziya wa ba-Méthodistes, ekeleeziya wa beena Mpenta to. Ndiswa dya ba-Baptistes, diswa dya beena Mpenta, ne diswa dya ba-Méthodistes, ukashaala wa mwômò amu. Kwèna mwa kushaala wa mu Ekeleeziya to. Kakutuku cintu bu nanku to. Udi mulediibweMu. Ki cyakambilabo Nikodeme. Pa nanku nudi bamone kunukaadi aku anyi? Kaa, ekelekele!

¹⁷⁹ Ki bwa cinyi mémè ndi mbengangana naaci. Kî nkubengangana ne bantu bàdimu abu to; ndongolwelu ki wùndi mbengangana nende. Bwalu kabeena mwa... Umwe wa ku bakulu abu anyi cintu cikwabo kampanda, umwe wa ku ekeleeziya ayi uyiisha cintu kampanda cidi mu Bible ewu

cibengangana ne dilongesha adi, mukanda wa mēyi makulu udibo naawu mu ekeleeziya amu awu, badi bamwipatamu anu buludi mushindu awu. Eyowa's, mukalenge. Bamwe baabo biikale ne lwonji lwa menemene mu mushindu wa kabayiku nansha mwa kwitaba bwa ditabuluja kulwadi mu ekeleeziya mukwabo to anu byôbi biikale ne ngumwe wa ku bantu baabo bôbô. Mona's, mbatambe kwikala . . .

¹⁸⁰ Muntu kampanda mûngà musangu uvwa ukeba kupa muyiishi kampanda . . . Anu muneemu mu ditunga edi, muyiishi kampanda mukese wa kale mwimane kwinsi eku mu musèsù, wela mbila utendakeena bantu bwa kunyingalalabo, wamba ne: “Lwâyi, nwakidile Kilisto, nuujiibwe tente ne Nyuma Mwîmpê,” ne bintu bya mushindu awu. Kadi muntu mukwabo wa mu bulongolodi kampanda bwa cyena Mpenta kulwaye mwab'awu ne kupeeshaye muntu ndola umwe mu byanza, ne bivwa bikengela bwa yêyê kuya kanyingala bwalu uvwa mwende masandi maticishe ekeleeziya wende. Nwamba peenu bwa Katolike's! Ncya bushuwa. Cibi's nudi anu bamanye mwaba wûndi ngaakwila awu, nwênù peenu; anyi ekeleeziya ewu mmumanye, nansha bishi. Eyo.

¹⁸¹ Kwenza cyôcì eci, kubenga Mifundu, padi anu cyôcì eci cyenzeka, cidi cishintuluka dîbà adi paudi usakidila dîyi diswika ne ukashaala wa mu bulongolodi kampanda, udi mwitabe buludi dyebe dîyi diswika dya dyambedi adi, bwalu kî ndya mu Mifundu to, pa nanku ncintu kampanda cisakidila. Nenku dîyi diswika ncintu kampanda cisakidila, “cyangata kaaba ka,” cidi cyangata kaaba kaa dilediibwa. Paudi witaba dingumba, wasakididi dîyi diswika. Eyo. Padi anu aci cyenzeka, dîbà adi ncishintuluke cyumuke ku “Ekeleeziya ku dilediibwa” ciye ku “diswa ku dîyi diswika anyi twitabaayi.” Bwalu, nwamonu's, ndîyi diswika anu pa dyôdi, kadiyi dya mu Mifundu to.

¹⁸² Mpindyewu, kacya Yesu kaakambaku ne: “Ndaayi pa buloba bujima nukenze mangumba, ndaayi nukavwije bantu bônso pamwe ku bulongolodi” to. Yêyê wakamba ne: “Ndaayi nukavwije bantu bayiidi.” Nudi nuciitabuujja anyi? [Disangisha didi dyamba ne: “Amen.”—Muf.] Amen. Pa nanku, nudi numona's, nudi pambelu anu peetu paa menemene apa.

¹⁸³ Teelejaayi, tangilaayi apa. Tucijikijilaayi pa cîngà cintu kampanda mwab'ewu, tupoopele cintu kampanda bikole ne musonso anu pa dîbà edi mene. Mbanganyi badi ne mbumbilu wa myaku wa cyena Ngelika, *The Emphatic Diaglott* mwangacila ku mifundu ya kale, wa cyena Ngelika awu? Eyo. Mubalaayi, angataayi mumanyi wa dibàla kana yônso unudi baswe awu. Bwelaayi mu nzubu wa disombeshilangana mikanda nwangate mbumbilu wa myaku awu, mbumbilu wa myaku wa cyena Ngelika awu. Balaayi Bwakabuulwibwa 17, nenku panwabalamu, Nkudimwinu wa Roi Jacques mwab'ewu udi

wamba, ne eci ne: “Wakangambula mu Nyuma e kuya naanyi; ki mêmè kumona mukaji kampanda musòmbe pa nyama muvwadika cilàmbà cikunze kunzuu, mûle tente ne—ne mênà a kupenda naawu Nzambi.” Mpindyewu, aci ncidi Roi Jacques mwambe. Kadi dyumvwija dya ku cibangidilu ndyambe ne:

*. . .wakangambula mu nyuma kuya naanyi. . .ki
mêmè kumona mukaji kampanda. . .mûle tente ne
mênà mapendi a Nzambi, . . .*

¹⁸⁴ Kudi dishiilangana dinene dya menemene pankaci pa “mênà a kupenda naawu Nzambi” ne “mênà mapendi a Nzambi.” Mpindyewu tangilaayi. Tudi bônso tuumvwa ne bamanye ne uvwa ng’ekeleeziya wa cyena Loomo uvwa musòmbe pa tukuna mwandamutekete awu, ukontonona makookeshi a pa buloba. Ne yêyè uvwa ubiikidiibwa ne “mukaji wa masandi,” ne yêyè uvwa “mamwëndè wa bandumba.” Cinyi? Ndumba nganyi? Mmufwanyine kwikala muntu mulume anyi? Ûdi ne cya kwikala muntu mukaji. Pa nanku yêyè mwikale muntu mukaji, ùdi ne cya kwikala ekeleeziya kampanda; yêyè uvwa mamwëndè wa bandumba, bamwebamwe anu baa bwena muvwaye yêyè amu. Kadi monaayi, tangilaayi: “Munda mwende!” Lekelaayi cinuwele. “Munda mwende muvwa mênà mapendi a Nzambi.” Ncinganyi aci? Mpindyewu, nwênù bambi badi mwab’ewu ne badi bateeleja mukaba wa mêtì, shaalaayi polaa. Mênà mapendi a Nzambi awu ncinyi? Méthodiste, Baptiste, Presbytérien, Luthérien, beena Mpenta, ne bikwabo. Mênà mapendi a Nzambi, bwalu mmalongolodi, masandi kudi Nzambi, anu muvwaye yêyè amu.

¹⁸⁵ Nnku bôbò, mu biine bisumbu abi, bantu badi bamba ne: “Mona’s, yêyè m’Méthodiste, ne udi wenza *cikampanda*. Yêyè mmwena Mpenta, ne udi wenza *cikansanga*. Yêyè m’Presbytérien, ne udi wenza *cikankenga*.” Badi benza maalu ônsò adi pa kabala-matuku awu, nudi bamanye aci. Kadi ncinganyi aci? Mmênà avwa akengela kwikala mafwanangane ne Kilisto ne abiikidiibwa ku dîna dya bwena Kilisto, kadi miikale mênà mapendi a Nzambi! Yôyi kí ng’ekeleeziya to. Badi bayibiikila “ekeleeziya” bya mafi. Mmaswa! Mpindyewu nudi numona ne mbwa cinyi ndi mbèngangana ne bulongolodi anyi? Ncyèna mbèngangana ne bantu to, ndongolwelu wa bulongolodi, nwamonu’s, mênà, mênà mapendi a Nzambi (tangilaayi) a maswa, bibiikidiibwa bya mafi ne ng’ekeleeziya. Ekeleeziya wa ba-Méthodistes, ekeleeziya wa ba-Baptistes, ekeleeziya wa ba-Presbytériens, ekeleeziya wa beena Mpenta, ekeleeziya wa ba-Luthériens, ekeleeziya Musanga wa Bânà beetu, kakûtukù cintu bu nanku to. Aci kaciyena cya mu Mifundu to.

¹⁸⁶ Kudi Ekeleeziya anu umwepele, kadi kwêna mwa kashaala wa Mwômò to. Udi mulediibweMu. Udi mudyanjila kulongola bwa kwikalaMu. Mubidi musokome wa Yesu Kilisto. . .Mubidi

musokome, eyowa's, wa Yesu Kilisto pa buloba, mwikale ne Dîyi dimweneshiibwe. Bânà baa balume ne baa bakaji baa Nzambi, kabayi baa mu nansha umwe wa ku yôyi ayi to. "Patukaayi munkaci mwabo," mudiYe mwambe. Eyo.

¹⁸⁷ Tangilaayi, lukasalukasa mpindyewu. Ncyêna muswe kunucyokeshu to, kadi bu nwênù mwa kumpeeshaku ndambu mukwabo wa tusunsa mpindyewu, nênye lukasalukasa ne mwanyi mwônsò, kadi ndi muswe bwa nwikale batwishiibwe ne nudi bacyûmvwè, bwa kanulu kucipangila to. Nwamonu anyi?

¹⁸⁸ Vulukaayi ne, maamù Loomo awu, baakasangana munda mwende, mùle tente ne mênà mapendi a Nzambi, mamwëndè wa bandumba. Pashiishe, piikalabo ne mbandumba, ndumba nganyi? Mukaji wa masandi nganyi? S'ncintu anu cimwecimwe ne ndumba. Mmukaji udi ne nsômbelu wa mupange lulamatu ku mucipu wende wa dibaka. Ne ekeleeziya kana yônsò udi udyamba mudiye Ekeleeziya wa Kilisto, kadi uvila Dîyi dya Nzambi, mmupange lulamatu ku mucipu wende wa dibaka! Dîbà adi udi wenda masandi mu kusakidila kwa dîyi diswika, wenda masandi ne baa pa buloba ku lungenyi lwende, pamutu paa kwitabayè Kilisto ne bukole bwa dibiika Dyende dya ku lufu ku Nyuma Mwîmpè. Ne yêyè udi mamwëndè wa bandumba badi benze cintu cimwecimwe aci. Lwesu lwa mishila kalwena lupenda mbidika wa diipikila café mudiye "mukwate mfuta" to, nudi bamanye's; nwamonu's, maanyi mu nkunde, nkunde mu maanyi. Bamwe baa ku bantu aba mbaye lubilu benda anu baseka beena Katolike, paabo biikale bakashaale bôbò biine baa ku cimwe cya ku bya cintu cimwecimwe aci. Yêyè's ki uvwa mamwëndè wa dibatiiza dya mashimi dya mu mâyi. Yêyè's ki mamwëndè wa cijaadiki cya mashimi cya Nyuma Mwîmpè, kadi nwênù kuya nwenda numulonda muunyima. Mpindyewu twânji tumonaayi.

¹⁸⁹ "Neya bushuwa anyi, Mwaneetu Branham?" Shaalaayi polaa katanci kakese cyanaana.

¹⁹⁰ Nwamonu's, yêyè's ki mamwëndè wa mênà mapendi a Nzambi, wa maswa adi bantu bakashaale baa mwômò awu, ne batwala bundu, biikale ne nsômbelu wa mushindu kana wônsò, bavwala tuputululu, bakaji biikale ne nsuki mibebula, ne kwîsu kulaaba bilaabu, bimba mu maakorale, banwa mfwanka, badya meesa a Mukalenge, bukooya bwa pa buloba bwa mishindu yônsò, ne ciine aci ciikale dibwe dya cilendwishi kudi mwena bupidya. Timote kaakacyambaku anyi, Nyuma Mwîmpè? Tangilaayi. Nwamonu's, yêyè, Loomo, ki mamwëndè wa yônsò wa ku yôyi ayi. Nwamonu anyi? Nudi benze menemene mu bulongolodi bwenu anu bu cyakenzaye yêyè aci, nwelamu mêyi maswika pamutu paa Dîyi, bwalu musumbà wa bantu mmuciswike, bakulu ne beepiskoopo ne bikwabo mbambe ne

bidi bikengela kwikalabi mushindu *kampanda*, nenku aci's ki cyakenzeka menemene ku Loomo. Kadi teeta, wèwè mwaneetu mpaasata, bwa witabe Dîyi dya Nzambi mu kaabujima, kadi, umone kuwaya, buludi pambelu paa ciibi! Mpindyewu netumone piikalabi ne Nzambi mmukwambile bwa wèwè kucyenza, anyi ki mmukwambile, mu ndambu wa tusunsa emu. Nwamonu anyi? Eyo.

¹⁹¹ Nwamonu's, yêyè ki mamwëndè wa umwe ne umwe, bwalu yêyè nguvwa wa kumpala wa kuumushila byâkafundiibwà mu Mifundu ne kusakidila dîyi diswika, bwalu yêyè wakabenga baprofeta balaaba bàvwà ne nsòmbelu mushindikiibwe, bàvwà ne Dîyi abu. Bwa kwangata luumvu lwabo, lwa bantu baa meeji matwe, Bakookeshi baa bukalenge bwalabale bwa Loomo, ne bikwabo, bàkaavwà biitabe bwena Kilisto abu, kadi baswe . . . kuciitaba mu mushindu wabo bôbò. Nwamonu anyi? Neya bushuwa. Mbaciswe mu mushindu wabo bôbò.

¹⁹² Naamànà uvwa ujinga kuumushiibwa nsudi yende mu mâyi a mu ditunga dyende yêyè, kavwa muswe mâyi a bitoci a Yadene to. Kadi bwa yêyè kuumushiibwa nsudi yende ayi, byakakengela bwa kwendelaye mu bitoci amu anu menemene muvwa muprofeta mumwambile amu. Nwamonu's, Nzambi katu usunguluja bantu to.

¹⁹³ Monaayi, yêyè nguvwa dingumba dya kumpala. Tangilaayi numone bânà bende baa bakaji, mbenze cintu anu cimwecimwe aci, basakidile twitabaayi ne mêyi maswika pamutu paa Dîyi. Kanungambidiku to; ndeejaayi umwepele udi kayi muye kule naaDi. Ndeejaayi mpaasata umwepele wítabakú Bulelela abu, bôbò kubenga kukwipacilaci, s'anu wèwè mutambe kumanyika mu mushindu wa ne, nudi bamanye's, bikengela bakulamate bwa buulwakamanyabo bwebe abu anyi bwa cintu kampanda. Bidi anu bimpè.

¹⁹⁴ Mpindyewu tangilaayi numone Bwakabuulwibwa 18, bwa tusunsa tukese cyanaana, mvensa udi ulonda awu, nshapita udi ulonda awu, paanyima paa Bwakabuulwibwa 17 mumane kukenketa ne—ne mumane kuleeja bwalu busokoka bwa yêyè Mandemwazele Babuloona ewu. Nshapita wa 17 wa Bwakabuulwibwa udi wumvwija ne yêyè ng'ekeleeziya udi musômbe pa tukuna mwandamutekete, Nsesa ya Vatican, udi ukookesha bamfumu bônso baa pa buloba (aci's ki cya bushuwa menemene), ne Bamfumu baa matunga kabidi, ne bikwabo. Uh-huh. Pa nanku, kadi's nyêyè awu mwab'awu, mukwate bubanji bwa buloba bwende mu cyanza cyende. Aci's mmwômò menemene. "Udi mukumbane mwa kwenza nende mvita nganyi?" Neya bushuwa. Twêtù bônso tudi bamanye aci. Kadi bwa cinyi udi muswe kushaala wa mu cintu kampanda cidi ciswikakane nende? Mpindyewu monaayi mu nshapita wa 18, nshapita mene udi ulonda paanyima paa bwalu busokoka

bwende abu bumane kumvwijiibwa. “Musòmbe mu ntempelu wa Nzambi.” Mpindyewu, kaaba aka, dīngà dituku . . .

¹⁹⁵ Zella Braitman, udi kaaba aka diloolo edi anyi, Zella? Yêyè wakatwala, cidi mu cibambalu mwamwa patudi twakulangana apa, *Mutùkùmbudi Wetù Wa Dyàlumingu*, cibejibeji cya beena Katolike. Nenku cibejibeji cya beena Katolike eci civwa cyandamuna mwambi kampanda. Cyamba ne: “Muwāmbi, wa kuneemekiibwa, ne kuvwa . . . Mu nomba wa cyena Loomo udi kumutu kwa Vatican kwaka, anyi kumutu kwa nkwaswa wa butumbi wa Paapà, mbafunde ne: ‘Vicariivs Filii Dei,’ ciikale cyumvwija ne, cyôci aci,” -mu ntenji wa Katolike mwamwa ne, “aci ki no—nomba wa nyama wa lwonji wa mu Bwakabuulwibwa anyi?”

¹⁹⁶ “Mona’s,” mwakambaye, “bulelela’s, nyêyè. Ki mudici menemene, cipàtula ku dileeta ku dileeta nkama yisambombo ne makumi asambombo ne yisambombo. Ki mudici menemene.” Ne ntenji wa Loomo mmucitābe, ne ki cidici cyumvwija. Kadi dyandamuna dyabo ndyôdi edi, dya meeji matwe, dya dyûle tente ne lungenyi adi, kwambaye ne: “Kadi, udi mumanye’s, dīnà dyebe adi mu mwakulu mukwabo kampanda’s ndifwanyine kupatula ku dileeta ku dileeta anu cintu cimwecimwe aci.”

¹⁹⁷ Muntu ewu kwambaye ne: “Dyanyi mêmè edi, dīdi dyamba kuumvwija cintu cimwecimwe aci mu mwakulu kampanda.” Yêyè kuditeela ku dileeta ku dileeta. Kwambaye ne: “Wamonu’s, ndi ngamba kufika anu ku nkama yisambombo ne makumi asambombo ne yisambombo, mêmè paanyi.” Yêyè ne: “Adiku nkama ne nkama.” Yêyè ne: “Musangu wōnsò udi cintu kampanda cijuuka, muntu kampanda udi anu ne nkama yisambombo ne makumi asambombo ne yisambombo ayi.” Ki kwambaye ne: “Wa kuneemekiibwa, utuku mumanye ne mu mwakulu kampanda dīnà dyebe wêwè mwine adi ndifwanyine kuumvwija ku dileeta ku dileeta mufwilakanyi ne Kilisto anyi?” Yêyè ne: “Bwa cinyi udi wêwè utangila ku bintu bya mushindu bu nanku’s?” Tangilaayi numone lungenyi.

¹⁹⁸ Kadi Nyuma Mwîmpè’s mmumanye bîmpè kupita apu. Tangilaayi. Aci ncifwanyine kwikala nanku, dīnà dyanyi ndifwanyine kupatula nkama yisambombo ne makumi asambombo ne yisambombo, kadi ncyèna nkumbanangana ne ngiikadilu mikwabo yōnsò ayi to. Mêmè ncyèna musòmbe pa kakuna kampanda to. Ncitu ngamba bintu *kampanda* to. Ncyèna nguvena to, nudi numona’s. Ncya bushuwa. Awu ngudiYe wamba. Pa nanku lungenyi lwebe lwa pa buloba alu’s ludi lulwa cijengu, mukalenge, ncya bushuwa, mu Bwikadi bwa Nyuma Mwîmpè. Mêmè ncyèna nkumbanangana ne bikwabo abi to, kadi yêyè udi ukumbanangana naabi. “Musòmbe mu ntempelu wa Nzambi, udileeja mudiye yêyè Nzambi, ne musòmbe pa tukuna mwandamutekete.” Mêmè ncyèna musòmbe pa tukuna

mwandamutekete to, piikaladi dipatula nkama yisambombo ne makumi asambombo ne yisambombo ku dileeta ku dileeta. Ncyêna nkumbanangana ne bikwabo abi to, kadi yêyè udi ukumbanangana naabi. Nwamonu's, ki bwalu mbwôbù abu's. Nwamonu anyi? Pa nanku ikala mweyemene anu Nyuma Mwîmpè ne: "Kwedi meeji bwa ciwikala mwa kwamba to, bwalu kî ngwêwè udi wakula to; n'Taatù."

¹⁹⁹ Dîbà adi mmunyi mudi lungenyi lwebe ne Dilediibwa dyebe dya ku Dyulu mwa kukumbanangana ne bintu bidi panu pa buloba apa ebi, beena majimbu baa bukole bàdîmu aba—aba? Mona's, bôbô's mbacimanye ne mu kakanu. Mmunyi muvwa Môsà mwa kwimana paakalondaye Mikenji ya Nzambi, bwa kwelaye dikombo dyende panshi ne kwandamukadi nyoka, kadi ki beena majimbu balwalwa aba e kwenzabo cintu cimwecimwe aci? Kadi Môsà wakashaala mupuwe, mumanye ne uvwa mulonde Dîyî dya Nzambi, ne nyoka wende kuminaye mikwabo ayi. Nwamonu anyi? Dîbà adi paukaadi mutumikile ne mupete. . . Ncinyi civwaye mwa kwenza paakabalombolaye ku buloba bwa mulayi, ne Mbû Mukunze mubàjîngile eku ne eku, kadi kajila kaa Nzambi kaakapicilamu anu buludi. Amen. Kwambaye ne: "Shaalaayi bapuwe, kadi numone Butumbi bwa Nzambi!"

²⁰⁰ Padici mu kajila kaa mudimu, kaa dilonda dya Dîyî, imana wêwè anu kaaba aku kadi umone mudici cidikangulukila. Amen. Mêmè's nkaadi ne bidimu makumi ataanu ne bisatu, mwikale mMukwacila mudimu kukaadi bidimu bitwe ku makumi asatu ne bisatu, njinga ne ngîkalakù ne bidimu milîyô dikumi bwa kuMukwacila mudimu. Kacya nцитuku mwanjî kumona Yêyè mupangile to, padi Dîyî Dyende dilamiibwe. Ncya bushuwa.

²⁰¹ Mpindyewu tangilaayi, dyakamwe paanyima paa mpekaatu wende awu, minsokontu yende yakatandudiibwa. Tukaadi bamone aci kukaadi ntanta mule, tudi bacimanye.

²⁰² Mpindyewu nshapita udi ulonda awu, tangilaayi ku Bwakabuulwibwa 18. Swayiku mbuululemu anu bwa kasunsa kamwe cyanaana. Ncifwanyine kwikala cintu cya cîmpè, necîtwângatè anu ndambu mukwabo mukese wa tusunsa cyanaana, ne ncifwanyine kwikala kaacintu kakese kaa mushinga kunudi. Ndi ntekemena ne ki mudici.

²⁰³ Mpindyewu tudi tumona kaaba aka, mu nshapita wa 17, mvensa mwi5 ewu:

*. . . pa mpala pende pavwa dîna difunda ne: BWALU
BUSOKOKA, BAABULONA MUNENE, MAMWÈNDÈ
WA BANDUMBA, CINYANGU CYA BULOBA.*

Kadi tangilaayi.

*Nenku mêmè kumona mukaji awu (ekeleeziya)
mukwacike ne mashi a bansantu, kabidi ne mashi*

*a bafwile diitabuuya dya Yesu: . . . pângààkamumònà,
mémè kukema ne dyanjina dikole.*

²⁰⁴ Nwamonu's, pa kumumona, yêyè uvwa cintu cilenga cya dikema. Ne yêyè uvwa mamwëndè wa bandumba, ntendeleelu ndumba, mangumba, anu menemene cyakenzaye, nwamonu's, bwalu mbabwejemu mêyì maswika anu mwakenzaye yêyè amu. Mpindyewu tangilaayi, tangilaayi numone Bwakabuulwibwa mpindyewu, awu nshapita wa 17, ujika ne mvensa wa 18. Mpindyewu tangilaayi numone.

. . . paanyima paa maalu aa (paanyima paa bwalu busokoka bwende bumane kutandudiibwa), paanyima paa maalu aa mémè kumona mwanjelo mukwabo upweka ufumina mu dyulu, mwikale ne bukole bunene. . .

²⁰⁵ Mpindyewu, ki musanjeela mukwabo udi upweka ewu, nshapita udi ulonda awu, bwalu busokoka bwende bukaavwa bumane kutandudiibwa. Mpindyewu, mpindyewu edi ki ditandudiibwa dya bwalu busokoka bwende ne dya bwalu busokoka bwa bânà bende. Nwamonu's, tudi tuumvwa mpindyewu menemene cyakamuvwija ndumba: bwalu wakenda masandi mutombokokele Dìyì dya Nzambi. Nenku ki cyôcì aci cyakamuvwija bulongolodi. Yêyè kavwaku mwa kushaala ekeleeziya wa Bible kadi kwitaba cyôcì aci to. Nansha bulongolodi kana bwónsò budi kabuyi bwangata Dìyì Dyende dyónsò ebu (mushindu ùdìDi difundiibwe awu) kabwenaku mwa kwikala ekeleeziya wa Bible to. Nenku kakwenaku nansha bumwe bwa ku wòwò budi mushindu awu to, bündiku mémè ewu mumanye, nansha bumwe. Pa nanku mwab'awu, nwamonu's, padiye anu ne wădivwiji bulongolodi, cintu mene cidie wenza, (ne ku Mifundu ne ku cijaadiki) udi umba ufwu anu mwab'awu, padiye anu witaba diyì diswika adi. Mpindyewu tangilaayi, mpindyewu ki cyakenzeka ncyôcì aci.

²⁰⁶ Nzambi wakatuma, mu nshapita wa 18 ewu, mwanjelo wa bukole, paanyima paa bwalu busokoka abu bumane kumanyika, mwanjelo wa bukole, anyi, musanjeela kampanda. Tangilaayaaku mwaba ewu.

. . . paanyima paa maalu aa mémè kumona mwanjelo mukwabo upweka ufumina mu dyulu, mwikale ne bukole bunene; ne buloba bwakakenkeshiibwa kudi butumbi bwende.

Ne yêyè wakeela lubila. . . lwa diyì dikole, . . . Baabulona (cibwejàkàji) munene udi munkaci mwa kuupuka, . . . ne ukaadi mushaale cisòmbedi cya baadémons, . . . cisokomenu cya nyuma mukooyike yónsò, ne nsanji wa cyónsò cikezuke ne cya lukinu. . . nyuanyi yónsò mukooyike ne wa lukinu.

*Ne matunga ônsò akaadi manwe mvinyo wa ciiji cikole
cya ku masandi ende, ne bamfumu baa pa buloba . . .
mbende nende masandi, ne bangèndààmùshìngà baa pa
buloba mbabanjike ku búngì bwa kabutu kende.*

207 Tangilaayi, dyakamwe paanyima paa bwalu busokoka bwende bumane kumanyishiibwa, ne yêyè uvwa nganyi, ne yêyè uvwa cinyi, ne bânà bende baa bakaji abu bavwa mbanganyi, bwalu busokoka abu bwamanyishiibu, pashiishe Nzambi kutumaye mwanjelo, musanjeela bwa (kwenza cinyi?) kubiikila bantu bwa kupatuka ne: “Patukaayi!” Mukenji wa dîbà!

*. . . Patukaayi munda mwende, nwênù bantu baanyi,
bwa kanulu kwikala baabanyanganyi baa bipupu
byende . . .*

Yêyè neamwele mulawu. Tangilaayi numone.

208 Patukaayi munda mwende! Nzambi mmutume bààbúngì . . . mwanjelo wa bukole, anyi, musanjeela. Ne Bukênkè bwende kabuvwa mu ditumba kampanda to, Bwôbò bwakatangalaka pa buloba bujima. Patukaayi munda mwende! Cinyi? Mwende yêyè, ne mwa bânà baabo baa bakaji, kabidi. Bwa kukenkeshila buloba, ne kubiikila bantu Bende bwa kupatukabo munda mwende. Mpindyewu, s’nudi bamanye ne aci m’Bulelela. Musanjeela wakatumiibwa ufumina mu Dyulu, bwa kubiikila bantu baa Nzambi bwa kupatukabo mu Baabulona. Ne Bukênkè bwende bwakakenkeshila buloba, Nyuma Mwîmpè munene awu.

209 Monaayi, Bible mmwambe ne: “Yêyè nnsanji, ne mmukwate nyuunyi ya lukinu, ne mikooyike.” Kadi, kî mmikanku to, to, to, to, to. Biminyi, “nyuunyi mikooyike, ya lukinu,” ki yidiye mukangile mu nsanji mwaba udiye awu. Yêyè nnsanji mùle tente ne yôyi ayi, nsanji mùle patapata. Mùle ne cinyi? “Mênà mapendi a Nzambi,” bibengangana ne Mifundu’s. Timote Mwîbîdî 3 mmwambe, Nyuma Mwîmpè wakula ne: “Mu matuku a ndekeelu nebuumuke ku Diitabuuja ne nebatume ntema ku nyuma miseeswishi.” Mmwambe kabidi, Nyuma Mwîmpè mmwakule wamba ne: “Mu matuku a ndekeelu nebiikale beena mitu mikole, badîbândishi.” Beena lukinu: “Nzambi abeneshiibwe, ikala wa ku twêtù, anyi wêwè kuyi ne dînà dyebe mu mukanda wetu to, udi mujimine.” Hmm. Beena lukinu! Bakooyike! Hmm. Ndi ntekemena ne ncyêna munkaci mwa kutapangana ku mwoyi to, ndi ntekemena ne ndi munkaci mwa kwenzelangana bîmpè. Nyuunyi ya lukinu, mikooyike, yêyè mmuyikangile mu nsanji.

210 Vulukaayi ne, Nzambi m’Mukanku. Utu muDibiikile Yêyè mwine bu Mukanku. Ne Yêyè wakabiikila Yakobo ne mmukanku. Ne twêtù tudi twânà Twende twa mikanku. Amen. Wakabiikila baprofeta Bende bu “mikanku.” Nenku mwanjelo

ewu wakapweka panshi bwa kwela patooke ne kubiikila bantu bwa kupatuka!

²¹¹ Mbyenze bu kaadiyiisha kaanyi kaa pa *Mukankù Úsaasulula Diswa Dyàwù*. Kaamukanku kakese kaa kale aku kavwa anu kenda kalonda dîbà dyònsò nzoolo wa cikuka wa kale awu eku ne eku mu lupangu lwa nzoolo amu, utuuta cyokòcyokò mu mwaba awu, kadi kòkò kakavwa mwa kudya bintakanyi bivwaye naabi abi to, bya tusumbu twa ditanta, ne bya bakaji balaabe bilaabu kwîsù, bya nsuki mibebula, ne bya tuputulu abi. Kakavwaku mwa kwenza abi to. Kadi kakavwa mwa kumanya cîngà cintu to anu cyokòcyokò ya nzoolo wa cikuka wa kale awu. Kadi dîngà dituku maamù mukanku kukàpetayè. Kwelaye lubila lukole, ùkàbìikila, wàmba ne: “Mwanaanyi wa balume, wèwè kwèna umwe wabo to. Patuka munda mwende!”

Kwambaku ne: “Maman, ndi mwa kwenza cinyi’s?”

²¹² Yèyè kwamba ne: “Tuuta mapwapwa ubange dibuuka.” Ditupika dya kumpala, kòkò e kudituuta ku dikunji, anu munkacinkaci mwa bulongolodi kampanda menemene. Kwambaye ne: “Mwanaanyi wa balume, nebikengele bwa wèwè kubànda kupita apu bwa cyanaana ncyèna mwa kukubakulaku to. Bikengela ujuuke uumushe makàsà ebe awu pa buloba.” Yèyè neàkàmbùlè mu dibuuka. Kòkò kujandula ne kavwa mwa kubuuka. Yèyè uvwa mulwe bwa kumubiikila bwa kupatuka. Neyà bushuwa.

²¹³ Kadi Maamù Baabulona ewu uvwa mudikwacile musùmbà mujima wa nzoolo, mikumbu ya nzoolo ya mubidi mufinunuke, ya bilaabu kwîsù, ya nsuki mibebula ayi, badibiikila mudibo “beena Kilisto.” Yèyè udi naabo nsanji tente. Nwènù bayiishi bàdi bìimanà mu cyambilu kadi nulekela bakaji abu benza bintu abi kabayi badimwishiibwa to, bundu bwenu, bwa kubavudija mu dingumba dyenu. Nzambi neanulombe cyòci aci ku byanza byenu. Patukaayimu! “Mikooko Yanyi yidi yumvwa Dîyì Dyanyi.” Nsanji wa beena lukinu, beena mitu mikole, badibàndishi, banangi baa bisankasanka kutamba kwikala banangi baa Nzambi, baswe kwikala bafwanangane ne baa pa buloba kutamba kwikala bafwanangane ne Kilisto. Paudi anu umona mukaji ne bilaabu kwîsù búngì kabuyi kwamba, abi’s bidi bileeja ne yèyè awu udi munda anu mutupu. Ngwa mafi munda mwende amu. Aci’s ncyà bushuwa menemene. Pìikalà mukaji awu. . . Mvwa mumone mukwabo dîngà dituku, ne nsuki ya màyi a matamba, ncyà bushuwa, mwikale ne bintu byònsò bya màyi a matamba abi mwîsù.

²¹⁴ Mpindyewu, bu ne wèwè—bu ne—bu ne wèwè kuvwaku ne nsuki miine to, kadi—kadi ujinga kwasaku nsuki kampanda, s’mbifwanyineku kwikala bìmpè, kadi, wavwalaku ya mmwenekelu wa ya muntu’s. Ne bu ne kuvwaku nansha ne nzadi ya ku minu to, kadi—kadi ujinga kupetaku nzadi ya

ku minu, kwangaci ya mifwanangane ne bizubu bya nkunde mitooke ya nzengu to, wângatakù—wângatakù nzadi milelela ya ku minu. Pawikala kuyi ne cimwe cya ku byôbì bintu ebi to, abi kaayi mbîmpè. Pawikala kuyiku ne mênù to, wângatakù mênù kampanda bu bôbò mwa kukwenzelawu, wangate ôwò awu. Kadi kutuudishi mênù ebe adi Nzambi mukupeeshe awu anu ne bwalu mmakonyangale ndambu, paawu miikale mênù mîmpè, bwa kupeta makwabo to. Kulaabishi meekala mu nsuki yebe, anyi cintu kampanda, bwa kwikalayi ne mmwenekelu wa cintu kampanda cya cipatukile mu mwaba kampanda wa bitoci to. Kwikadi. . . Pawikala kuyi wa diikala kampanda to, kadi ujinga kudivwija bu ne mmwenekelu wa diikala kampanda, bidi anu bîmpè, mûndi ndifwanyikijila. Kadi kudivwiji mufwanangane ne Izabela to, mwenze bu cikumbi cya mwaba kampanda cilaaba mukubu.

²¹⁵ Kadi nwênù bânà beetu beena Mpenta, bàdì bàlekelà bakaji abu bakosa nsuki, pàdì Bible wamba ne mbutumbi bwende! Kabidi kî mbikumbanyine bwa yêyè kusambila ne nsuki yende mushindu awu to. Kadi nansha nanku numulekela ùbànda mu cyambilu bwa kuyiisha Evanjeeliyo, wimba mu korale, ùlongesha mu kalaasa kaa Dyalumingu. Bundu bwenu! S’bivwa bikengela nwênù kudyumvwaku bundu’s. Mêmè ndi mbengangana ne bulongolodi bwa cinyi? Nudi nwela meeji ne ndi mufwanyine kutwa cintu bu nanku nyama ku mikolo anyi? Ndi mumanye bwa cinyi udi ucyenza, wêwè mwaneetu wa balume. Udi mumanye cidi cîmpè, kadi wêwè mudidinge anu mulongeshe bibengangane ne cyôci aci, badi bakufunda ku ciimamwëndè-wa-bukalenge, ne nebakwipate. Nzambi abeneshiibwe bwa dikima dyebe bu wêwè mwa kucyenza. Ncya bushuwa. Nzambi neakutwe mushinga.

²¹⁶ Cyakamba mwanjelo ewu ncinyi? “Patukaayi munda mwende!” Eyowa’s, mukalenge. Mwanjelo ewu wakalwa pa buloba, ne wakalwa bwa kutwala Bukênkè, ne wakakenkesha pa buloba bujima ne Bukênkè abu. Ûvwa mwanjelo wa bukole. Ne yêyè wakalwa bwa kutangalaja Mukenji wa ne “Patukaayi mu Baabulona! Kanulengi bintu byende bikooyike abi to!”

²¹⁷ Ûdi ne nsanji mujima mûle naabi tente. Mwambe ne: “Yêyè ki nsanji wa nyuunyi yônso ya lukinu.” Eyowa, ùdi ne nsanji mujima mûle naayi tente patudi twakulangana apa, Nsangilu wa Buloba bujima wa Maekeléeziya, anyi wa maswa. Ûdi naayi musùmbà mujima mukangila mu nsanji patudi twakulangana apa, yidi yônso munkaci mwa kudisanga pamwe. Yêyè ukaadi mushaale nsanji, eyo, mûle tente ne nyuunyi ya lukinu. S’ncya bushuwa. Anji teeta anu kuyiikila ne umwe wa kudibo mûngà musangu, teeta wêwè anu cyanaana, maawu wa yààya maawu, baa meeji matwe mu lungenyi lwa pa buloba, kadi kabayiku ne cidibo bamanye pa bidi bitangila Nzambi to anu mudi kâlulù kakayi ne cidiku kamanye pa bidi bitangila bilatu bya kwendela

naabi mu nêjê to. Ncya bushuwa. Anu, cidi anu aci, nwamonu's, cyònsò cidibo bamanye cidi anu lungenyi kampanda lwa mudibo mwa kuteeka *cikampanda* ne kwenza *cikansanga* muntwamu. Kadi pakaadibi bikafiika ku ne Mumanyaaku anyi? Huh! Eyo, bakwaciibwe mu nsanji wende ne mêyi ende maswika awu. Ekeleeziya ya cyena mishòònyì mmibange cintu cimwecimwe aci, mishaaale bânà bende baa bakaji, cyòci eci ncyenzeja kudi divila dya Dìyì dya Nzambi. Ki cidiye wenza. Yèyè udi uvila Dìyì. Kadi paudi witaba cintu kampanda cikwabo pamutu pa Dìyì, Dyòdi ndyùdi uvila wèwè mwine. Kadi paudi anu ukashaala wa ku umwe wa ku yôyi ayi, wâmanyi peebe kuvila Dìyì. Nzambi kî mmuswe bwa wikale mushindu awu to, kakwena kaaba nansha kamwe bwa cyòci aci mu Mifundu to.

²¹⁸ Monaayi ne, ewu mmwanjelo wa Bukênkè, nwavulukaayi, mwanjelo wa ndekeelu, mmwanjelo mu cikondo cya ekeleeziya mutumina Laodikiya. Mmusanjeela wa Laodikiya, yèyè, ki wa ndekeelu, bwalu nshapita mene udi ulonda nshapita wa 19, cidi ciikale Mukaji-musela ulwâlwa awu. Nenku ewu, mu Mifundu, ki mwanjelo wa ndekeelu wâkalwa kutwala Bukênkè kumpala kwa dilwa dya Mukaji-musela kuya katuutakeena ne Kilisto. Civwa n'Cikondo cya Ekeleeziya wa Laodikiya, piine apu. Musanjeela wa Ekeleeziya wa Laodikiya uvwa nganyi? Ûbàbìikila bwa kupatukabo mu Baabulona! Tangilaayi! Ekeleeziya mikwaciibwe mu nsanji wende pamwe nende, ne mêyi ende maswika awu, miikale yivila Dìyì kadi yitaba mêyi maswika. Ewu mmwanjelo wa Bukênkè mutumina ekeleeziya wa Laodikiya uvwa mubenge Kilisto ne Dìyì Dyende awu, bwa kwitaba dîyì diswika, ne muMwele pambelu. Kadi Yèyè uvwa mwimane ku ciibi, ukookola, uteeta bwa kubwela. [Mwaneetu Branham udi utuuta bintu pa cyambilu—Muf.] Nwamonu anyi? Cikondo cya ekeleeziya aci cikaavwa cibenge Kilisto, ne Kilisto n'Dìyì, nenku yèyè uvwa muDibenge, ne Yèyè uvwa usanganyibwa pambelu. Cikondo cimwepele cya ekeleeziya citudiku naaci cidi ciikale ne Kilisto usanganyibwa pambelu, ukookola, uteeta bwa kubwela. [Mwaneetu Branham udi utuuta bintu pa cyambilu.] Nenku Mukenji wa mwanjelo ewu, musanjeela mufumine kudi Nzambi, uvwa ukobola ne cyona cikole Mukenji wende pa buloba, wa ne “Patukaaayi mu Baabulona! Patukaayi mu malongolodi!” Nyuma Mwîmpè leelu ewu, dimweneshiibwa dya Nyuma Mwîmpè mmwanjelo awu mwikale uteeta bwa kwaluja bantu ku Dìyì, bwalu Nyuma Mwîmpè neashindike anu Dìyì. Kêna mwa kushindikaku mêyi maswika to, mu wòwò amu kamwena mwoyi to. Yèyè ngudi Mwoyi. Monaayi ne, Cikondo cya Ekeleeziya wa Laodikiya cikaavwa ciMuvile, ciMubenge, ne bôbô mbaMwele pambelu.

²¹⁹ Monaayi ne, mwanjelo ewu mmusanjeela wa ndekeelu kumpala kwa dilwa dya Kilisto mu nshapita wa 19 wa Bwakabuulwibwa. Dìyì dya musanjeela! Bu twètù mwa kumona,

paakafilaye Dîyî dyende pa buloba, kuvwa Dîyî dikobola cyakabidi ne cyona cikole mu Dyulu, mvensa mwi4, panwikala baswe kucibala, eyo, mvensa mwi4, nshapita wa 19. Musanjeela ewu pa buloba uvwa ne meeji matambe kutuma kudi Nzambi mu mushindu wa ne, paakacyakwilaye pa buloba, Nzambi wakakobola ne cyona cikole cintu cimwecimwe aci cifumina mu Dyulu. Dikudimuna dya mvensa mwi4 awu didi bishi? Cidi cyumvwija cinyi? Dîyî dya Nzambi diikale dyakula ne bantu Bende badyanjila kulongolola, dyamba ne: “Patukaayi munda mwende!” Anu menemene civwa Dîyî adi’s! Yêyè udi ne bantu mwônso amu, pambelu mu Baabulona mwônso amu. “Patukaayi munda mwende, bwa kanulu kwikala baabanyanganyi baa mpekaatu yende,” eyowa’s, mukalenge, kupatuka mu dîyî diswika ne twitabaayi ayi, bwa kuya ku Dîyî divwijiibwe Nyuma ne Mwoyi. Amen.

²²⁰ Monaayi ne, nshapita wa 19 ngudi ulonda awu: “Paanyima paa maalu aa.” Nuvwaku bamone ne mwab’ewu mu nshapita wa 19 emu mudi ne, “Paanyima paa maalu aa” anyi? Kutangila cinyi? Paanyima paa cinyi? Paanyima paa Mukenji wa ne “Patukaayi munda mwende!” “Paanyima paa maalu aa,” tangilaayi ne, “ki lubila lwa bansantu baa Mukaji-musela, ne Mubaki, biikale baya ku Dibaka dya Mwânà wa mukooko.” Mmushindu kaayi utukaadi batambe kuseemena dîbà adi, mwaneetu? Dibiikila dya ndekeelu didi cinyi? “Patukaayi mu Baabulona!”

²²¹ Mpindyewu, bânà beetu, ki bwa cinyi mêmè ndi mbengangana naaci. Kî ncyà mu Mifundu to. Kî ncyà ngiitabujilu wa ku cibangidilu to. Mbijaadikiibwe ne ncyà mafi. Nzambi kênàmu to, kacya Yêyè katuku mwanji kwikalamu to, Yêyè kaadyakwikalamu to. Mpindyewu, ncyêna ngamba ne kakwena bantu mu malongolodi aa to, ki mwaba mene wakenjiibwa ekeleeziya. Kadi, paucidi anu mushaale mu ndongolwelu awu, udi citupa cya ku yêyè.

²²² Mêmè musòmbèle mu États-Unis, ndi mwena Amerike. Bwa pâncidi anu mwena mwabo anyi cidimba cya États-Unis ewu, ndi citupa cya ku yêyè. Mêmè muye ku Allemagne ne muvile buucidimba bwanyi bwa muneemu, anyi bwena mwabo bwanyi, ngangata bwena mwabo bwa mu Allemagne, ncicyena kabidi mwena Amerike to, ndi mwena Allemagne. Ne mêmè muye ku Japon, anyi mwaba kana wônso, Russie, ndi nshaala mwena mwabo wa kwôkò aku.

²²³ Nenku paudi ukadiswika ne mwena mwabo kampanda . . . ndongolwelu kampanda, ne ukashaala mwena mwabo wa mu ndongolwelu awu, wêwè’s udi uleeja anu cyûdi. Nenku mu matuku a ndekeelu aa, Nzambi udi munkaci mwa kubiikila bantu bwa kupatukamu. Bible ngudi mwambe nanku ne: “Patukaayi munda mwende, bwa kanulu kwikala

baabanyanganyi nende, nenku Mémè nênnwákídílè. Kanulengi bintu byende bikooyike abi to, nwamonu's, nenku Mémè nênnwákídílè. Nenku nenwikale bânà baa balume ne baa bakaji kûnDì, ne Mémè nêngiikalè Nzambi kunudi." Nwamonu anyi?

224 Ki bwa cinyi ndi mwakule mbengangana ne ekeleeziya, di—diswa. Ncyêna mwa kucibiikilaku ne ng'ekeleeziya to. Kudi Ekeleeziya anu umwepele, ng'Ekeleeziya wa Mubidi wa Kilisto. Kadi maswa adibo babiikila ne "ekeleeziya" aa, Bible wanyi mêmè udi ungambila ne mmênà mapendi a Nzambi, bwônsò bwayi, malongolodi ônsò. Adi apenda Nzambi ku cinyi? *Dipenda dya Nzambi* mbwena kwamba ne "kwikala mubengangane ne," anyi "kwakula bibengangane ne." Padi Nzambi wamba ne: "Lwâ ulediibwe," kadi bôbò bamba ne: "Lwâ ushaale wa ku cyôci." Nwamonu anyi? Padi dibatiiza dya Nyuma dyangaciibwa mu mushindu wa mafi bu cyostiya mu ekeleeziya wa Katolike, dilabulangana dya ku cyanza mu ekeleeziya wa Mishònyì, ne disaluka kampanda mu ekeleeziya wa beena Mpenta apu, pamutu paa Mupersona wa Kilisto udi ubwela ne nzubu mujima wa cipaapu cya musaka utuvwa bayiile dituku dikwabo awu awu.

225 "Nusakidile ku diitabuuja dyenu, bukole," ne bikwabo, byônsò ebi mu Peetelo wa Kumpala, ku 1 . . . Peetelo Mwibîdi, ngeela meeji, nshapita wa kumpala, mwaba udibi byônsò bisakidila ku diitabuuja dyenu awu, bintu byônsò ebi, difwana dya Nzambi, ne bukezuke, ne cijila, ne bintu byônsò, ne pashiishe udi utwibwa citampi kudi Nyuma Mwîmpè.

226 Kadi bidi anu bu muntu kampanda udibo . . . bantu badi balaka mukana bamba mudibo ne byôbi ebi paabo kabayi naabi to, bwalu mbalongeshiibwe bibi. Ba-Méthodistes badi badyumvwa mushindu kampanda, muvwabo ne ciibidilu cya kudyumvwa amu, ne badinyukulula ndambu, anyi—anyi baja maja mu Nyuma. Beena Mpenta badi baakula mu myakulu, anyi—anyi benza cintu kampanda cya disaluka. Ntu ngiitabuuja bintu abi, cya bushuwa, kadi bintu abi kakuyi bikwabo ebi kabyenaku ne dikwacisha to.

227 Anu bu mûmvwâ ngamba dîngà dituku's, bidi anu bu nyuunyi wa kayiba . . . anyi nyuunyi mufiike kampanda uteeta bwa kudisomeka masala a nyuunyi wa kayiba, anyi kabangu nyuunyi uteeta kudisomeka masala a nkuci. Kaàtukù matolokepu to, yêyè mmudisomekewu. Ôwò awu maasa, awu ndingumba. Kadi padi Nzambi welamu cintu kampanda, ncyà mu bufuki. Udi udyambishisha anu wêwè mwine ne: "Ndi mukashaale wa mu ekeleeziya makeelela awu. Ncyêna mwa kuya kabidi to, ncyêna mwa kunwa kabidi maala to, ncyêna mwa kwenza *cikampanda* to. Nkaadi mukashaale wa mu ekeleeziya." Wamonu's, udi uteeta kudisomeka masala a nyuunyi wa kayiba mu cibidibidi cyebe cya kabangu nyuunyi aci.

Ncya bushuwa. Nwamonu anyi? Nwamonu anyi? Bidi bikengela ulediibwe cyakabidi! Bidi bikengela wakidile Kilisto. Ne paudi wakidila Kilisto, kwèna mwa kwakidila Kilisto kuyi wakidila Dìyì Dyende to, bwalu Yèyè n’Dìyì. Kadi paudi ne cimwenekelu cya difwana dya Nzambi, ne mwikale uvila Aci, apu mèmè’s ndi ndikonka. Nwamonu anyi? Nenku udi mwa kutungunuka anu kacya washaala wa mu bulongolodi bwònsò bùdì muswe abu ne kwikala ne cimwenekelu cya difwana dya Nzambi, kadi kuyi anu naaCi to.

²²⁸ Mpindyewu, ki bwalu mbwòbò abu’s, balunda baanyi. Ki bwalu bwònsò mu kaabujima mbwòbò abu’s. Nzambi anubeneshe. Nzambi anukwacisheku. Ncyèna ngamba cyòcì eci bwa mèmè kupangananganana to. Ndi ntookesha bìndì njinga kwamba. Bu mudìbi ne edì ndituku dya dilekela dya mvita, ncyèna ngeela cyâlà ku mukanda wa ndondo wa ditalala ne nwènù bambi to, nansha kakese, ndi mèmè ngeela meeji ne bivwa bikengela bwa nwènù kulwa kwela naanyi mèmè cyâlà; kì nne mèmè to, kadi nne Nzambi, Dìyì. Ncya bushuwa. Ncya bushuwa. Ambaayi cidì Bible wamba, nuCyamba mushindu udi Yèyè uCyamba awu. Bwalu Bible mmwambe ne: “Èwu wadidinga kuumushila anyi kusakidila ku cintu cimwecimwe eci.” Nenku nudi numona’s, bulongolodi kì mbwa mu Mifundu to, ne paudi anu wakidila dìyì diswika dya kumpala adi’s mbipiciibwe ne wèwè mwalukile anu paanyima too ne kundekeelu, bwalu udi usambuka mukalu anu mwab’awu mene. Paudi walukila ku dilediibwa dipyadiya, dìbà adi neubwele mu Mifundu.

²²⁹ Kadi paudi ubwela mu dingumba, badi bamba ne: “Ndi mumanye ne, twètù katùtu twitabuujà *Eci* to. Beepiskopo beetu mu ekeleeziya mwetu batu balongesha ne tudi umwe wa ku ekeleeziya ya bikujà. Katùtu twètù tulongesha . . .” Ncitu mèmè ntanga bitubo bòbò kabayi balongesha abi to. Piikalabi ne Bible ngudi ucilongesha, Nyuma Mwìmpè munda mwebe Yèyè neadiishiibwe ku Dìyì. Muntu yèyè nansha mwikale ne meeji matwe a bishi ne nansha mudiye mwa kwikala mumanye mwa kuteeta kufila tubingila bwa kuumvwija mudici kaciyi ne mushinga, ùdi anu mwa kufila tubingila atu mu dyumvwija’s. Mwena dyabulu’s udi anu mwa kwangata Bible ewu ne kufila tubingila bwa kuumvwija mudi Nzambi kayi ne mushinga.

²³⁰ Ki bwa cinyi, muntu nansha umwe kènàku ne bukenji bwa kuyiisha Evanjeeliyo to padiye kayi mukafike, bu Mòsà, ku luseke lukwabo lwalwa pa lusenga lunsantu lwa mwaba wakimanaye nkayende ne Nzambi alu, too ne padi muntu ulediibwa cyakabidi ne wimana mwab’awu cimònààmèèsù ne Nzambi, ne ùmanya. Kakwenaku nì mmwena dyabulu nansha umwe, kakwenaku nì ndimanya dya maalu a nsòmbelu nansha dimwe, kakwenaku nì ndyumvwija nansha dimwe, kakwenaku nì mmumanyi wa dìbàlà nansha umwe pa buloba apa udi

mwa kuumusha Cyôci aci to. Wêwê uvwapu paakenzekaci! Eyowa's, mukalenge. Wêwê udi mumanye cyâkenzekâ aci.

²³¹ Pashiishe wêwê udi wamba ne: “Ngâkapeta dilabula dya mushindu awu adi, ki mêmè kupeta nyuma kampanda pambidi paanyi.” Kadi piikalaye uvila Dìyì mu mushindu kampanda nansha wa munyi, udi mupete nyuma mubi. Wêwê udi wamba ne: “Ncyê—ncyêna mwa kusungulaku cintakanyi bu Eci to. Ndi mumanye, kadi ekeleeziya wetu. . .” Uh-huh, s’ki nyuma mubi awu. S’ki cyebe cimanyinu cya dimanyishiibwa aci. Kaayinà we, udi mutwibwe cimanyinu. Eyowa's, mukalenge.

²³² Eva's wakeela mpatà anu ku Dìyì dikese dimwepele cyanaana; kî nku byônsò byakamba Nzambi to, anu ku Dìyì dikese dimwepele cyanaana, ki kutwalaci dîsaamâ dyônsò dya mwoyi ne dyaba dyônsò dya mwoyi edi, ne lufu, ne mpekaatu, ne mwita, ne bikwabo byônsò, majambu ônsò aa, mashinyi ônsò a cyambula-babeedi âkaadîku meele cipungi aa, lupitaadi lwônsò lûkaadîku lwibakiibwe bwa babeedi elu. Dyela dyende dya mpatà dikese dimwepele cyanaana ku Dìyì dikese dimwepele cyanaana dya Nzambi adi, ki dyakakeba byônsò ebi. Ne yêyê wakiipaciibwa, paabi nunku cyôci eci kacivwaku cifwanyine kwikala cyenzeke to. Mmunyi muwabwela wêwê, pawikala wela mpatà ku Dìyì dimwe dya ku Cyôci aci? Wêwê nyawu wamba ne: “Mêmè ndi mumanye ne Cidi cyamba *Cikampanda*, kadi Cidi. . .” Cidi ciswa kwamba anu Cyôci aci!

²³³ Mpindyewu tangilaayi. Bidi bikengela bwa Nzambi alumbulwishe buloba ku cintu kampanda. Kwêna mwa kupita ku cilumbulwidi kuyi mwanji kupeta mukenji dyambedi to. Bikengela kwikaleku cintu kampanda, bikengela unyangakaje cintu kampanda bwa wêwê kulumbulwishibwa. Nwamonu anyi? Ne pashiishe kakwena mwa kwikala cilumbulwidi, cya cijaalame eci, kakuyi cibawu to. Mpindyewu, nwamonu's, kanwena mwa kwikala ne mukenji mu cimenga udi wamba ne “cibawu cya ndola yitaanu wêwê mupite midilu mikunze ne mashinyi,” kadi mukenji ùdì ùlondâ wamba ne “to, udi mwa kupita kakuyi bwalu” to. Nwamonu's, kanwena mwa kwenza nanku to. Pa nanku kakwena mwa kwikala mikenji yibidi mipalakane musangu umweumwe awu to. Kadi kudi mukenji umwe, Nzambi umwe, Mukanda umwe, Kilisto umwe. Ki cyônsò cidiku ncyôci aci. Diitabuuja dimwe, ditekemena dimwe. Ki cyônsò cidiku ncyôci aci. Ki Bible nyawu, Kilisto.

²³⁴ Monaayi mpindyewu, mu eci, kwôkò kwikale cintu kampanda cisakidila ku Cyôci eci, cidi ne cya kwikala cisakidila kudi muntu. Kacyena mwa kwikalaku citambe. . .

²³⁵ Nenku piikala Nzambi ne cya kulumbulwisha baa pa buloba ku ekeleeziya kampanda, mudi Katolike wamba amu, pa dîbâ adi nku ekeleeziya kaayi wa Katolike kwabalumbulwishilaYe? Paayi nyayi yidiku búngì bu yâmbâ ne katûkû; kudi ewu

ne, ngwa cyena Loomo; ewu ne, ngwa cyena Ngelika; ne, kaa, yidiku mishindu bu ya bilamba. Nku ekeleeziya kaayi wa Katolike kwabalumbulwishilaYe? Anyi, pàmwàpa Yêyè neabalumbulwishile ku wa ba-Luthériens? Ee, dîbà adi, pàmwàpa's Neabalumbulwishile ku wa ba-Presbytériens? Nwamonu anyi? Neënzè cinganyi? Kaakubalumbulwishila ku ekeleeziya kampanda to. Neabalumbulwishile ku Dîyì Dyende. Ee, dîbà adi, Yêyè kacya . . .

²³⁶ Nwamonu's, Yêyè kêna mwa kulamina musumbà wa bantu, bu muvwa cikeena-kumona cya mwaneetu wa bakaji diloolo dikwabo adi to, Nyuma Mwîmpè mupòngolwelamù, Mupicile buludi mu kasheete aku. Bushuwa, cintu nansha cimwe kaciyena ciMukwata to. Mmuntu nkaaya. Mmufidiibwe bwa kukezula ekeleeziya, kadi kêna mwa kuMukwata to. Bulongolodi nansha bumwe kabwena mwa kuMukwata to. Ki cyònsò cidiku ncyòcì aci. Kabwena anu mwa kucyenza to. Nudi ne bintu byònsò muntwamu, nenku kanwena mwa kucyenza to. Bulongolodi kabwena mwa kucyenza to. Kadi mmuntu nkaaya udi ne Nyuma Mwîmpè. Mpindyewu monaayi.

²³⁷ Nanku piikala Nzambi ne cya kulumbulwishila baa pa buloba ku Dîyì Dyende, dîbà adi's ncyà bushuwa ne Yêyè mmuDitabaleele ne muDilamine mu ngiikadilu udi ukumbana. Anyi, piikalaDi dyònsò dinyangakaja, mmunyi mwatwalaYe cilumbulwidi? Nwamonu anyi? Bikengela ciikale cintu kampanda. Ne Yêyè kacya kaakambaku ne: "Ewu yònsò, ku ekeleeziya" to. Wakamba ne: "Ewu yònsò wadidinga kuumushila Dîyì dimwepele ku Cyòcì eci, anyi kusakidilaKu dîyì dimwepele, yêyè awu nebuumusha (cyende citupa) ku Mukanda wa Mwoyi." Pa nanku, bwanyi mêmè, n'Nzambi, Dîyì Dyende ne cilumbulwidi. Mpindyewu, mêmè mulumbulwishe ne mwitabe Dîyì, ne mumone ne Kilisto wakamfwila mêmè, dîbà adi's nêndombè bwa Mwoyi Wende ubwele munda mwanyi ne undombole. Kadi piikalabi ne Mwoyi Wende n'Dîyì, ne Yêyè ngwâkafùnda Dîyì adi, mmunyi mudi Mwoyi Wende mwa kwikala munda mwanyi, ne mème ndaka mukana ngamba mùndì ne Nyuma Mwîmpè, kadi nsakidila dîyì diswika pa mwaba wa Dîyì? Kî mbifwanyine anu kukumbana to. Mmunyi mùndì mufwanyine kusakidila dingumba kampanda padibi ne Yêyè udi ubengangana naadi, ne mucijaadike, ne mucileejile ku maalu malonda ne, musangu wònsò udibo anu badyenza dingumba badi bafwa, mu nyuma? Kaa, badi bavudija bidimba, cya bushuwa. Ncyà bushuwa. Badi bavudija bidimba. Kadi, mu nyuma, kabeena ne kuyaayabo to. Ndejaayi, ngambilaayibi mu maalu malonda mwaba ukaadiku kacya ekeleeziya udi . . . Paanyima paa yêyè mudyënzè bulongolodi, uvwa ufwila anu pôpò apu, Nyuma Mwîmpè uvwa umushiya. Kamuciyena kabidi bishima ne bimanyinu to, kadi ùvwa ubwela anu buludi mu cimvundu cinene.

238 Aci menemene's ki cidi cyenzekele ekeleeziya yetu ya beena Mpenta. Mbenze menemene anu cyakenza mamwäbò aci. Ku cibangidilu, baakapatuka, cisamba cyàkabèngà mangumba aci. Mpindyewu, bamwe baa ku nwènù bânà beetu badi bateeleja mukaba wa mèyì ewu, bamwe baa ku nwènù bantu bakulumpe, nudi bamanye ne kukaadi bidimu, kukaadi bidimu makumi anaayi, makumi ataanu, bu bôbò banwämbile bwa bulongolodi, s'nuvw'a kwikala bambe ne civwa ndipenda dya Nzambi. Kadi leelu wa Ndaaya ewu nukaadi bashaale beena cintu cinuwwa nwela meeji ne ndipenda dya Nzambi aci. Nwènù bakaji badi babebula nsuki yenu ne nulaaba bilaabu kwîsù abu, mamwèbè's uvwa ubengangana ne cyôcì aci, munsantu mukulakaji mwîmpè—mwîmpè wa cyena mpenta awu. Cidi cinwènzèkèlè ncinyi? Pòlò wakamba ne: "Nuvwa nunyeema bîmpè, cyänùpangîshî ncinyi?" Nwamonu anyi? Kale wawa kanuwwa baswikakane ku cintakanyi aci to, kadi nwäjingî kufwanangana ne bakwabo bônso.

239 Anu menemene cyakamba Samwele. Izaleela uvwa ne Mfumu, ne mwine awu uvwa n'Nzambi. Kadi bôbò kwamba ne: "Samwele, nyawu ukadi wenda ukulakaja. Tûtèèkèlè mfumu, tudi baswe kufwanangana ne bakwabo bônso baa pa buloba. Tudi baswe kufwanangana ne matunga makwabo. Tudi baswe mfumu wa kwikala uya neetu ku mvita, tudi baswe mfumu udi mwa kutulwila mvita." Ki aci kubiiplaci Samwele.

240 Yèyè kwamba ne: "Kacyakacya nkaadiku mwangate cintu cyenu anyi? Kacyakacya nkaadiku mwangate mfranga yenu anyi? Kacyakacya nkaadiku munulombe ngombe anyi cintu kampanda anyi? Kacyakacya nkaadiku munulombe cintu kampanda anyi?"

Bôbò ne: "To. Kacya kutuku mutulombe cintu to."

241 Anyi wakamba ne: "Kacyakacya nkaadiku munwämbile diyî kampanda mu Dîna dya Mukalenge ditu kadiyi dyenzeke anyi?" Mmwômò anyi? Kwambaye ne: "Nanku kanwakididi mfumu awu to, bwalu necivwije cimvundu cinene bwenu nwènù."

242 Mpindyewu ndi njinga kunukonkaku cintu kampanda, nwènù Branham Tabernacle. Nukaadi pabwîpî ne kuvulangana bwa kushaala tabernacle munene mpindyewu. Ndi mwa kwikala nciyipu to bwa cikondo kampanda. Ndi mwa kuya mwaba kampanda. Mbikole bwa kumanya mwaba wambiikila Mukalenge awu; pämwäpa bwa kuumuka mu cyalu, pämwäpa bwa kwalukila mu budimi bwa bwambi, pämwäpa Yèyè mmufwanyine kumbiikila bwa kuya mu cipeela. Ncyèna mumanye kwambiikilaYe to kumpala kwa Yesu kulwaYe. Ndi muswe nnukonkeku cintu kampanda. Kacyakacya nkaadiku munulombe cintu kampanda anyi? [Disangisha didi dyamba ne: "To."—Muf.] Kacyakacya nkaadiku munulombe mfranga ya kaa pa luse anyi? ["To."] Kacyakacya nkaadiku munwämbile

cintu kampanda, pa binunu ne binunu bya bintu binkaadi munwãmbile mu Dìnà dya Mukalenge abi, kadi, kaciyi cyenzeke anyi? ["Amen."] Nanku kashidi keenu kanukashaadiku baa mu bulongolodi kampanda to. Cidi cibengangana ne Dìyì dya Nzambi. Patukaayimu piikalabi ne nudimu, ne ikalaayi batapuluke ne nwakidile Dìyì dya Mukalenge.

Twinyikaayi mitu yetu.

²⁴³ Nzambi munene wa baprofeta, Nzambi wa Abraham, wa Izaka, ne wa Izaleela, sakidila bukole, Mukalenge, ku Dìyìisha dikese dikosoloke tutupa tutupa edi divwa pa mwoyi wanyi kukaadi ntanta mule, bwa kuya kudi bânà beetu. Bààbùngì baa kudibo kwaka, Mukalenge, badi ne didifwikakajila dibi bwanyi mêmè. Badi badyelela meeji ne ndi muswe kwikala mpanganangana naabo. Badi badyelela meeji ne ndi nkeba kwikala cimanya-byònsò. Bakaadi bambilambile bantu ne mêmè ndi nseeswisha bantu, nangananga pa bidi bitangila byena-bwalu bu mudi *dibatiiiza dya mu mâyi* mu Dìnà dya Mukalenge Yesu, ne *diminu dya nyoka*, *ndumba munene* awu, ne mu yâbùngì ya ku mikaba ya mêyi yidi mipatuke kayiyi ne cingà cintu to anu Bulelela kabuyi busambakaja ayi. Kadi nkaadi mubalombe ne: "Bamwe baa kunudi balwe bandeeje mwaba wùndiku mêmè ewu ngenzela mpekaatu, anyi mbenga kwitabuujiila anyi ngumvwijila Dìyì bibi." Kadi nansha umwe katu mulwe. Ndi nKulomba, Taatù, bwa kwenzaku bwa bantu aba bamanye ne dîbà didi munkaci mwa kubapicila pa mitu. Nebashaale batekemene mbumbà bu cilundù, piikalabo kabayi bacitabaleele to. Swaku bwa bôbò, muntu ne muntu . . .

²⁴⁴ Mukalenge, ndi mutwishiiabwe bwa cyôci eci, mwoyi wanyi uvwa mufwanyine kucibuluka bu ne Mufundu ewu kawuvwa mulelela kùndi to, paWakamba ne: "Bònsò badi Taatù muMpeeshe, nebalwe. Mikooko Yanyi yidi yumvwa Dìyì Dyanyi." Nanku, Mukalenge, ndi ngeela meeji ne Bukalenge budi bulelela anu muWakamba amu, ndi mumanye ne ki mudibi, bidi anu bu muntu kampanda wãkangata bukondo ne kuyaye ku dijiba, kumùkùpayè bukondo ne kukokaye bintu bya mishindu yònsò. Muvwa, kakuyi mpatà to, mishipa ya bidy'a bibole, muvwa nkuvu, ntande ya mu mâyi, nyoka, bintu byònsò byakakwatabo kudi bukondo bwa Evanjeeliyo abi. Kadi ndekeelu wa byònsò, abidi mmale asatu mmîpî, lushisha kupinganalu cyakabidi mu mâyi, nkuvu kudikoka nyêyè uyaaya wawa, nyoka kwelaye kashiba e kwalukilaye lubilu mu bwina bwa bitoci, byenze bu mudi mbwa walukila ku bilushi byende anyi ngulube ku bitoci byende. Kadi muvwa mishipa milelela muntwamu, Mukalenge. Kadi ndi ne disambiibwa edi, dya kumanya ne, nansha kumpala mene kwa bukondo kuyibwikilabu, yivwa anu mishipa pa dîbà adi. Yivwa milediibwe, midyanjila kulongolola anu mishipa. Nenku ki mudi kabidi bukondo bwa Evanjeeliyo bùdi bùkwátanganà

mu matabuluja ebu. Wêwè udi mumanye badi Beebe Wêwè. Cintu cimwepele cîndî mêmè mwambwile bujitu, Taatù, bwa ku dyanyi paanyi dimanya, nkushaala ne lulamatu ku Dîyî edi. Wêwè ki Udi Upangadika bwa ne cikampanda ncikansanga. Ne ndi mumanye ne anu mudibi ne nkuvu kê mmufwanyineku kwandamuka mushipa wa dibundu to, ki mudi kabidi muntu mulume anyi dînà muntu, udi mpâtàmàci ku Evanjeeliyo awu, kayiku mufwanyine kuumvwa Bulelela to. Bwalu Taatù ukaavwa mudyanjile kumona cyôci eci, ne Wêwè wâkalaya ne bônso badiYe muKupeshe nebalwe.

²⁴⁵ Taatù wa mu Dyulu, ndi nKulomba ne muntu yônso udi umvwa Diyiisha dikese edi, bwa Bukênkè bûdidi diyiihilemu abu, ne dyumvwa dîndî naadi mu mwoyi wanyi bwa bantu naanyi, bantu baWakafwila abu. . . Ne bantu, bamwe baa kudibo kuntu kwaka, Mukalenge, byenze bu mu musumbà wa Koola awu, bantu bashuwashuwale, balombodiibwe bibi, ne mbabula wa cijila mu cyanza, kadi kubutukabo. Mona's, kabavwaku nansha bafwanyine kulekela mbabula wa kapyà awu ubwela naabo to; mwânà wa balume wa Aalona, Eleaza, byakakengela bwa kuyisangishaye. Ne baakenza dibendela bwa cyoshelu ne ngeesu ayi, ngabu, bwa kuleeja, ne bwa kwikalabi civulukilu cya cintu cibyaçibyaalè aci, cyakateeta Koola kwenza cisumbu cidilongolwela bwa kulwishangana ne musanjeela wa Nzambi aci. Kabitwènzèkèdiku twètù to, Mukalenge. Swaku bwa Nyuma Mwimpè atukubeku anu kutukuba misangu yônso.

²⁴⁶ Tudi tuKusakidila, Mukalenge, bwa kaeeleeziya keetu kakese aka, mwaba munsantu mukese wa dilwa kubandila ewu. Kukaadi bidimu byàbûngî, bidimu makumi asatu ne bya munjila, ngâkatwà binù mu dijiba emu dyûle tente ne bisoosa bibi bya mu mâyi ne mutaleela, nenku twètù kulambula kalaba aka kûdi Wêwè, kaacitanda kakese aka. Ne mu ditumba dya tabernacle ewu mwamwa mmuteeka cikeena-kumona aci. Ncyenzeke anu pyôpyopyô. Cicidimu. Kabaakucipandaku to, Mukalenge, nebiikale anu mwa. . . cikaadi cyenda cikulakaja, kadi nebiikale anu mwa kucilaminyina mu kwenda kuteeka cimwe pamutu paaci apu. Nzambi, enzaku ne Evanjeeliyo wa ngôle udibo bafunde mu mabeji kaaba aka ewu, swaku bwa Yèyè kuumukuku mu ekeleeziya mukese ewu to too ne paalwa Kilisto. Swaku bwa cidimba cyônso, cidimba cyônso cya Mubidi wa Kilisto, bàdî bàbwelà mwaba ewu bàfumina mu ditunga dijima emu ne pa buloba bujima abu, swaku bwa yônso wa kudibo aakidile Bukênkè, Evanjeeliyo awu, ne endeleMu dîbà adi ne aakidile Kilisto.

²⁴⁷ Nenku swaku bwa biikale bilelela mu mushindu wa ne Méyî Ende akumbane ne: “Byenzedi bîndî Mêmè ngenza, nebàbyènzè paabo. Ewu udi umvwa Méyî Aanyi, ne witabuujà Ewu udi muNtume, udi ne Mwoyi wa Cyendelelele.” Nenku padi Mwoyi wa Cyendelelele ubwelamu, yèyè walediibu ku Dyulu, ne byenzedi

bya kudi Nzambi bidi bidileeja byòbì biine, bwalu m’Mwoyi umweumwe uvwa munda Mwende awu. KaWena mwa kwenza cîngà cintu nansha.

²⁴⁸ Pa nanku, Taatù, ekeleeziya ewu katekediku kwende kwa Cyendelele kuyaayaye pa disaluka kampanda, pa bulongolodi kampanda, pa cintu kampanda kaciya Kilisto Yèyè mwine mwikale ne mwoyi munda mwabo awu to, ushindikila Dîyì Dyende ne mulayi Wende ku bôbò. Swaku ne, kubangila anu ku mwânà udi mutambe bukesa mwab’ewu diloolo edi, too ne ku muntu udi mutambe kwikala mukulumpe, aakidile dilabula edi. Nenku swaku bwa mulume yònsò anyi mukaji, nsongaalume anyi nsongaakaji, udi uteeleja mukaba wa mèyì ewu, swaku bwa biikale nanku bwabo bôbò, Mukalenge, ne ubapeesheku luumvu lwa ne mêmè ndi nkeba anu kudimwija ne kubiikila bantu bwa kupatuka, bwalu dîbà ditukaadi edi nditambe kwikala diye kupita ne mutudi twètù twela meeji.

²⁴⁹ Nenku tudi tumona Baabulona, maamù mukaji wa masandi awu, ne bânà bende bônsò baa bakaji bandumba abu munkaci mwa kudisanga. Nzambi, tudi tujungulula ne Mufundu udi wamba ne lupela lwa mu budimi bwa blé alu nebânjì kuluswika dyambedi, tusumbu tusumbu. Ne bôbò biine nyawu bakaadi badiswike tusumbu tusumbu, badînyike mênà mapendi a Nzambi àdi mu bushuwa bwa bwalu kâyi mabakumbanyine to, kî mmakumbanyine Ekeleeziya to, yèyè pende; ôwò mmaswa, kî ng’ekeleeziya to. Kudi Ekeleeziya anu umwe, Taatù, ne Yèyè awu ki uWakafwila.

²⁵⁰ Nenku ndi ndomba, Taatù, patudi tubamona bônsò biikale baswikiibwe tusumbu tusumbu mpindyewu bwa kapyia kaa tupwishipwishi abidi adi panshi aa apa, ndi ndomba, Mukalenge, bwa Wèwè kulekelaku blé ûle apatakane ne ikale ne bujitu. Enzaku nanku, Mukalenge. Swaku bwa tukole ne tukenkeshe Bukênkè, ne twikale bu Yesu ne: “Mêmè nciya ngenza maalu adi Nzambi mulombe bwa Mêmè kwenza to, pa dîbà adi Ncyêna ne Mwoyi munda Mwanyi to. Kadi piikala Nzambi wakula ne uleeja Mwoyi Wende, dîbà adi Aci cididyakwila Cyôci ciine.” Enzaku nanku, Mukalenge. Nyewu ndambula Diiyisha edi kûdî Wèwè, nenku bwa Wèwè uDitabaleele, ne dikwame binunu makumi, Mukalenge, anyi, bânà Beebe bônsò badyanjila kulongolwela Evanjeeliyo abu. Mu Yesu Kilisto, Yèyè udi Dîyì awu, mu Dînà Dyende mmûndi ndomba emu. Amen.

Ndi munange . . . , ndi . . .
 Bwalu . . . wakannanga kumpala
 Ne wakampetela lupandu
 Pa mucu wa Kalvariyo.

²⁵¹ Ndi muswe kwela lukonko elu. Mbanganyi diloolo edi mu bateeleji badi bamweka ne mèsù apa aba, baa mu ekeleeziya mulenga munene wa bantu badi apa aba, anyi nzubu wa

bantu ewu, eyowa's we, mu mwaba wa dikuukwila ewu, badi biitabuuja ne mwoyi wabo wònsò ne, nsòmbèlu webe mwikale ukumbanangana ne dilomba (wêwè) dya Nzambi ne Bible, ne mwikale witabuuja ne, ku ditangila dya nsòmbèlu webe wêwè, ne pa kumona mushindu udi Nyuma ukwata mudimu munda mwebe, ne ùdi witabuuja Dîyì dyònsò mushindu udiDi difùnda, ne ùDilama? Nudi nuDiitabuuja anyi? Nzambi anubeneshe. Asweku Yêyè alamine kashidi Nyuma Wende pambidi peenu.

²⁵² Ne kudi mulunda wanyi udi uteeleja mukaba wa mêtî, mvwa njinga ne uvw'a kwikala nanshà mutapeku dîsù mu bateeleji aba diloolo edi, ngeela meeji ne pabwîpi ne makumi citeema pa lukama a bantu mbeele byanza muulu ne, mbiitabuuje ne balonde Bible, (kaciyi cidi ekeleeziya wamba to) cidi Bible wamba, (kaciyi cidi diswa dyamba to) cidi Bible wamba, ne badi bamona Mwoyi wa Kilisto udileejilaMu.

²⁵³ Nudi bamanye's, mu matuku a kale kumpala kwa bôbò kwikala ne mashinyi adi engulula byamu, mu—mutuuci wa ngòlò uvwa ne ciibidilu cya kutuuta ngòlò ne nsandu. Ngeela meeji ne nukaadiku bumvwe bwalu ebu. Kumpala kwa kuyaye ku mashinyi adi engulula byamu, bavwa bamutuuta. Nenku ngòlò ncyamu cidi citambe kwikala cya bujitu cidiku, cidi ne bujitu butambe bwa cyamu cya plomb. Ne pa nanku ntu mwenzeku bukebikébi ndambu, nenku udi mwa kwangata mu lusenga mu myaba ya mâyî mu bipeela, ne ufiita cyanza mu lusenga, ne pashiishe, "pwii," upwila *nenku* ewu, nenku lupwishi ne bikwabo byònsò nebibuuke biye, mabwe, kadi ngòlò yêyè udi ne bujitu mu mushindu wa ne udi ushaala anu mwaba awu. Ne pashiishe paudi wambula ngòlò awu, mmuvungila mu manyaanu mapite bûngî mu mushindu wa ashaala makungwile bikole. Nenku kupicila mu bikondo bya luuya lwa volcan pavwaye wenda ukwatakana apu, uvwa ulamata bisota ne bikwabo byònsò, bunyingunyingu bwa cyamu cifiike ne twamwâmù tukwabo tusambakanemu. Mutuuci uvwa ne ciibidilu cya kwangata dibulu dya ngòlò edi ne kumutuuta ne kumukudimuna, kumutuuta ne kumukudimuna, too ne pavwaye uumusha bisota byònsò ku dituuta adi. Kadi nudi bamanye muvwaye umanya ne wamanyi kuumusha bisota byònsò abi anyi? Mpavwaye mwa kumona mpala wende udileejilamu.

²⁵⁴ Nenku mushindu awu ngudi Nzambi wenza Ekeleeziya. Ùdi utuuta twitabaayi ne twitabaayi yònsò, dingumba ne dingumba dyònsò, dîyì ne dîyì diswika dyònsò dya bantu, too ne padiYe umona Mwoyi Wende Yêyè mwine udileejila munda mwebe. "Mêmè nciyi ngenza byenzedi bya Taatù Wanyi to, kanuNgiitabuui to." Nwamonu anyi? Piikala civwa cilongolwela Ekeleeziya, Mwoyi uvwa munda mwa Kilisto awu kawuyi udileejila munda mwebe to, kushaadi mupuwe to pawikala kuyi ne lutuulu, bukole, bintu byònsò ebi, ne didikanda, ne—ne bikwabo, ne difwana dya Nzambi, ne dinangangana dya

bwânà bwetu, ne bintu byônsò bidi bikulombiibwe ebi. Cyûkaadi mwenze nansha ciikale cinyi, nansha wêwê mwele mbila munyi, ekeleeziya yûkaadi mubwelebebele nansha yôyi bûngi munyi, masâlâ audi mudisomekesomeke nansha ôwò bûngi munyi, kùcyênji to. Indila, bifumina munda mwa mwoyi webe, too ne paudi mwa kufwilangana luse lwetu lwa lushuwashuwale elu, too ne paudi upeta dinangangana dya bwânà bwetu munda mwa mwoyi webe. Nansha bôbò bakutuule dyanza dya myedi ku luseke lumwe lwa cibanga, wêwê udi mwa kukudimuna kufila ditama dya luseke lukwabo ne kalolo kônsò, nwamonu's, too ne paalwa makole awu, bidibo bakwamba nansha biikale binganyi.

²⁵⁵ PaakaMuswikabo mukusu kwîsù ne kuMubokotabo mucu ku mutu, bamba ne: "Mpindyewu, s'batu bangambila ne Wêwê ewu udi Muprofeta." Mpindyewu kuMuumushabo mukusu awu kwîsù, ne umwe wa kudibo mukwate mucu, kwambaye ne: "Nganyi wa kutudi eku udi muKutuute? Enzabi ciprofeta tûng ùtwâmbilè, mu mushindu mukwabo, dîbâ adi netwitabuuje ne Wêwê udi Muprofeta." Kaakabuululaku Yêyè mukana to.

²⁵⁶ Panudi nuumvwa bamba ne muprofeta mmujuuke, mwikale ne mandamuna ônsò ku kaadijambu kônsò kanudi mwa kumutwadila aku, nwavulukaayi ne, kî mmuprofeta to. Leelu wa Ndaaya ewu bikengela bamanye kantu ne kantu ne, ndîbâ kaayi diwikala ne mênù akusaama ne ndîbâ kaayi diwikala ne munda mukusaama, ne bikwabo byônsò, ne ukwambila byônsò nkòòng. Aci kî ngiikadilu wa wetu Nzambi to. Tangilaayi baprofeta, tangilaayi Yesu.

²⁵⁷ Tangilaayi Pôlò, pende ne bukole bwa kuvwija muntu mpofo, kadi kulekela nsenda wa byamu awu umwipata mu ditunga ne: "Ndi ngeela meeji ne yêyè ukaadi mujimije bukole bwende bwa kuvwijangana mpofo abu."

²⁵⁸ Yesu, Yêyè uvwa mwa kubiisha bafwe awu, kadi nansha nanku mbambe ne musalaayi mukwacike maala wakaMutwila mate mwîsù, ne makodi ne mate ne kuMunana mwedi kuwutuula ku cibanga, ne kuMubokota mucu mu mutu, ne mukusu muMujingila, bamba ne: "Enzaaku ciprofeta tûng ùtwâmbilè wâKutuutù awu." Kadi Yêyè kaakabuululaku mukana to.

²⁵⁹ Kanwikadi nutangila benji baa majimbu bônsò aba to. Kadi vulukaayi ne, badi anu bamba baleeja, ndola wa mafi udi anu wamba ne kudi mulelela mwaba kampanda. Panudi numona cintakanyi cya bulongolodi eci cyenda cidyunda ne citanta, bu mwakambabo ne "mâyelè mmafwanyine kutanta mu cyanza cyende," vulukaayi anu ne, kudi Ekeleeziya mukese wa Nzambi mwaba kampanda, udi bulelela muujiibwe tente ne Nyuma Mwîmpè, mushuwashuwale, udi munkaci mwa kwenda kubânda pa cibandilu. Kanwikadi nutangila bulongolodi bwa bunene abu to.

²⁶⁰ Ng'ekeleeziya munene kaayi udibo baakule mu Bible udi mutambe cikondo cya ekeleeziya cya Efeso? Kadi paakapicila Pôlò ku nseke mitumbuke ya Efeso, ne kulwaye ku ekeleeziya ewu, muvwa bantu dikumi ne babidi. Ncya bushuwa. Ne bônso abu bavwa bantu bîmpè, beela mbila ne biikale bacyonkomoka, kadi kabayi banji kupeta Nyuma Mwîmpè to. Pôlò kwambaye ne: “Kanutu bapete Nyuma Mwîmpè kacya nwîtabuuja anyi?”

Bôbò kwamba ne: “Mona's, katuvwaku bamanye ne Nyuma Mwîmpè utuku to.”

²⁶¹ Yêyè ne: “Kadi nwâkabâtiijibwa mushindu kaayi?” Piikalabi ne kabivwa ne civwabi bishintulula, cyakambilaye ekeleeziya awu mwab'awu ncinyi?

²⁶² Bôbò ne: “Twêtù tukaadi bamane kubatiijibwa kudi umwe wa ku bantu batambe bunene ukaadiku mwimane pa buloba apa, Yone Mubatiiji, yêyè wâkabâtiiza Mukalenge wetu awu. Adi kî ndibatiiza dîmpè dikumbane anyi?”

²⁶³ Yêyè kwamba ne: “To, mukalenge. Bidi bikengela bwa nubatiijibwe cyakabidi, bwalu Bukalenge mbutwibwe citampi bukangila cintu cikwabo cyônso.” Nenu paakumvwabo cyôci eci. . . Yêyè ne: “Yone wakabatiiza anu bwa kanyinganyinga cyanaana, kacivwa bwa dilekelediibwa dya mpekaatu to, wamba ne bivwa bikengela bwa nwênù kwitabuuja Ewu uvwa ne cya kulwa, mbwena kwamba ne, Yesu.” Nenu pakumvwabo cyôci eci, baakabatiijibwa cyakabidi mu Dîna dya Yesu Kilisto. Ncya bushuwa. Mmwômò menemene. Baakalonda Mifundu's.

²⁶⁴ Nudi bamanye's, mu dijidila dya ntempelu mu dinda emu, Môsà wakalonda citembelu cyakamonaye mu Dyulu, ki kwasaye ntenta bwa kucileeja. Paakiibaka Solomo ntempelu, yêyè (cyakenzaye ncinyi?) wakalonda citembelu civwa Môsà, ku ntenta, mwikale ulamina Mifundu yenda yilondangana.

²⁶⁵ Ne paakalwa Nzambi ku Ntempelu Wende bwa matuku a ndekeelu, Ntempelu ewu, Nyuma Mwîmpè, “Wêwè wâkandongolwela Mêmè mubidi,” Nyuma Mwîmpè wakamata mu Dituku dya Mpenta, mukenji uvwa ne: “Nyingalalaayi, muntu ne muntu wa kunudi, ne nubatiijibwe mu Dîna dya Yesu Kilisto bwa dilekelediibwa dya mpekaatu, ne nenupete kupà kwa Nyuma Mwîmpè. Bwalu mulayi udi kunudi nwênù ne kudi bâna beenu balela, ne kudi aba badi kule, mu bûngî bwônso bwabiikila Mukalenge Nzambi wetu abu.” Panwikala baswe kubiikila mwambi wenu ne n'doctor, Docteur Simona Peetelo wakafunda kabeji kaa bwanga, kabeji kaa bwanga kaa Cyendeleele. Kôkò aku ki kadi kondopa babeedi.

²⁶⁶ Nudi nulekeela bamwe baa ku bangangabuka baa mu matala aba bateeta, bilondeshile dingumba, bwa kuujabo kabeji kaa bwanga aku mu mûngà mushindu kampanda, ki bwa cinyi mbapete. . . Nudi bamanye's, wêwè kuyi musakidile. . . wêwè musakidile mupicishe mùdi kabeji kaa bwanga aku

kamba, s’udi mufwanyine . . .mulùngù mupitepite búngì, s’udi mufwanyine kushipa mubeedi webe. Wèwè kuyi uwelamu búngì bukumbane to, udi . . .kî mbwa ncìpaja-mulùngù to, wèwè kuyi muwèlè búngì bukumbane to, kabyakwikala ne dikwacisha kudi mubeedi webe awu to. Ngangabuka webe ngudi mumanye anu menemene mushindu wa kufunda kabeji kaa bwanga.

²⁶⁷ Kadi Kilisto, Nyuma Mwímpè awu, ki Mufundi wa Kabeji kaa bwanga, ne Yèyè ngwàkaKáfùnda. Kwikadi wasakidilaKu anyi waCyumushilaKu to, wèwè angata Bwanga anu mushindu udibu awu. Bwòbù abu ki lwondopu bwa màsaamà ònsò. Nzambi anubeneshe. Nudi baMunange anyi? Amen.

Ndi muMunange, ndi . . . [Katupa kaa mukaba
wa mèyì munda mutupu—Muf.]
Bwalu Yèyè wakannanga kumpala
Ne wakampetela lupandu
Pa mucì wa Kalvariyo.

²⁶⁸ Mpindyewu patudi tuwimbila mu matama apa, mpindyewu kudimuka ulabulangane ku cyanza ne mwena mutumba neebe mwab’awu. Kaa, yèyè’s mmwena lwendu pende, mupici wa njila.

Ndi muMunange, ndi . . . (...?...aci’s
ncinene.)
Bwalu Yèyè wakannanga kumpala
Ne wakampetela . . . lupandu

(Vwilaayi kuneeku mu aka kajila. Eyowa, twasakidila, mwaneetu wa balume.)

Ndi muMunange, ndi muMunange
Bwalu Yèyè wakannanga kumpala
Ne wakampetela lupandu
Pa mucì wa Kalvariyo.

Ndi muMunange,

Tùwìmbààyi mpindyewu.

Ndi muMunange
Bwalu Yèyè wakannanga kumpala
Ne wakampetela lupandu
Pa mucì wa Kalvariyo.

²⁶⁹ Mpindyewu twinyikaayi mitu yetu, tubwitaayi kwìsù, twèlààyi byanza byetu muulu ne tubandishaayi mèyì etu kudi Nzambi mpindyewu, pândì mèmè nnushiya mu byanza bya mpaasata apa. Tudi ne disanka dya kwikala neenu kaaba aka. Twètù katwenaku dingumba to. Katwenaku ne mukenji nansha umwe to anu dinanga, twitabaayi nansha umwe to anu Kilisto, mukanda nansha umwe to anu Bible. Katwenaku ne bya buumambala to; anu bwobumwe mu Mashì a Yesu Kilisto àdì àtùkezulà ku bupidya bwònsò.

²⁷⁰ Eyo, bònsò cyapamwe mpindyewu.

Ndi... , ndi...

Nzambi anubeneshe. Nwâlukilaayikù bwa kutukumbula cyakabidi.

Bwalu Yêyè wakannanga...

Eyo, mpaasata. Ukaadi mudilongolole anyi? Nzambi akubeneshe.

Ne...



BWÀ CINYÌ NDI MBÈNGANGANA NÈ
NTÈNDELEELU MUDÌLONGOLWELA LUA62-1111E
(Why I'm Against Organized Religion)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu dilòlò, mu matuku 11 a ngondo wa dikumi ne umwe, cidimu cya 1962, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org